

Zabur

Zabur

© 2022 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](#)

Zabur

Zaburay awali ketáb

Zabur 1—41

Pahrézkár o badkáráni ráh

1 Bahtáwar hamá ent
ke badkáráni shawr o saláhay sará narawt,
gonahkáráni rahsará naóshtit o
rishkand kanókáni diwáná nanendit,
² hamá ke wáhagi gón Hodáwanday tálimá ent o
róch o shap áiay tálimay sará pekra kant.
³ Á hamá drachkay paymá ent
ke rombókén jósaréay kerrá keshag butag o
mósmay sará nibaga dant o
táki nagimmorant,
harché ham ke kant kámyába bit.
⁴ Bale badkár chosh naant,
á hamá pog o paláráni paymá ant ke gwátesha rópit o bárt.
⁵ Gorhá bezán ke badkárán, pa dádrasiá^a óshtagay wák o twán nést o
gonahkár pahrézkáráni diwáná hór buta nakanant.
⁶ Ke Hodáwand pahrézkáráni ráhay negahpán ent,
bale badkáráni ráh tabáhi o bégwáhi ent.

Hodáay bádsháha kayt, pádáni kapét

2 Á dega kawm pa ché shóresha kanant o
ráj chiá mopt o náhudagén pandala^b sázant?
² Jahánay bádsháh tayára bant o hákem yakjáh mocch,
Hodáwand o áiay Masihay helápá óshtant:
³ “Byáét tán áyáni sád o bandán beborréen o zamzilánesh besendén.”

⁴ Hodáwand ke ásmáná bádsháhia kant kandit o
áyán maskará kant.
⁵ Á wahdá wati hezhmay tahá gón áyán habara kant,
wati gazabay tahá áyána torsénit:
⁶ “Man wati bádsháh, wati pák o gechénién kóh, Sahyunay sará nendáréntag.”

⁷ Nun Hodáwanday hokmá darshána kanán ke maná gwashti:

^a 1:5 Dádrasi, bezán hakkén paysalah, hamá shawr ke cha dádgáhána kayt, dáwari.

^b 2:1 Pandal, bezán repk, mandr,

makr.

“Taw mani Bacch ay, maróchi man tará pédá kortag.
⁸ Cha man belóth tán kawmán tai mirás bekanán o
zeminay chárén kondháni ráján tai sawgát.
⁹ Gón ásenén asáé áyán prósha dayay o
kunzagáni paymá hurt hurtesha kanay.”

¹⁰ Paméshká, oo bádsháhán! Aglmand bebét.
Anchosh oo jahánay hákemán! Adab bezurét.
¹¹ Pa tors, Hodáwanday hezmatá bekanét o
pa drahag pádáni kapét.
¹² Chokká bechokkét chó mabit ke zahr begipt o
shomá ráhay némá gár o bégwáh bebét,
chiá ke á anágat bránza gipt.
Bahtáwar hamá ant ke áiay mayár o báhótha bant.

Oo Hodáwand! Pád á

Dáuday Zabur, hamá wahdá ke cha wati chokk Abshálumá jehagá at.

3 Oo Hodáwand! Mani dozhmen chenkadar báz ant.
Bázéné mani helápá pád áyagá ent.
² Bázéné mani bárawá gwashagá ent:
“Hodá eshiá narakkénit.” Ósht...^a

³ Bale taw oo Hodáwand! Wat mani chágerdá espar ay,
Mani shán o shawkat ay,
maná sarperáza kanay.
⁴ Hodáwandon gón borzén tawáré peryáta kort o
áiá cha wati pák o gechénién kóhá maná passaw dát. Ósht...
⁵ Man ásudag waptán o pád átkán,
chiá ke Hodáwand mani posht o panáh at.
⁶ Cha lakkáni lakká natortsán ke cha har némagá maná angerresh kortag^b.

⁷ Oo Hodáwand! Pád á.
Oo mani Hodá! Maná berakkén.
Taw ay ke mani dozhmenáni démá shahmáta janay o
badkáráni dap o dantánána próshay.
⁸ Rakkénók Hodáwand ent, tai barkat tai kawmá berasát! Ósht...

^a 3:2 Pa óshtá asligén Ebráni gál “saláh” ent. É gál báz barán Zaburay ketábá átkag. Mánái pakká zánag nabutag bale balkén pa wánókay mahtal bayagá muzikay yak gálé. ^b 3:6 Angerr kanag, bezán chapp o chágerdá gerag, Arabi o Pársia “moháserah”.

Démá pa má rozhnág kan

Pa sázger o washawázáni sálárá. Gón zehi o simmi sázán. Dáuday Zabur.

4 Oo mani dádrasén Hodá! Passaw beday wahdé peryáta kanán.

Sakki o sóriáni wahdá mani dast o bánolet pach kortant.

Maná mehr o rahmat baksh o dwáyánon gósh dár.

² Oo mardomán! Tán kadéná mani ezzat kamsharap kanaga bit?

Tán chontá náhudagiá dósta dárét o drógay padá gardét? Ósht...

³ Bezánét ke Hodáwandá Hodádóst pa wat zortag o jetá kortagant.

Wahdé Hodáwandá tawára kanán, á eshkont.

⁴ Hezhmay tahá gonáh makanét.

Éshiy badalá, wapsagay wahdá, wati delá é bárawá pegr kanét o áram gerét. Ósht...

⁵ Barhakkén korbánig peshkash kanét o Hodáwanday sará tawkal.

⁶ Bázéné gwashit: “Kay ent pa má néki bekant?”

Oo Hodáwand! Wati démá pa má rozhnág kan.

⁷ Taw mani del cha shádániá sarréch kortag,

cha áyáni hamá wahday shádániá géshter ke dán o gallah o tázagén sharábesh báz bebant.

⁸ Árámiá drája kasshán o wáb ham kapán,

chiá ke tahná taw, oo Hodáwand, maná émeniay tahá nendénay.

Maná rástén ráhá bar

Pa sázger o washawázáni sálárá. Gón nali sázán. Dáuday Zabur.

5 Oo Hodáwand! Mani gappán gósh bedár,
mani nálagán delgósh kan.

² Oo mani bádsháhén Hodá! Mani peryátá beshkon,
chiá ke tai gwará dwá kanán.

³ Oo Hodáwand! Bámgwáhán taw mani tawárá eshkonay,
bámgwáhán, gón dazbandi wati wáhagán pésha kanán o wadáriga bán.

⁴ Taw choshén Hodáé naay ke cha badiá delwassh bebay,
badi gón taw jalleta nakant.

⁵ Porkebr o gorunák tai démá óshtáta nakant o
cha sajjahén badkárán naprata kanay.

⁶ Drógbandán bégwáha kanay,
Hodáwand cha hónig o prébkárán naprata kant.

⁷ Bale man cha tai mehrá tai lógá káyán o
cha tai torsá tai parasteshgáhá kóndhána kapán.

⁸ Oo Hodáwand! Pa mani dozhmenáni sawabá,
gón wati adl o ensápá maná rahshóni beday o
wati ráhá pa man sáp o tachk bekan.

⁹ Chiá ke rásti áyáni zobáná nést o
del o darunesh tabáhi ent o bass.

Gotth o galuesh práhén kabré o
wati zobáná pa cháplusi kára bandant.

¹⁰ Oo Hodá! Eshán mayárbár hesáb kan,
bell ke wati shawráni tahá beboddhant.

Áyáni bázén náparmániáni sawabá, cha wat duresh kan,
chiá ke tai helápá shóreshesh kortag.

¹¹ Bale á sajjahén ke tai báhóth o mayára bant, shádmáni bekanant,
dáemá sáz o zémel bejanant.

Áyán wati sáhegay chérá negahpáni bekan,
tán harkas ke tai námay dóstdár ent gón tai námá shádán bebit.

¹² Allamá, taw, oo Hodáwand, pahrézkárán barkata dayay o
áyán gón wati mehr o rahmatá esparay paymá negahpána bay!

Oo Hodá! Maná berakkén

Pa sázger o washázáni sálárá. Gón zehi o simmi sázán. “Sheminitay”^a tarzay sará. Dáuday Zabur.

6 Oo Hodáwand! Maná gón wati hezhmá hakkal maday o
gón wati gazabá neherr.

² Hodáwandá! Mani sará rahm kan chiá ke gimmortagán.

Oo Hodáwand! Maná dráh bekan chiá ke jesm o jánon paréshán ent.^b

³ Arwáhon sakk békarár o jalájósh ent.

Oo Hodáwand! Tán kadén? Tán kadén?

⁴ Hodáwandá! Wati démá gón man tarrén o mani sáhá berakkén,
wati mehray sawabá maná neját beday.

⁵ Chiá ke mordag tará yát korta nakanant,
kay ent ke cha mordagáni jaháná tai shográ begipt?

⁶ Cha nálagán dam bortagán,
har shap gandalán cha gréwagá ménán o
tahtá gón arsán tarra kanán.

⁷ Chammon cha bázén andóhán nezór butagant o
cha bázén dozhmenán tahár.

⁸ Oo sajjahén badkárán! Cha man dur bét,
chiá ke Hodáwandá mani gréwagáni tawár eshkotagant.

⁹ Hodáwandá mani peryát gósh dáshtagant,
Hodáwand mani dwáyá mannit.

¹⁰ Mani sajjahén dozhmen sharmendag o sakk paréshána bant,
á démá chahra dayant o pashal o sharmendaga bant.

^a 6:0 Sheminitay máná “hashtomi” ent. Báwar esh ent ke edá muzikay yak gálé. ^b 6:2 Asligén Ebráni zobána gwashit: “Haddh o bandon paréshán ant.”

Tai mayár o báhótha bán

Dáuday Shigáyun.^a Dáudá é Zabur Benyáminay kabilahay Kush námén mardoméay habaráni sawabá pa Hodáwandá darshán kortag.

7 Oo Hodáwand, mani Hodá! Tai báhóth o mayára bán.

Maná cha á sajjahénán ke mani randá kaptagant berakkén.

² Agan na, á maná shéráni paymá derrant,
chondh chondha kanant o maná rakkénoké nabit.

³ Oo Hodáwand, mani Hodá! Agan man choshén káré kortag o
daston gonáháá mén ent,

⁴ agan pa dóstéá badion kortag,
yá ke dozhmené bémayárá poletag,
⁵ bell ke dozhmen mani padá byayt o
áiay dast pa man berasit,
mani zendá pádmál bekant o
maná hákáni tahá bwápénit. Ósht...

⁶ Oo Hodáwand! Gón wati hezhmá jáh bejan o
mani dozhmenáni gazabay démá pád á!

Ágáh bay, oo mani Hodá!
Taw ay ke dádrasiay járet jatag!

⁷ Bell ke kawmáni romb tai gwará yakjáh bant,
cha borzá esháni sará hákemi bekan!

⁸ Bell ke Hodáwand pa kawmán shawr o hokm beborrit.
Oo Hodáwand! Gón mani rásti o tachkiá,
wati dadrasiá mani pahrézkáriáni sará bekan.

⁹ Oo ádelén Hodá ke del o darunána zánay!
Badkáráni sherrián halás kan o
pahrézkárán pa del mohr bedár.

¹⁰ Mani espar Hodá ent
ke nékdelána rakkénit.

¹¹ Hodá ádelén dadrasé,
Hodáé ke har róch hezhma gipt.

¹² Agan ensán pashómán mabit,
wati zahmá téza kant o
wati kamáná kasshit o tayára kant.

¹³ Áiá koshókén seláh tayár kortag o
wati tirán ácheshéna kant.

¹⁴ Á mardomá bechár ke cha sherr o shórá ápos ent o
cha petnahá lápporr, á dróga zayt.

¹⁵ Kallé kóchit o johla kant o
hamá chátá kapit ke wat kótkagi.

¹⁶ Áiay petnah wati sará kapit o
pasáti ham sará laggit.

^a 7:0 É gálay máná zánag nabutag bale balkén adab yá muzikay yak gálé.

¹⁷ Hodáwandá pa áiay adl o ensápá shogra gerán,
borzén arshay Hodáwanday námá názénán.

Porshawkat ent tai nám

Pa sázger o washázáni sálárá. “Gittitay”^a tarzay sará. Dáuday Zabur.

8 Oo Hodáwand, may Hodáwand!
Chenkadar porshawkat ent tai nám jahánay chárén kondhán.

Taw wati shán o mazani ásmánáni sarborá sheng o tálán kortag.

² Pa wat satá o saná, chokk o shirmechén nonnokáni dapá ham dátág
ke tai dozhmenáni sawabá tará satá bekanant,
tánke dozhmen o bérgirán chopp o bétawár bekanay.

³ Wahdé tai ásmánáni némagá chárán

ke tai lankokáni ezm o honar ant

máh o estáráni némagá,

ke taw barjáh dáshtagant,

⁴ ensán chié ke taw áiay gamwár bebay o

bani ádam kay ent ke áiay delgóshá bedáray?

⁵ Bale angat taw cha préshtagán^b bass kammoké kamter kort o
mazani o ezzatay táj sará dát.

⁶ Wati dastay sajjahén káráni sará hákem kort o

har chizz áiay pádáni chérá esht.

⁷ Sajjahén ramag o górrom^c

gyábán o sahrái jánwar

⁸ ásmánay báli morg o

daryáay máhig o

har ché ke cha zeray^d ráhá gwazit.

⁹ Oo Hodáwand, may Hodáwand!

Chenkadar porshawkat ent tai nám jahánay chárén kondhán.

Ádelén Hodá

Pa sázger o washázáni sálárá. “Mawt-labbénay”^e tarzay sará. Dáuday zabur.

9 Tará, oo Hodáwand, cha delay johlánkián shogra gerán,
tai sajjahén ajabén kárán darshána kanán.

² Tai gwará gal o shádmánia kanán.

Oo borzén arshay Hodá! Tai námá názénán.

³ Wahdé mani dozhmen pada kenzant,
cha tai démá lakoshant o tabáh o haláka bant.

^a 8:0 Báwar esh ent ke Gittitay yak gálé. ^b 8:5 Yá: cha Hodáyá. ^c 8:7 Górrom, bezán gókáni romb. ^d 8:8 Zer, bezán daryá. ^e 9:0 Mawt-labbénay máná “chokkay mark” ent. Báwar esh ent ke Mawt-labbén muzikay yak gálé.

⁴ Chiá ke taw mani hakk o ensáp pa sharri dáshtag,
wati tahtá neshtagay o pa ensáp dádrasi kortag.

⁵ Kawmet hakkal dátagant,
badkár tabáh o barbád kortagant o
áyáni nám abad tán abad gár o bégwáh kortag.

⁶ Dozhmen, dáemi wayránagáni tahá gár o gomsár butagant,
áyáni shahráni risshag o wandhálet cha boná kasshetagant,
tantaná^a áyáni yát ham gár o zawl butag.

⁷ Bale Hodáwand tán abad bádsháhia kant,
áiá warí shawr o dádrasiay taht páydár kortag.

⁸ Á wat jaháná gón adlá dádrasia kant,
kawmáni sará gón ensápá shawra borrit.

⁹ Hodáwand pa zolm distagénán, borzén kaláté
kaláté borzén, mán sakkén sáhatán.

¹⁰ Á ke tai námá zánant tai sará tawkala kanant
chiá ke taw, oo Hodáwand, warí hodónákén^b lóthók yalah nakortagant.

¹¹ Hodáwandá, ke tahti Sahyuná ent, benázénét,
kawmáni nyámá áiay kortagén kárán jár janét.

¹² Chiá ke á ke hónáni bérger ent, eshán yáta kant
zolm distagénáni peryátána nashamóshit.

¹³ Oo Hodáwand! Mani sará rahm kan,
hamá ázárán ke cha dozhmenáni dastá maná rasant bechár,
taw ke cha markay darwázagán maná sarperáza kanay,

¹⁴ tánke tai sajjahén satá o tawsipán
Sahyunay Jenekay darwázagáni démá^c barjáh dárán o
shádmáni bekanán ke taw maná rakkéntag.

¹⁵ Kawm, warí hamá kóttagén kallá kaptagant,
áyáni pád hamá dámá band geptag o passetagant ke watesh chér kortagat.

¹⁶ Hodáwandá watá gón warí adl o ensápá pajjáréntag,
badkár cha warí kortagén kárán wat dámá kapant.
Zegr...^d Ósht...

¹⁷ Badkár mordagáni jaháná pera tarrant,
á sajjahén kawm ke Hodáyá shamóshant.

¹⁸ Bale hájatmand harwahd shamóshaga nabant o
zolm distagénáni omét tán abad barbáda nabit.

¹⁹ Oo Hodáwand! Pád á o mayl ke ensán báládast bebit,
bell ke tai dargáhá kawmáni shawr o hokm borrag bebit.

²⁰ Oo Hodáwand! Torsesh jesm o jáná perrén
tán kawm bezánant ke ensán ant o bass. Ósht...

^a 9:6 Tantaná, bezán hattá, tán é haddá ke.

^b 9:10 Hodónák, bezán wáhagdár, armáni, lóthók, delmánag.

^c 9:14 Sahyunay Jenekay darwázagáni démá, bezán Urshalimay shahray darwázagáni démá. ^d 9:16 Asligén Ebráni gál "Higáyun" ent. É gálay máná zánag nabutag bale báwar esh ent ke muzikay yak gálé.

Chiá watá chéra dayay?

10 Oo Hodáwand! Pa ché dur óshtátagay? Chiá watá sakkén sahatán chéra dayay?

² Badkár gón kebr nezórénán shekára kant,
bell ke wati pandaláni dámá gereptár bebit.

³ Chiá ke badkárá wati delay wáhagáni sará pahr ent,
lálech kanókán barkata dant o Hodáwandá bad o rada gwashit.

⁴ Badkár mán wati kebr o gorunákiá gwashit: “Hodá dar gétka nakant”,
áiay sajjahén pegr o hayál esh ent ke “Hodáé nést”.

⁵ Wati ráhá modám kámyáb o sóbén^a ent,
tai shawr o dádrasi cha áiay chammá dur ant,
wati sajjahén dozhmenán rishkanda kant.

⁶ Wati delá gwashit: “Hechbar cha wati jáhá sorénag o jombénaga nabán
nasláni nasl cha kazá o baláhán dura bán.”

⁷ Dap o zobáni cha nálat o préb o setamá porr ent,
áiay zobánay chérá petnah o sherkáriá kodám bastag.

⁸ Métag o ábádiáni kaminá^b nendit,
chér o panáhén jáhán bégonáhána koshit,
chérokái béwasáni shekár kanagay shoházá ent.

⁹ Shéray paymá wati kaminá wadára kant,
wadára kant o nezór o nátwánán wati panjagá kárit,
panjagá kárit o dámá dawra dant.

¹⁰ Áiay shekár, lagatmál o zár o wára bant,
áiay dastá gár o gomsára bant.

¹¹ Wati delá gwashit: “Hodáyá shamoshtag
démi póshéntag o hechbara nagendit.”

¹² Oo Hodáwand! Pád á. Oo Hodá! Wati dastá shahár.
Bazzagénán mashamósh.

¹³ Badkár pa ché Hodáyá bad o rada gwashit?
Chiá wati delá gwashit:
“Hodá dar gétka nakant”?

¹⁴ Bale albat taw genday. Sakki o sóriána genday,
tán kár o ehtiárá wati dastá bedáray.
Bazzag o békárag watá tai sepordaga kanant,
chóraváni madat kanók taw ay.

¹⁵ Sherr o badkáráni báská beprósh,
áyáni sharáratay hesábá beger,
hamá káráni hesábá ham ke áiá gwashitag: “Hodá dar gétka nakant”.

¹⁶ Hodáwand abad tán abad bádsháh ent,
kawm cha áiay sardhagárá gár o gomsára bant.

¹⁷ Oo Hodáwand! Taw bazzagáni wáhagán gósha dáray,
áyán delbaddhia dayay o habaránesh eshkonay.

¹⁸ Chórav o setam distagénáni dadrasiá kanay
tánke é hákién ensán dega baré tors o dehshat maperrénit.

^a 10:5 Sóbén, bezán péröz, kámyáb. ^b 10:8 Kamin, bezán sráp.

Hodáwand wati Pákén parasteshgáhá ent

Pa sázger o washázáni sálárá. Dáuday Zabur.

11 Man Hodáwanday mayár o báhóth án,
gorhá shomá maná che paymá gwashét:

“Morgé bebay o wati kóhá bál kan.

² Chiá ke haw, badkár kamáná kasshant o
tiresh zehá dátág,

ke mán tahárókiá nékdelán bejanant.

³ Agan bonred^a tabáh kanag bebant,
gorhá pahrézkár ché korta kant?”

⁴ Hodáwand wati pákén parasteshgáhá ent,
Hodáwanday taht ásmáná ent.

Chammi gendagá ant,
didagi ensánay chokkána ázmáit.

⁵ Hodáwand pahrézkár o badkárána chakkásit^b,
áiay ruh cha hamáyán naprata kant ke sherr o sheddatesh dósta bit.

⁶ Badkáráni sará angar o gókorta gwárénit,
áyáni jám o pyálahay bahr, sóchák o lewárén gwát ent.

⁷ Hodáwand ádel ent,
áiá adl o ensáp dósta bit,
nékdel áiay démá gendant.

Hodádósté pasht nakaptag

Pa sázger o washázáni sálárá. “Sheminitay”^c tarzay sará. Dáuday Zabur.

12 Oo Hodáwand! Berakkén, chiá ke hech Hodádósté pasht nakaptag o
wapádár cha mardománi nyámá gár o bégwáh butagant.

² Harkas gón hamsáhegá dróga bandit,
cháplusén dapesh pa préb habara kanant.

³ Hodáwand har cháplusén dapá próshát o
har bathák janókén zobáná borrát.

⁴ Gwashant: “Má gón wati zobáná kámyáb o sóbéna bén,
may dap o lonth ham gón má ant, may wájah o master kay ent?”

⁵ Hodáwanda gwashit: “Cha nezórén mardománi lagatmáli o
hájatmandáni nálagáni sawabá
nun jáha janán^d.

Man eshán hamá paymá émenia bakshán ke esháni armán ent.”

⁶ Hodáwanday habar asil o béayb ant,

^a 11:3 Bonred, bezán lóg yá diwáléay awali o johlterén red. ^b 11:5 Chakkásag, bezán ázmáesh kanag, emtehán gerag.

^c 12:0 Sheminitay máná “hashtomi” ent. Báwar esh ent ke edá muzikay yak gálé. ^d 12:5 Jách janag, bezán cha wati jáha anágatén pád áyag, Arabi o Pársiá “qiám, rastákhiz”.

nograhay paymá ke cha kurahá dar átkag o
hapt randá pák o sallah kanag butag.

⁷ Oo Hodáwand! Taw eshán negahpánia kanay,
taw é dábén mardománi nyámá esháni posht o panáha bay.

⁸ Badkár har némagá tarr o tába kanant,
á wahdi ke mardom palitiá ezzata dayant.

Oo Hodáwand! Tán kadén?

Pa sázger o washázáni sálárá. Dáuday Zabur.

13 Oo Hodáwand! Tán kadén? Bárén maná tán abada shamóshay?
Tán kadén wati démá cha man panáha kanay o póshénay?

² Tán kadén mani pegr o andéshag maná ázár bedayant,
har róch delon gamig?

Tán kadén dozhmen mani sará báládast bebit?

³ Oo Hodáwand! Mani Hodá! Mani cháragá bekan o passaw day!
Chammánon rozhná kan, agan na, markay wábá wapsán.

⁴ Chó mabit dozhmen begwashit: “Man áiay sará sóbén butagán”,
badwáh shádán bebit ke mana larzán.

⁵ Bale tai mehray sará tawkala kanán,
delon gal o bála bit ke taw maná rakkéntag.

⁶ Hodáwandá názénán,
ke modám mani sará mehrabán butag.

Nádána gwashit: “Hodáé nést”

Pa sázger o washázáni sálárá. Dáuday Zabur.

14 Nádán wati delá gwashit:
“Hodáé nést.”

É palit ant o káresh sell o gandah,
nékkáré nést.

² Hodáwand cha ásmáná bani ádamá chárít
tán begendit bárén dánáé hast
ke Hodáay shóházá ent.

³ Sajjahénán wati ráh gár dátág,
hórigá palit butagant,
nékkáré nést,
yakké ham nést.

⁴ Badkár hechbar sarpada nabant?
É mani kawmá anchosha warant ke mardom nagana warant o
Hodáwandá hech tawára nakanant.

⁵ Bale ódá wati torsay tahá boddhant,

chiá ke Hodá gón pahrézkáráni nasl o padréchá ent.

⁶ Shomá setam distagénáni shawrbandián rishkanda kanét,
bale Hodá esháni panáhgáh ent.

⁷ Kasé cha Sahyuná byáyát o Esráilá berakkénát.

Wahdé Hodáwand washbahtiá pa wati kawmá pera tarrénit,
Ákub gal o bála bit o Esráil shádehia kant.

Kay tai pákén kóhá jahmenend bebit

Dáuday Zabur.

15 Oo Hodáwand! Kay tai tambuá^a mehmán bebit?
Kay tai pákén kóhá jahmenend bebit?

² Hamá ke béayb gám bejant,

adl o ensápá barjáh dárit o

pa delsetki rásténá begwashit,

³ hamá ke gón wati zobáná kaséay báposhtá habaré magwashit,

pa hamsáhegá badi makant o

hamráhán ér majant,

⁴ hamá ke badkár áiay chammán hakir o bárezesh bebant,

Hodátorsán ezzat o hormat bedant o

wati labzay sará wapá bekant, toré zalar o zyán begendit,

⁵ hamá ke wati zarrá pa putt madant o

bégonáhéay helápá reshwat magipt,

á ke eshán barjáha dárit hechbara nalarzit.

Maná yalahá nakanay

Dáuday shayr.

16 Oo Hodá! Maná pa sharri bedár,
ke tai mayár o báhóth butagán.

² Gón Hodáwandá gwashton: “Taw ay mani Hodáwand,
abéd cha taw pa man hech sharrié nést.”

³ Á pák o palgártagén ke zeminá ant,

hamá sharapmand ant ke mani sajjahén shádmáni hamáyáni sawabá ent.

⁴ Á ke dega hodáéay randá tachant, áyáni gam o andóh sakk báza bit,
áyáni hónén korbánigáni rasmán góna nabán o
námánesh wati zobáná nayárán.

⁵ Oo Hodáwand! Taw mani gisshetagén bahrwandh o jám ay,
taw mani bahrá sharriay sará dáray.

^a 15:1 Tambu, bezán gedán, haymah. É gál pa Sháhediay tambuá esháraté. Sháhediay tambu Bani Esráilián Mussáay zamánagá gón Hodáday hokmá jórhéntagat o hamódá Hodáesh parastesh kortag.

⁶ Mani hadd o simsar, deltabén jágahán gisshénag butagant,
maná delkasshén mirásé dastá kaptag.

⁷ Man Hodáwandá názénán ke maná shawr o saláha dant,
delon shappásán ham maná ráh sója dant.

⁸ Man modám Hodáwand wati dém pa démá distag,
á mani rástén pahnátá ent,
cha hamé sawabá mana nalarzán.

⁹ Paméshká, delon wassh o zobán shádán ent.
Jesm o jánon mán ométay kalátá áráma gipt.

¹⁰ Chiá ke taw maná mordagáni jaháná yalahá nakanay o
wati dóstdárá sarhag o pussagá naylay.

¹¹ Taw maná zenday ráhá sója dayay o
wati bárgáhá maná cha shádmániá sarrécha kanay.
Tai rástén kashá, wasshi abadmán ent.

Tai bánzoláni chérá

Dáuday dwá.

17 Oo Hodáwand! Mani barhakkén peryátán beshkon o
nálagánon gósh dár,

dwáyánon beshkon,
ke cha béryáén dap o lonthán dara káyant.

² Cha tai bárgáhá maná dádrasi o ázáti sar bát,
chammet rásténá begendántant.

³ Taw mani del ázmáesh kortag o shappásán mani cháragá átkagay,
maná chakkásetaget o hech dar nagétkag,
ahdon kortag ke dap gonáh makant.

⁴ Mardománi kár har ché ke bit,
bale man cha tai lontháni gálá
watá cha zálemáni ráhá dur dáshtag.

⁵ Mani pádáni pad tai ráhá naksh ant,
pádon nalarzetagant.

⁶ Oo Hodá! Tará lóthán, chiá ke taw maná passawa dayay,
gósh dár o habaránon beshkon.

⁷ Wati mehray ajabbatiá pésh bedár!
Taw hamáyána rakkénay
ke cha wati dozhmenán tai gwará mayár o báhótha bant.

⁸ Maná chó wati chammá besambál o
wati bánzoláni sáhegá chér beday,

⁹ cha á badkárán ke maná gár o gomsára kanant o
cha hamá jawréni dozhmenán ke maná angerresh kortag.

¹⁰ Á wati sengén delán mohra kanant o
áyáni zobán porkebr o gorunákén habara kant.

¹¹ Mani padesh geptagant o hamé annun maná angerresh kortag,
chammesh pa man dótkag tán zeminá dawron bedayant.

¹² Á shéréay paymá ant ke pa shekárá shodig ent,

warnáén shéréay paymá ke kaminá neshtag,

¹³Oo Hodáwand! Ják jan, esháni démá dar á o zeminá bejanesh,
gón wati zahmá maná cha badkárán berakkén.

¹⁴Hodáwandá! Maná cha é paymén mardománi dastá ázát kan,
cha é donyáay mardomán ke nasibesh tahná hamé donyá ent o bass,
ke lápánesh cha wati hazánagá séra kanay,
chokkesh báza bant o
áyáni pasht kaptagén chizz pa chokkánesha rasit.

¹⁵Bale man pa pahrézkári tai démá gendán,
ágáh ke bán, cha tai gendagá séra bán.

Hodáwand mani talár ent

*Pa sázger o washawázáni sálárá. Hodáwandy hezmatkár Dáuday Zabur.
Dáudá é Zabur hamá wahdá pa Hodáwandá per bast ke Hodáwandá cha
sajjahén dozhmenán o cha Sháulay dastá rakként. Dáudá chosh gwasht:*

18 Oo Hodáwand, oo mani zór o wák! Tará báz dósta dárán.

Hodáwand mani talár ent, mani kalát o mani rakkénók ent,
mani Hodá mani talár ent o hamáiay poshtá báhóth o mayára bán.

Á mani espar ent, mani zórakén rakkénók^a o mani sangar.

³Hodáwandá ke satá o sanáay láhek ent tawára kanán o
cha wati dozhmenána rakkán.

⁴Markay sád o bandán maná patátagat o
tabáhi o zawáliay hár o hirrótán maná torséntagat.

⁵Mordagáni jahánay sád o bandán patátagatán o
gón markay dámá, dém pa dém atán.

⁶Wati paréshániáni tahá Hodáwandon tawár jat o
komak lóthagay peryáton wati Hodáay gwará borz kort.
Áiá cha wati parasteshgáhá mani tawár eshkot o
mani komak lóthagay peryát áiay góshán raset.

⁷Nun zemin chandhet o jomb o jóshá lagget,
kóháni bék o bonyát ham larzetant,
chiá ke á hezhm geptagat.

⁸Cha áiay pónzá dutt dar átk o
sóznákén ásé cha dapá,
taptagén angar zobánok janagá atant.

⁹Ásmáni ér áwort o jahl átk,
syáhén jambar áiay pádáni chérá at.

¹⁰Karrubiéay^b báñzoláni sará neshtagat o
gwátay báñzoláni sará bál at.

¹¹Taháróki wati pósháki kort o

^a 18:2 Asligén Ebráni nebeshtánka gwashit: mani rakkénókén kánth. Kánthay máná edá zór o kodrat ent.

^b 18:10 Karrubi, ásmáni mahluké ke báñzolesh per o Hodáay tahtay chapp o chágérdá ant.

jambaráni gobár o syáhén hawri wati chágérdy kápár kortant.

¹² Rozhn o drapshnáki cha áiá démá at o jambar chest bayagá atant,
taptagén seng o ácheshén angar dara kaptant.

¹³ Hodáwandá cha ásmáná grandet o
borzén arshay Hodáyá cha taptagén seng o ácheshén angarán wati tawár sar dát.

¹⁴ Áiá wati tir shántant o dozhmen sheng o sháng kortant,
gróki dawr dát o sargardáni kortant.

¹⁵ Daryáay ápráh gendag butant o
donyáay bonyát paddar,
cha tai neherr o hakkálán
cha tai pónzay trondén gwátá, oo Hodáwand!

¹⁶ Áiá cha borzádá dast shahárt o maná gepti,
cha zyádahén ápá maná dar áworti o

¹⁷ cha zóráwarén dozhmená rakként,
cha áyán ke napratesh mani sará próshtagat,
chiá ke cha man zórákter atant.

¹⁸ Sakki o sóriáni róchá, mani démá dar átkant,
bale Hodáwand mani posht o panáh at.

¹⁹ Áiá maná práh o émenén jágahé áwort o
maná rakkénti, chiá ke cha man báz wassh o razá at.

²⁰ Hodáwandá pa mani pahrézkáriá gón man néki kortag,
mani dastáni pákiay mozz bakshátag,

²¹ chiá ke man Hodáwanday ráh yalah nadátag o
cha Hodáyá dém pa badiá nashotagán.

²² Áiay parmán modám mani chammáni démá butagant o
áiay hokm cha wat dur nadáshtagant.

²³ Áiay démá tamán o béayb butagán o
watá cha gonáhá dur dáshtag.

²⁴ Hodáwandá mani pahrézkáriáni mozz dátág,
áiá mani dastáni páki distag.

²⁵ Taw gón wapádárán wapádár ay o
gón tachkénán tachk.

²⁶ Gón pákénán pák ay o
gón repkkárán chálák.

²⁷ Chiá ke taw békebrána rakkénay,
bale porkebr o gorunákán chamjahla kanay.

²⁸ Oo Hodáwandén Hodá! Taw ay ke mani cherágá rozhnága kanay.
Hamá ent ke mani tahárókián róshena kant.

²⁹ Gón tai madatá lashkaréay sará orosh o hamlaha barán o
gón Hodáy komaká ent ke cha borzén diwálán coppa kanán.

³⁰ Haw! Hodá, áiay ráh tamán o kámelén ráhé,
Hodáy habar béayb ant,

pa harkasá ke áiay gwará panáha zurit, esparé.

³¹ Hodáwandá abéd, kay Hodá ent o
Hodáyá abéd, kay talár?

³² É Hodá ent ke maná zór o wáka dant o
mani ráhá tamán o béayba kant.

³³ Mani pádán áskáni^a paymá téza kant o
maná borziáni óshtagá láhekia dant.

³⁴ Mani dastán pa jangá ázmudaga kant,
tán báskon brenjén kamáná beloppénit o chóth bekant.

³⁵ Taw wati sóbén bayagay espará maná bakshay o
rástén dastet mani posht o panáh ent,
tai narmdeli o békebri maná mazania dant.

³⁶ Taw mani pádáni chéray ráhá práha kanay
tánke pádon malarzant.

³⁷ Dozhmenáni randá kapán o
mani dast pa áyána rasit,
tán halák mabant, pera natarrán.

³⁸ Anchosh zeminá janán ke pád áyagay móh o wákesh mabit,
mani pádáni chérá kapant.

³⁹ Taw pa jangá maná zór o wáka bakshay o
dozhmenán mani pádáni chérá dawra dayay.

⁴⁰ Mani pádán dozhmenáni gardenay sará éra kanay o
man wati dozhmenán gár o gomsára kanán.

⁴¹ Pa komaká peryáta kanant bale rakkénoké nést,
cha Hodáwandá komaka lóthant, bale passawa nadant.

⁴² Man áyán háka kanán o gwátá dayán,
damk o kuchaháni gelay paymá chandhán.

⁴³ Taw maná cha mardománi jang o chópána rakkénay o
kawmáni sardára kanay,
hamá mardom mani hezmatá kanant ke manesh pajjáha nayárán.

⁴⁴ Tán mani tawará eshkonant, parmána barant,
darámad mani démá wati sará jahla kanant.

⁴⁵ Á deltrakka bant,
larzán o drahán cha wati kalátána tachant.

⁴⁶ Hodáwand zendag ent. Pa mani talárén Hodáyá názénk.
Mani rakkénokén Hodáyá shán o shawkat bát.

⁴⁷ Hodá ent ke mani bérá gipt,
kawm o ráján mani chérdastiá nádénit o

⁴⁸ maná cha dozhmenána rakkénit.

Haw! Taw mani dozhmenáni démá maná sarperáza kanay o
cha zálemén mardomána chotthénay.

⁴⁹ Oo Hodáwand! Paméshká tará kawmáni nyámá satá kanán o
tai námá názénán.

⁵⁰ Á wati bádsháhá mazanén sób o pérözia bakshit o
wati rógen per moshtagéná^b mehra kant,
bezán Dáud o áiay nasl o padréchá tán abad.

^a 18:33 Ásk, bezán áhu, áhug. ^b 18:50 Rógen per mosthag, bezán pa bádsháhiá gechén kanag.

Hodáwanday Sharyat tamán o béayb ent

Pa sázger o washawázáni sálárá. Dáuday Zabur.

19 Ásmán Hodáwanday shán o mazaniá paddara kant,
borzén arsh áiay dastay kárán.

² É róch pa á róchá habar rawána kant o
é shap pa á shapá zánt o hekmat darshána kant,

³ na habaré o na gálé,
áyáni tawár eshkonaga nabit.

⁴ Padá ham áwázesh sarjamén zeminá sheng o tálána bit o
habaresh tán jahánay goddhi marz o simsarána rasant.

Pa róchá, Hodáyá ásmáná tambué bastag,

⁵ róch sálónkéay paymá cha wati kellaḥbandá^a dara kayt o
chó ke pahlawáné shádán maydána kant.

⁶ Cha ásmánay yak gwaréá dara kayt o
tán á dega gwará chahra wárt,
hech chizzé cha áiay horm o garmiá chér naent.

⁷ Hodáwanday Sharyat tamán o béayb ent o
jesm o jána bódá kárít.

Hodáwanday hokm porehtebár ant o
kamzántán dáná o aglmand kant.

⁸ Hodáwanday rahband rást ant o
delá shádána kanant.

Hodáwanday parmán pák ant o
chammán rozhnága kanant.

⁹ Hodáwanday tors pák ent o
tán abad páydár.

Hodáwanday parmán barhakk ant o
sarjamiá adl,

¹⁰ cha teláhá delkashter, tantaná cha asilén zarr ham,
cha shahdá shirkenter, tantaná cha bénagay kodámay har trampá washter.

¹¹ Tai hezmatkárá cha áyán dháh o hoshdár rasit o
góń áyáni dáragá mazanén mozzé.

¹² Kay ent á ke wati radián bezánt o sarpad bebit?
Maná cha wati nazántagén gonáhán pák o sallah kan.

¹³ Wati hezmatkárá cha gorunák o porkebrén kár o kerdán bedár,
mayl ke mani sará báládast bebant.

Hamá wahdá tamán o béayba bán o
cha har mazanén gonáhá pák.

¹⁴ Oo Hodáwand! Mani dapay habar o delay pegr o hayál
tai delá benendátant,
taw ke mani talár o posht o panáh ay.

^a 19:5 Kellahband, bezán hamá jágah ke pa sálónk o bánórá jórh kanaga bit.

Oo Hodáwand! Bápsháhá sób o pérózi beday

Pa sázger o washawázáni sálárá. Dáuday Zabur.

20 Hodáwand tará sakki o sóriáni róchá passaw bedayát,
Ákubay Hodáay nám tará negahpán bát.

² Cha wati pákén jágahá pa taw komak berasénát o
cha Sahyuná tará madat kanát.

³ Tai sajjahén korbánigán wati yátá bedárát,
tai sóchagi korbánigáni mannók bát. Ósht...

⁴ Tai delay wáhagán barjáh dárát o
tai sajjahén shawrbandián kámyáb kanát.

⁵ Tai sób o péróziá gón shádmáni kukkár bekanén o
wati bayraká^a tai námay sará borzad bechandhénén.
Hodáwand tai sajjahén dazbandián purah o sarjam bekanát.

⁶ Nun zánton ke Hodáwand wati rógen per moshtagéná^b rakkénit o
cha wati pákén ásmáná áiá passawa dant,
gón wati rástén dastay rakkénokén wák o tágatá.

⁷ Lahtén wati asp o arrábaháni^c sará pahra kanant,
bale má wati Hodáwandén Hodáay námay sará pahra kanén.

⁸ Á srénprósha bant o kapant,
bale má páda káén o mohra óshtén.

⁹ Oo Hodáwand! Bápsháhá sób o pérózi beday.
Tawár ke kanén, may passawá beday.

Hodáay dátágén sóbay shogriá

Pa sázger o washawázáni sálárá. Dáuday Zabur.

21 Oo Hodáwand! Bápsháh cha tai zórá shádmánia kant o
cha tai rakkénagá ent ke inchok gal o bál ent.

² Taw áiay delay morád bakshátagant o
áiay lontháni wáhaget cha áiá dur nadáshtagant. Ósht...

³ Chiá ke gón bázén barkatáni dayagá pa áiay wasshátká dar átkagay o
tájé cha asilén teláhá sará dátet.

⁴ Áiá cha taw zend lóthet o taw bakshát,
rócháni dráji, abad tán abad.

⁵ Cha tai bakshátagén kámránián, áiay shán o marháh mazan ent,
áiárá shawkat o mazani dáttag.

⁶ Pa rásti abadmánén barkat bakshátag o
wati bagalá gal o shadánet kortag.

⁷ Chiá ke bápsháh Hodáwanday sará tawkala kant o
borzén arshay Hodáwanday mehrá nalarzit.

^a 20:5 Bayrak, bezán parcham. ^b 20:6 Rógen per moshag, bezán pa bápsháhiá gechén kanag. ^c 20:7 Arrábah, bezán mazanén mansabdáráni hamá gárhi ke aspia kasshant.

⁸ Tai dast, sajjahén dozhmenán dara géjt,
tai rástén dast pa áyán ke cha taw naprata kanant rasit.

⁹ Á wahdi ke záhera bay
áyán porácheshén tarunéay paymá kanay.

Hodáwand wati hezhmay tahá áyán éra bárt o
áiay áchesh áyána wárt.

¹⁰ Áyáni padréchá cha zeminá gár o bégwáha kanay,
chokk o nabiragánesh cha mardománi nyámá.

¹¹ Harchont ke tai helápá palitén shawrbandi bekanant o
badén repk o pandal besázant bale sóbéna nabant,

¹² chiá ke taw áyána táchénay,
wahdé ke wati kamáná dém pa áyána tarrénay.

¹³ Oo Hodáwand! Gón wati zór o twáná anchosh mazanshán bátay.
Tai wák o kodratá satá kanén o názénén.

Taw chiá maná tahná esht?

Pa sázger o washázáni sálárá. Dáuday Zabur. “Sahargáhi áskay” tarzay sará.

22 Oo mani Hodá, oo mani Hodá! Taw chiá maná tahná esht?

Pa ché cha mani rakkénagá dur ay,
cha mani áh o peryátán sakk jetá ay.

² Oo mani Hodá! Sajjahén róchá peryáta kanán o taw passawé nadayay,
sajjahén shapá ham, bale áráma nagerán.

³ Angat ham taw pák o palgár ay,
Bani Esráil tará názénit ke taw pa bádháhi neshtagay.

⁴ May petán tai sará tawkal kort,
tai sará tawkalesh kort o taw rakkéntant.

⁵ Tai dargáhá peryátesh kort o rakketant,
tai sará tawkalesh kort o pashal o sharmendag nabutant.

⁶ Záná, man ensáné naán, kermé án?
Mardománi démá sobakk án o kawmay chammá béezzat.

⁷ Harkas ke maná gendit kalág o rishkand kant.
Dapá chótha kanant, sará sorénant o gwashant:

⁸ “Angat wati óst o ométá pa Hodáyá band,
bell á tará berakkénit,
berakkénit agan tará dósta dárit.”

⁹ Bale taw maná cha mátay lápá dar áwort o
mátay sénagá ásudagi dát.

¹⁰ Cha pédaeshá tai baddhá dawr dayag bután,
cha mátay lápá mani Hodá butagay.

¹¹ Cha man dur mabay,
chiá ke sakki o sóri nazzik ent o
kassé pa komaká nést.

¹² Bázén narén gókéá mani chapp o chágerd geptag,
Báshánay sardhagáray zóráwarén gókán maná angerr kortag,

¹³ wati práhén dapesh pa man parroptag,

gorrók o derrókén shéráni paymá.

¹⁴ Chó ke ápá réchag o tálán butagán
sajjahén haddhon cha bandán dar átkagant.
Delon chó ke mórmá áp ent o sénagá sóchit.

¹⁵ Zór o tágaton kunzagi chondhé ke hoshk butag o
zobánon nokká lacchetag,
maná markay háká wápéntaget.

¹⁶ Kochekán mani chapp o chágerd geptag,
sherr o badkáráni rombá angerr án,
mani dast o pádesh thong thong kortagant,

¹⁷ wati sajjahén haddhán shomár korta kanán.

Áyán wati thélag pa man sakk kortagant,

¹⁸ mani pocchán wati nyámá bahra kanant o
jámagay sará pála^a janant.

¹⁹ Bale taw, oo Hodáwand! Dur mabay.

Oo mani zór o tawkal! Pa mani komaká eshtáp kan.

²⁰ Mani arwáhá cha zahm o shamshirá berakkén o
mani zendagiá cha kochekáni zolm o zórákiá.

²¹ Maná cha shér o mazáráni dapá neját beday,
ke taw maná cha wahshién káigaráni^b kánthán rakkéntag.

²² Tai námá pa wati brátán jára janán o
mocchiay nyámá tará názénán.

²³ Shomá, oo Hodátorsán! Áiá benázénét.

Oo Ákubay sajjahén chokk o óbádagán! Áiá ezzat o shán bedayét.

Oo Esráilay padréchán! Áiay haybatá bechárét.

²⁴ Chiá ke áiá cha setam distagénay bazzagiá posht nakortag o
démi cha áiá natarréntag.

Peryáti ke kortag áiá eshkotagant.

²⁵ Mazanén diwáná mani satá o saná pa taw ent,
wati kawlán hamáyáni démá sarjama kanán ke Hodátors ant.

²⁶ Békebr o darbésh waráka warant o séra bant o
á ke Hodáyá shoháza kanant áiá názénant.
shomay del tán abad zendag bát.

²⁷ Zeminay chárén kondh áiá yáta kanant o
dém pa Hodáwandá pera tarrant,

sajjahén kawmáni hándán o kothom áiay bárgáhá sará jahla kanant.

²⁸ Chiá ke bádsháhi Hodáwandayg ent o
hamá ent ke kawmáni sará hákemia kant.

²⁹ Zeminay sajjahén zóráwar waráka warant o áiay démá kapant,
hákién ensán kóndhána kapit,
hamá ke watá, wat zendag dáshta nakant.

³⁰ Áyókén nasl áiay hezmatá bant,
démi padréch Hodáwanday bárawá sahig kanaga bant o

³¹ pa áyán ke angat wadi nabutagant
áiay adl o ensápá jára janant.

^a 22:18 Pál, bezán láthari, bay o shartbandi. ^b 22:21 Káigar, bezán mazanén narén gók.

Gwashant: “Á hamá at ke é kári kort.”

Hodáwand mani shopánk ent

Dáuday Zabur.

23 Hodáwand mani shopánk ent, hech chizzay mohtája nabán.

² Maná sarsabzén charágáhána wápénit o
pa áramén ápán sara kant.

³ Mani arwáhá tázaga kant o
pa warí námaygi pahrézkáriay ráhán maná démá bárt.

⁴ Agan cha markay tahárterén shép o daragán ham begwazán
cha hech bimm o baláhá natorsán,
chiá ke taw gón man gón ay,
tai latth o asá maná tasallá bakshit.

⁵ Dozhmenáni chammáni démá parzónagé pa man pacha kanay,
pa sharapa dayagá mani saragá théla janay o
mani jámá modám porr kanán ay.

⁶ Allamá, mehr o néki zenday sajjahén róchán mani pad o randá ant o
Hodáwanday kalátá jahmenenda bán, tán abad.

Mazanshánén bádsháh

Dáuday Zabur.

24 Zemin o áiay sajjahén hasti Hodáwandayg ant, jahán o sajjahén mahluk.

² Chiá ke Hodáwandá áiay bonyát mán daryáyá nádént o
ápáni sará óshtárént.

³ Kay cha Hodáwanday kóhá borzad shota kant?
Kay áiay pákén jágahá óshtáta kant?

⁴ Hamá ke deli sáp o dasti pák ent,
hamá ke warí arwáhá dém pa náhudagiá natarrénit o
drógén sawgenda nawárt.

⁵ Á cha Hodáwandá barkata gipt o
cha warí rakkénökén Hodáyá, adl o ensáp.

⁶ Hamé paymá ant, á mardom ke Ákubay Hodáy shoházá ant,
hamá ke pa áiay démá hodónák ant. Ósht...

⁷ Oo darwázagán! Wati sará borz bedárét.
Oo kwahnén dar o dapigán! Watá pa sháhegáni pach kanét,
tánke mazani o shánay bádsháh begwazit.

⁸ Mazani o shánay é bádsháh kay ent?
Porwák o zóráwarén Hodáwand,
Hodáwand ke jangá delér ent.

⁹ Oo darwázagán! Wati sará borz bedárét!
Oo kwahnén dar o dapigán! Watá pa sháhegáni pach kanét,
tánke mazani o shánay bádsháh begwazit.
¹⁰ Mazani o shánay é bádsháh kay ent?
Lashkaráni Hodáwand
hamá ent mazani o shánay bádsháh. Ósht...

Ráhá maná pésh bedár

Dáuday Zabur.

25 Oo Hodáwand! Man pa del o jáñ dém pa taw káyán.

Oo mani Hodá! Tai sará tawkala kanán,
mayl ke pashal o sharmendag bebán o
dozhmen mani sará báládast bebant.

³ Ji haw! Á ke tai sará óst o ométa kant
hechbar sarjahla nabit.

Á ke bé sawabá béwapáia kanant
sarjahl o sharmendaga bant.

⁴ Oo Hodáwand! Ráhá maná pésh dár o
wati keshká maná tálim day.

⁵ Dém pa wati rástiá maná rahshón bay o sabak beday,
chiá ke taw mani rakkénókén Hodá ay o
sajjahén róchá tai entezár o wadárá án.

⁶ Oo Hodáwand! Wati rahmat o mehrá yát kan,
chiá ke á cha azalá hastant.

⁷ Mani warnáiay náparmáni o gonáhán yát makan,
wati mehray kesásá maná yát kan
ke taw nék ay, oo Hodáwand!

⁸ Hodáwand nék o rást ent,
paméshká gonahkárán ráhá sója dant.

⁹ Békebr o darbéshén mardomán rástiay ráhá rahshónia dant,
wati keshká áyán pésha dárit.

¹⁰ Hamá ke Hodáwanday ahd o paymánay sará óshtant,
áiay sajjahén ráh pa áyán cha mehr o wapáyá sarréch ant.

¹¹ Oo Hodáwand! Pa wati námaygi mani gonáh o mayárán bebaksh,
chiá ke mazan ant.

¹² Kay ent hamá ke pa del Hodátors bebit?
Hodáwand áiá hamá rástén ráhá sója dant ke báyad ent gechéni bekant.

¹³ Á wati róchán pa séri o azgária gwázénit,
áiay chokk o óbádag zeminay mirás baróka bant.

¹⁴ Hodáwand wati delay ráz o ramzán góñ Hodátorsán darshána kant,
wati ahd o paymáná pa áyán pajjárénit.

¹⁵ Mani chamm modám dém pa Hodáwandá ant,
chiá ke hamá ent ke mani pádán cha dámá ázáta kant.

¹⁶ Wati démá gón man bekan o maná rahmat bebaksh,
chiá ke man békas o setam distagéné án.

¹⁷ Mani delay sakki o sóri báz ant,
maná cha paréshániá berakkén.

¹⁸ Mani ranj o sakkián bechár o
sajjahén gonáhánon bebaksh.

¹⁹ Mani dozhmenán bechár ke chinchock báz ant o
cha man chón pa kahr naprata kanant.

²⁰ Mani zendá bepahréz o berakkén,
mayl ke sharmendag bebán,
chiá ke tai báhóth o mayár án.

²¹ Tachki o rásti mani negahpán bát,
chiá ke mani omét taw ay.

²² Oo Hodá! Esráilá cha sajjahén sakki o sórián berakkén.

Oo Hodáwand! Wati dastán bégonáhiay tahá shódán

Dáuday Zabur.

26 Oo Hodáwand! Gonáhay bohtámá cha mani sará bethagalén,
chiá ke wati bémayáriay tahá gámon jatag o
bé larzagé Hodáwanday sará tawkalon kortag.

² Hodáwandá! Maná bechakkás o ázmáesh kan,
mani del o hayálá cha chakkásá begwázén.

³ Chiá ke tai mehr modám mani chammáni démá ent o
tai wapádáriay sáhegá gáma janán.

⁴ Na gón prébkárán hamdiwána bán o
na dotal o dopóstén mardománi hamráh.

⁵ Cha badkáráni hamráhiá naprata kanán o
gón radkárán hamdiwána nabán.

⁶ Oo Hodáwand! Wati dastán bégonáhiay tahá shódán o
tai korbánjháy sará chahra warán,

⁷ tán wati shogrgozáriay tawará borz kanán o
tai sajjahén ajabén káráni kessahá byárán.

⁸ Oo Hodáwand! Maná tai lóg sakk dóst ent,
tai shán o shawkatay jágah.

⁹ Mani sáhá gonahkáráni hórigá mager o
zendá gón hónigán,

¹⁰ ke gandahén pandalesh dastá ent o
rástén dastesh cha reshwatá sarréch.

¹¹ Bale man wati bémayáriay tahá gáma janán,
maná berakkén o mani sará rahm kan.

¹² Pádon tachk o sápén jágahé ér ent,
mazanén diwánán Hodáwandá názénán.

Hodáwand mani rozhn o rakkénók ent

Dáuday Zabur.

27 Hodáwand mani rozhn o rakkénók ent,
cha kayá betorsán?

Hodáwand mani zenday kalát ent,
cha kayá bimmé bebit?

² Wahdé badkár hamlaha kanant ke mani jesm o jáná bederrant o ér bebarant,
wahdé dozhmen o badwáh mani sará orosha kanant,
á wat thagala warant o kapant.

³ Bell ke lashkaré mani chágérda wati gedánán mekk bekant,
angat mani dela nalarzit,
agan jangé ham mani sará bekapit,
angat deljam án.

⁴ Cha Hodáwandá yak chizzé lóthetagon o
hameshiay pad o randá bán,
ke wati zenday sajjahén róchán
Hodáwanday lógá jahmenend bebán,
tánke Hodáwanday zébáiá begendán o
parasteshgáhá cha hamáiá rahshóni belóthán.

⁵ Chiá ke sakki o sóriáni róchá
maná wati sáhegá dárit,
wati tambuay tahá chéra dant o
taláréay sará borzá óshtárénit.

⁶ Nun dozhmenáni angerrá
sarperáza bán o
góń shádmániáni kukkárá áiay tambuay tahá korbániga kanán,
Hodáwandá pa sawt o sáza názénán.

⁷ Oo Hodáwand! Wahdé peryáta kanán mani tawárá beshkon,
mani sará rahm kan o passaw beday.

⁸ Taw gwashtag: “Mani chehragay shóházá bebay.”
Dela gwashit: “Hodáwandá! Tai chehragay shóházá án.”

⁹ Démá cha man chér maday,
wati hezmatkárá góń hezhm per matarrén,
taw ke mani madatkár butagay.

Oo mani rakkénókén Hodá!
Maná dawr maday o yalah makan.

¹⁰ Agan mát o pet ham maná yalah bekanant,
Hodáwand wat maná zurit o dasta gipt.

¹¹ Oo Hodáwand! Wati ráhá maná sój day,
dozhmenáni sawabá maná rást o tachkén ráhá rahshón bay.

¹² Pa dozhmenáni wáhágá maná yalah makan,
chiá ke drógén sháhed mani helápá pád átkagant
ke jang o chópay ásá damant.

¹³ Deljam án ke Hodáwanday nékiá
zendagénáni zeminá gendán.

¹⁴ Hodáwanday wadárá bay,
zórmand bay o delá dhaddh kan.
Haw! Hodáwanday wadárá bay.

Peryát

Dáuday Zabur.

28 Oo Hodáwand, oo mani talár! Tará tawára kanán,
cha man nádelgósh mabay.

Agan taw bétawár bebab,
hamáyáni paymá bán ke kall o kabrá kapant.

² Mani peryát o záriay tawárá gósh dár,
wahdé cha taw madata lóthán o
wati dastán dém pa tai pákén bárgáhá borza kanán.

³ Maná badkáráni hamráhiá gerrán makan o makassh,
hamá ke radén kára kanant o
gón hamsáhegán cha sohl o saláhá habará ant,
bale delesh cha sherr o shórá porr ent.

⁴ Kortagén káráni mozzáesh beday,
hamsang gón áyáni badén kárán,
dastay kortagénáni mozzáesh beday,
áyáni káráni kaddá.

⁵ Paméshká ke Hodáwanday káráni parwáhá nakanant,
áiay dazhonaray káráni háterá nadárant,
á eshán tabáha kant o
hechbar pa rost o rodómá naylit.

⁶ Hodáwandá satá bát,
chiá ke mani peryát o záriay tawári eshkotag.

⁷ Hodáwand mani zór o espar ent,
delon áiay sará tawkala kant o madaton rasetag.
Del cha shádmániá sarréch ent o
gón wati sawt o názénkán áiay shográ gerán.

⁸ Hodáwand wati mardománi zór o twán ent,
pa rógen per moshtagéná^a rakkagay kaláté.

⁹ Wati mardomán berakkén o wati kawmá barkat beday,
áyáni shopánk bay o tán abad wati kópagá bejallesh.

^a 28:8 Rógen per moshag, bezán pa bádháhiá gechén kanag.

Hodáwanday tawár zórmand ent

Dáuday Zabur.

29 Oo ásmánián! Hodáwandá satá kanét,
Hodáwanday shán o kodratá satá kanét.

² Hodáwanday námay shán o shawkatá satá kanét,
Hodáwandá mán áiay pák o palgárén drapshnákiá satá kanét.

³ Hodáwanday tawár ápáni sarborá ent,
shán o shawkatay Hodá grandit,
Hodáwand porzórén ápáni sarborá grandit.

⁴ Hodáwanday tawár zórmand ent,
Hodáwanday tawár drapshnák ent.

⁵ Hodáwanday tawár gazzána próshit,
Hodáwand Lobnánay gazzána próshit.

⁶ Á Lobnáná gwaskéay^a paymá jáha serrénit,
Siryuná^b jalabén gókéay^c paymá.

⁷ Hodáwanday tawár grand o grókén áchesh rawána kant.

⁸ Hodáwanday tawár gyábáná larzénit,
Hodáwand Kádeshay gyábáná larzénit.

⁹ Hodáwanday tawár áposén áskána géjénit^d o
jangalá bé lamb o téka kant.

Áiay parasteshgáhá sajjahén gwánka janant: “Shawkat o shán!”

¹⁰ Hodáwand hár o tuppánay sarborá, wati tahtay sará neshtag,
Hodáwand tán abad wati bádsháhi tahtay sará neshtag.

¹¹ Hodáwand wati kawmá wák o kodrat bebakshát,
Hodáwand wati kawmá gón sohl o émeni barkat bedayát.

Mótkay badal nách o sohbat

Dáuday Zabur. Pa mazanén parasteshgáhay wapkáe sawté.

30 Oo Hodáwand! Tará shán o shawkata dayán,
chiá ke taw maná cha johlánkián chest kort o
naeshtet dozhmen mani sará shádehi bekanant.

² Oo Hodáwand, mani Hodá! Tai gwará pa komaká peryáton kort o
taw maná cha nájórhiá dráh kort,

³ mani arwáh cha mordagáni jaháná dar áwort o
cha áyáni nyámá ke kall o kabr butant zendag kort.

⁴ Oo Hodáwanday dóstdárán! Pa Hodáwandá názénk bejanét,
áiay pák o palgárén námay shográ begerét.

^a 29:6 Gwask, bezán góló, gókay chokk. ^b 29:6 Siryun, Hermónay kóhay dega námé. ^c 29:6 Jalabén gók, bezán warnáén narén góké ke pa kárá rám kanag nabutag. ^d 29:9 Yá: Hodáwanday tawár mazanén drachkána torrénit.

^e 30:0 Wapk, bezán chizzé ke pa Hodáyá gisshénaga bit.

⁵ Chiá ke hezhmi damáné o
mehr o rahmati omray drájiá.
Bit ke sajjahén shapé pa gréwag begwazit,
bale bámgwáhá shádehi wati chehragá záhera kant.

⁶ Man wati ásudagiay wahdá gwasht:
“Hechbar larzénaga nabán.”

⁷ Oo Hodáwand! Taw maná cha wati mehr o rahmatá
mohréni kóhéay paymá óshtáréntagat,
bale wahdé wati démet cha man tarrént,
torseton.

⁸ Oo Hodáwand! Tará tawáron jat,
tai gwará zári o peryáton borz kort:

⁹ “Mani marká che sutté mán o
kabray tahá mani ér rawagá chónén páedagé?
Záná, hák tará satá dant?
Jára jant ke taw wapádár ay?

¹⁰ Oo Hodáwand! Beshkon o mani sará mehrabán bay.
Hodáwandá! Mani madat kanók bay.”

¹¹ Taw mani mótk nách o sohbaté kort,
sugi god o póshák dar kort o
maná góón shádmániá póshént,
¹² tánke mani arwáh tará satá bedant o bétawár mabit.
Oo Hodáwand, mani Hodá! Tán abad tai shográ gerán.

Tai mayár o báhóth án

Pa sázger o washáwázáni sálárá. Dáuday Zabur.

31 Oo Hodáwand! Tai mayár o báhóth butagán,
hechbar mayl ke sharmendag bebán,
wati adl o ensápay tahá maná neját beday.
² Wati delgóshá góón man bedár o
maná zutt berakkén.
Pa man panáhay taláré bay o
pa mani rakkénagá mohréni kaláté.

³ Pa rásti mani talár o kalát ay,
pa wati námaygi maná ráh sója dayay o rahshónia kanay.

⁴ Maná cha á dámá dar byár ke pa man chér o andém ent,
chiá ke mani panáh taw ay.

⁵ Wati ruh o sáhá tai dastá dayán.
Oo Hodáwand, oo wapádárén Hodá! Taw maná rakkénay.

⁶ Tará cha áyán naprat ent ke delgóshesh góón bárezeshén botán ent,
bale man tai sará tawkala kanán, oo Hodáwand!

⁷ Tai mehrá gala bán o shádehia kanán,
chiá ke taw mani syahróchi distagant o
mani arwáhay sakkiáni némagá hayál gwar kortag.

⁸ Maná dozhmenáni dastá nadayay o
mani pádán práh o shágánén jágahé éra kanay.

⁹ Oo Hodáwand! Mani sará rahm kan
chiá ke paréshán án,
chammon cha gam o andohán nezór butagant,
jesm o arwáh ham.

¹⁰ Chiá ke zendon gamán wártag o
omr nálagán,
cha mani gonáhá,^a tágaté pa man pasht nakaptag o
haddh o bandon pussán ant.

¹¹ Dozhmenáni sawabá sobakk o kalági butagán,
hás pa hamsáhegán,
pajjárók cha man torsán ant o
harkas maná kuchah o damkána gendit, tachit.

¹² Mordagáni warhá cha yátá shotagán o
proshtagén kunzagéay paymá butagán.

¹³ Chiá ke bázénéay bohtámán eshkonagá án,
tors o dehshat cha har gwará,
góón yakdegará pandala jórhenant o
pa mani koshagá mandr o repka sázant.

¹⁴ Bale oo Hodáwand! Man tai sará tawkala kanán o
gwashán ke “taw mani Hodá ay.”

¹⁵ Mani wahd o damán tai dastá ant,
maná cha dozhmenán berakkén,
cha hamáyán ke mani randá kaptagant.

¹⁶ Démá pa wati hezmatkárá drapshán kan,
góón wati mehrá maná berakkén.

¹⁷ Hodáwandá! Mayl ke sharmendag bebán,
chiá ke tará tawáron per jatag,
bell ke sharur sarjahl o sharmendag bebant o
mordagáni jaháná bétawár.

¹⁸ Drógbandén lonthesh chopp bátant,
ke góón kebr o ér janag pahrézkáráni helápá pa gorunáki habara kanant.

¹⁹ Tai néki chenkadar báz ent,
ke pa Hodátorsán ambáret kortag o
bani ádamáni chammáni démá pa hamáyán purah o sarjam kortag
ke tai báhótha bant.

²⁰ Eshán wati bárgáhay panáhá
cha mardománi pandalán chér o andéma dáray o
wati sáhegá cha bohtám janókén zobánán dur.

^a 31:10 Yá: cha mani syahróchiá.

²¹ Hodáwandá satá bát,
chiá ke wati ajabén mehrá hamé wahdá pa man paddara kant
ke man dawrah butagén shahréay paymá angerr án.

²² Man cha wati torsá gwasht:
“Cha tai chammá sestag o dur kaptagán.”
Angat taw mani peryát o záriá eshkonay,
wahdé man pa madatá tará tawára kanán.

²³ Oo Hodáwanday sajjahén dóstdárán! Áiá dóst bedárét,
Hodáwand wati wapádáráni negahpániá kant,
bale gorunákénán báz sezá dant.

²⁴ Oo sajjahénán ke Hodáwanday wadárá ét!
Porzór bebét o delá dhaddh kanét.

Bahtáwar hamá ent ke gonáhi bakshag butagant

Dáuday shayri gwashtánk.

32 Bahtáwar hamá ent ke Hodáwand cha áiay násharián sar gwastag o
gonáhi bakshag butagant.

² Bahtáwar hamá ent ke Hodáwand áiay gonáhá hechbar hesába nayárit o
áiay arwáhá prébé mán nést.

³ Wahdé chopp o bétawár atán
haddh o bandon pussán atant,
cha sajjahén róchay zári o peryátán.

⁴ Chiá ke róch o shap tai dast mani sará sangin at,
sajjahén tágaton hoshagá at, chó ke garmágay taptay chérá bebán. Ósht...

⁵ Gorhá wati gonáhon tai dargáhá mannet o
wati náparmániánon chér nadát.
Gwashton: “Wati gonáh o sarkashián Hodáwanday gwará mannán” o
taw mani gonáhay mayárbári bakshet. Ósht...

⁶ Paméshká, tán wahd o móh ent,
har Hodádóst tai gwará dwá bekant,
wahdé hárén áp chesta bant,
hech paymá pa áiá sar buta nakanant.

⁷ Taw mani chér bayagay jágah ay,
cha sakki o tangián maná émena dáray o
góń ázátiay sawt o zémelán gwarambáza kanay. Ósht...

⁸ Hodáwanda gwashit: “Tará hamá ráhá sója dayán ke báyad ent beraway,
tará shawr o saláha dayán o
tará chárána bán.

⁹ Násarpadén asp yá kacharay^a paymá mabay,

^a 32:9 Kachar, bezán kátel, katel, har o aspay chokk.

ke tahná gón lagám o mahárá rám kanaga bit,
agan na, tai nazziká nayayt.”

¹⁰ Badkárav ranj o azáb báz ant,
bale Hodáwanday mehr hamáiay chapp o chágérdá gipt
ke Hodáwanday sará tawkala kant.

¹¹ Oo pahrézkárán! Hodáwanday bárgáhá shádehi kanét o shádán bebét.
Oo sajjahén nékdelán! Shádehiay gwánká borz kanét.

Hodáwandá adl o rásti dósta bit

33 Oo pahrézkárán! Hodáwanday bárgáhá pa shádehi kukkár kanét,
nékdelán, Hodáwanday satá kanag zéba dant.

² Hodáwandá gón chang benázénét,
gón dahtárén changá pa áiá sáz bejanét.

³ Pa áiá, nökén sawté byárét,
gón washpanjagi simmán belarzénét o pa shádehi gwánk janét.

⁴ Chiá ke Hodáay habar tachk o rást ent o
áiay sajjahén kár gón wapádáriá.

⁵ Áiá adl o rásti dósta bit,
zemin cha áiay mehrá porr ent.

⁶ Gón Hodáwanday gál o habará ásmán addh butagant o
áyáni sajjahén lashkar, gón áiay dapay damá.

⁷ Daryáay ápán mocch o hákótha kant o
johlián mán ambárá.

⁸ Sajjahén zemin cha Hodáwandá betorsit,
jahánay sajjahén mardom áiá ezzat bedayant.

⁹ Chiá ke áiá gwasht o hamá chizz paym but,
parmáni dát o barjáh dárag but.

¹⁰ Hodáwand, kawmáni shawrbandián pacha réchit o
rájáni kársáziána karójit.

¹¹ Bale Hodáwanday shawr o saláh abadmán ant,
áiay delay shawrbandi pa sajjahén nasl o padréchán.

¹² Bahtáwar hamá kawm ent ke Hodáwand áiay Hodá ent,
hamá mardom ke áiá pa warí mirásá gechén kortagant.

¹³ Hodáwand cha ásmáná jahláda chárít o
sajjahén bani ádamána gendit,

¹⁴ cha warí bádsháhi tahtá
zeminay sajjahén jahmenendána chárít,

¹⁵ á ke é sajjahénáni deli jórh kortag o
áyáni har kár o kerdá zánt.

¹⁶ Bádsháhá, warí lashkaray mazani nejáta nadant o
sarmachárá, warí básk o panjagáni zór.

¹⁷ Pa sóbén bayagá, aspay sará omét bandag náhudag ent,
toré zóráwar bebit bale rakkénta nakant.

¹⁸ Haw! Hodáwanday chamm gón hamáyán ent ke cha áiá torsant,
gón hamáyán ke óst o ométesh áiay mehr ent,

¹⁹ tánke áyáni arwáhá cha marká berakkénit o
mán dhokkálá^a zendagesh bedárit.

²⁰ May arwáh Hodáwanday wadárá ent,
hamá may komak o espar ent.

²¹ May del áiay bárgáhá shádmánia kant,
chiá ke may tawkal hamáiay pákén námay sará ent.

²² Oo Hodáwand! Tai mehr may sará sáhél bát,
hamá dábá ke ométen pa taw bastag.

Hodáwanday nékiá bechashét

*Dáuday Zabur. Hamá wahdá ke áiá Abimelekay kerrá watá ganókáni
paymá kort, cha ódá dar kanag but o wati ráhá shot.*

34 Dáemá Hodáwandá názénán
áiay satá o saná modám mani dapá ent.

² Mani arwáh Hodáwanday sará pahra kant,
békebrén mardom beshkonant o shádehi bekanant.

³ Gón man hórigá Hodáwandá mazani bedayét,
byáét ke hawáriá áiay námá názénén.

⁴ Hodáwandon shóház kort o maná passawi dát,
cha mani sajjahén torsán maná ázáti kort.

⁵ Á ke chammesh gón áiá ent drapshán ant,
áyáni dém hechbar sharmsára nabit.

⁶ É meskiná tawár per jat,
Hodáwandá áiay tawár eshkot o
cha sajjahén sakkián rakkénti.

⁷ Hodáwanday préshtag Hodátorsáni chapp o chágerdá pallé bandit o
áyán nejáta dant.

⁸ Bechashét o bechárét ke Hodáwand nék ent,
bahtáwar hamá ent ke áiay mayár o báhótha bit.

⁹ Oo Hodáwanday palgártagénán! Cha Hodáwandá betorsét,
chiá ke Hodátorsán hech kammié nést.

¹⁰ Warnáén shér mohtáj o shodiga bant,
bale Hodáwanday shóház kanókán cha nékiá hech kammié nést.

¹¹ Oo chokkán! Byáét o cha man beshkonét,
man shomará sabaka dayán ke Hodáwandá chón bemannét.

^a 33:19 Dhokkál, bezán kaht, hoshksáli.

¹² Cha shomá kay pa zendá hodónák ent o
wasshén rócháni gendagay lóthók?

¹³ Wati zobáná cha badiá dur bedár o
lonthán cha drógá.

¹⁴ Cha badiá per tarr o néki kan,
sohl o émeniay shoházá bebay o hameshiay randá bekap.

¹⁵ Hodáwanday chamm gón pahrézkárán ent o
góshi ham pa áyáni peryátán pach.

¹⁶ Hodáwanday dém badkáráni helápá ent,
tán áyáni yátá cha jaháná beborrit o gomsár bekant.

¹⁷ Wahdé pahrézkár peryáta kanant, Hodáwanda eshkont o
áyán cha sajjahén sakkiána rakkénit.

¹⁸ Hodáwand gón proshtadelán nazzik ent o
droshtaruhán rakkénit.

¹⁹ Pahrézkárá bázén sakki o sória rasit,
bale Hodáwand áiá cha sajjahén sakkiána rakkénit.

²⁰ Áiay sajjahén haddhán mohra dárit,
cha áyán yakké ham próshaga nabit.

²¹ Badi badkárá koshit o
hamá ke cha pahrézkárá naprata kant, mayárbára bit.

²² Hodáwand wati hezmatkáráni zendá rakkénit,
harkas ke áiay báhótha bit, mayárbára nabit.

Oo Hodáwand! Pa mani hakká jang kan

Dáuday Zabur.

35 Oo Hodáwand! Gón hamáyán bemerh ke gón mana merhant o
gón hamáyán jang kan ke gón man janga kanant.

² Wati kasán o mazanén esparán bezur o
mani madatá jáh bejan.

³ Pa áyán ke mani randá kaptagant
wati nayzahá chest kan o áyáni ráhá band.
Mani arwáhá begwash:
“Tai rakkénók man án!”

⁴ Á ke mani zunday tabáhiay randá ant,
roswá o sharmendag bátant.

á ke pa mani táwáná pandala jórhenant,
poshtá bekenzát o pashal bátant.

⁵ Chosh ke pog o palár gwátay démá,
Hodáwanday préshtag áyán betáchénát.

⁶ Ráhesh tahárók o lakoshánk bát o
Hodáwanday préshtag áyáni padá bekapát,

⁷ chiá ke mopt o náhakká pa man dámesh chér gétkag o
pa mani arwáhá kallesh kótkag.

⁸ Anágat tabáhiesh chakká kapát o
wati chér gétkagén dámá kapánt,
kapát o gár o gomsár bátant.

⁹ Gorhá mani arwáh Hodáwanday bárgáhá shádehia kant o
pa warí rakkagá lezzata bárt.

¹⁰ Á wahdá har band o bógon gwánka jant:

“Oo Hodáwand! Tai mathh kay ent?

Taw nézgárá cha zóráwarteréná rakkénay o
nezór o hájatmandá cha pol o páñch kanóká.”

¹¹ Badwáh o bérahmén sháhed jáha janant o
hamá mayárán maná laddhant ke cha áyán sahig naán.

¹² Nékiay badalá gón man badia kanant o
mani arwáh gamig o porsig ent.

¹³ Bale wahdé á nádráh atant,
man sugi god o póshák gwará kort o
jesm o jáñ gón róchag dáragá ranjént.

Wahdé mani dwá bépassaw mantant

¹⁴ gréwán bután,
hamá dábá ke pa dóst yá brátéá gamiga bant,
sar jahl o mótk árán bután,
hamá dábá ke pa mátá zára janant.

¹⁵ Bale wahdé thagalon wárt past o lagór gón mazanén shádehié mocch butant,
mani helápá wahdé man sahig naatán,
á maná derrán atant o bassesha nakort.

¹⁶ Chó Hodánábáwarán, áyán warí maskará gésh kanána kort o
pa man dantánesha drosh.

¹⁷ Oo Hodáwand! Tán kadéna nenday o chárav?
Mani arwáhá cha áyáni setamá berakkén,
mani yakkén zendá cha shéráni dapá.

¹⁸ Gorhá mazanén diwáná tai shográ gerán,
mardománi mazanén mocchiá tará satá kanán.

¹⁹ Mayl ke prébkárén dozhmen
mani sará shádehi kanant,
mayl hamá ke mopt o náhakká cha man bázár ant
chammok o pónzok bekanant.

²⁰ Chiá ke pa sohl o émeni habara nakanant,
pa á mardomán ke molká áram o békák neshtagant
pormakréen habar payma kanant.

²¹ Dapá pa man pacha réchant o gwashant: “Hah, hah, hah!
Gón warí chammánen distag!”

²² Oo Hodáwand! Taw é distag, chopp o bétawár mabay.
Hodáwandá! Cha man dur mabay.

²³ Ágáh bay o pa mani dádrasiá jáh bejan.

Oo mani Hodá, oo mani Hodáwand! Pa mani hakká.

²⁴ Oo mani Hodáwandén Hodá! Pa wati adlaygi gonáhay bohtámá cha man thagalén, mayl á mani sará shádehi bekanant.

²⁵ Mayl wati delá begwashant: “Hah, hah, hah! Pa wati armáná rasetén.”
Mayl begwashant: “Lonkahé kort o éren bort.”

²⁶ Harkas ke mani mosibatáni sará shádehia kant
sharmendag o sarjahl bát,
á ke watá cha man borztera kanant
góń sharm o bésharapi póshénag bátant.

²⁷ Á ke wáhagesh mani bémayári ent
shádmán bátant o shádehiay gwánká borz kanánt,
modám begwashátant: “Hodáwand mazan ent
ke cha wati hezmatkáray salámatiá gala bit.”
²⁸ Gorhá zobánon sajjahén róchá tai adlá gwánka jant,
tai satá o sanáyá.

Hodáay mehr chenkadar porarzesh ent

Pa sázger o washáwázáni sálárá. Hodáwanday hezmatkár Dáuday Zabur.

36 Gonáh, badkárá mán áiay delay johlánkiá gwánka jant,
áiay chammán Hodátori nést.

² Chiá ke á wati jenday delá haminchok wati tawsipá kant,
ke wati gonáhá nazánt o cha áiá naprat korta nakant.

³ Dapay habari badi o préb ent,
cha aglmandi o nékkáriá dasti shoshtag.

⁴ Tantaná wati gandal o bestará pandala sázit,
gonahkáriay ráhi geptag o
badiá yalaha nakant.

⁵ Oo Hodáwand! Tai mehr arshá rasit o
wapádári tán jambarán.

⁶ Tai adl o rásti borzterén kóháni dhawlá ent o
ensáp, mazanén johlánkiáni.
Oo Hodáwand! Taw ay ke ensán o haywánay rakkénók ay.

⁷ Oo Hodá! Tai mehr chenkadar porarzesh ent,
bani ádam tai báñzoláni sáhegá panáha gipt.

⁸ Á cha tai bárgáhay sarréchén nyámatán séra bant o
cha wati lezzatáni kawrá áyán sérápa kanay.

⁹ Chiá ke zendmánay sarchammag taw ay o
cha tai nurá ent ke nura gendén.

¹⁰ Pa wati dóstdárán wati mehrá modám barjáh dár o
adl o rástiá pa nékdelán.

¹¹ Porkebráni pád mani sará ér mabát,
badkáráni dast maná sargardán makanát.

¹² Bechár badkár che paymá kaptagant,
háká sarshakun o pád átka nakanant.

Radkáráni sará hasadd makan

Dáuday Zabur.

37 Badkáráni sawabá jósh majan o
radkáráni sará hasadd makan.

² Chiá ke é káhay paymá zutta gimmerant o
sabzagáni paymá hoshka tarrant.

³ Hodáay sará tawkal kan o nékiay ráhá ger,
wati moltká jahmenend bay o
wapádáriay randgir.

⁴ Cha Hodáwandá shádmán bay
ke á tai delay morádá puraha kant.

⁵ Wati zendmánay ráhá Hodáwanday sepordag kan o
áiay sará tawkal,
ke kársáz hamá ent.

⁶ Á tai bémayáriá nuray paymá róshena kant o
dádrasiá chó bámgwáhay rozhnáiá drapshán.

⁷ Hodáwanday bárgáhá árám bay o
gópáré^a áiay wadará.
Áyáni sawabá jósh majan ke wati ráhá kámrán ant o
áyáni sawabá ham ke palitén pandalán kára bandant.

⁸ Cha hezhmá dur bay o gazabá yalah kan.
Jósh majan ke tará dém pa badkáriá bárt.

⁹ Chiá ke badkár goddhaga bant,
bale á ke Hodáwanday wadará ant moltká mirása barant.

¹⁰ Kammoké wahdá rand badkára namánit,
shomá áiá sakk báz shoháza kanét bale nagendéti.

¹¹ Narmdel moltká mirása barant o
cha wasshén sohl o émeniá shádkámia kanant.

¹² Badkár pahrézkáray helápá pandala sáxit o
pa áiá dantána droshit,

¹³ bale Hodáwand badkáray sará kandit,
chiá ke zánt áiay rócha kayt.

¹⁴ Badkár wati zahmá cha nyámá dara kanant o kamáná kasshant,
tán nezór o hájatmandán chér betarrénant o

^a 37:7 Ópár, bezán sabr, tahambol, bardásht.

nékdelán tégáni dapá bedayant.

¹⁵ Bale áyáni zahm, wati jenday delá nendit o kamánesha proshant.

¹⁶ Pahrézkárav kammén hasti
cha bázén badkáráni hastiá gehter ent.

¹⁷ Chiá ke badkáráni báskay zóra proshit,
bale Hodáwand pahrézkáráni madat kanók ent.

¹⁸ Hodáwand bégonáháni rócháni negahpán ent o
mirásesh namirána bit.

¹⁹ Baláh o mosibatáni wahdá bazzag o sharmendaga nabant o
kahti o dhokkálay róchán sér o ábáda bant.

²⁰ Bale badkár gára bant,
Hodáwanday dozhmen charágáhay sabzagáni paymá gár.
Haw! Zyána bant, duttay paymá zyán.

²¹ Badkár wáma kant o padá nadant,
bale pahrézkár pa daspachia bakshit.

²² Allamá, áyán ke Hodáwand barkata dant molká mirása barant,
bale áyán ke nálata kant, gár o bégwáha bant.

²³ Hodáwand hamáiay gámán mohra kant
ke Hodáwanday ráhá shádehia kant.

²⁴ Toré bethagalit, zeminá nakapit,
chiá ke Hodáwand áiay negahpán ent.

²⁵ Warná atán o nun pir án,
bale choshén pahrézkáré nadiston ke Hodáwandá yalah kortag
yá ke chokki pa nánéá gadá butagant.

²⁶ Modám daspach ent o pa ásáni wáma dant,
chokki barkata kárant.

²⁷ Cha badiá démá chahr day o néki kan,
gorhá tán abad molká jahmenenda bay.

²⁸ Chiá ke Hodáwandá adl dóst ent o
wati dóstdárán yalahá nakant.

Hodáwand tán abad pahrézkáráni posht o panáh ent,
bale badkáráni nasl goddhaga bit.

²⁹ Pahrézkár molká mirása barant o
tán abad hamódá jahmenenda bant.

³⁰ Pahrézkárav dap hekmat tálána kant o
zobáni adl.

³¹ Hodáwanday Sharyat áiay delá ent o
pádia nalakoshant.

³² Badkár, pa pahrézkárá kamina kant o
áiay kóshay randá ent.

³³ Bale Hodáwand áiá badkárav zórav tahá naperrénit o
wahdé hakdiwáná baraga bit, pa mayárbáriá nayliti.

³⁴ Hodáwanday wadará bay o hamáiy ráhá bósht,
ke tará pa molkay mirás baragá sarperáza kant,
wata genday ke badkár chón goddhaga bant.

³⁵ Badkár o bérahmén mardé diston ke
sarsabzén drachkéay paymá wati jáhá shádáb at,

³⁶ bale namant o zutt mort,
harché shóházon kort, gendag nabut.

³⁷ Béaybén mardá begend o nékdelá bechár,
chiá ke sohl o émeniay shóház kanóká ákebaté hast,

³⁸ bale sajjahén sarkash gár o gomsára bant,
badkár goddhaga bant o áyán ákebaté nést.

³⁹ Pahrézkáráni rakkénók Hodáwand ent o
sakkiay wahdá áyáni kalát.

⁴⁰ Hodáwand áyán madata dant o rakkénit,
cha badkáráni dastá rakkénit o nejáta dant,
chiá ke áiay mayár o báhóth ant.

Oo Hodáwand! Maná yalah makan

Dáuday Zabur. Dazbandié.

38 Oo Hodáwand! Maná gón wati hezhmá hakkal maday o gón wati gazabá neherr.

² Chiá ke tai tirán mani ján soptag o
tai dastay zór mani sará kaptag.

³ Cha tai gazabá mani jesm o jána hech dráhié pasht nakaptag o
cha gonáhá, mán haddhán ham salámatié.

⁴ Mani mayárbári cha sará sar gwastag,
gránén báréay paymá cha tágatá gésh ent.

⁵ Cha mani ahmakiá
thappon bó geptag o bazhnák ant.

⁶ Purah komp o dotal án,
sajjahén róchá mátam kanáná gardán.

⁷ Sréná sóchnákén dardé tawrénagá ent o
jesmá dráhié nést.

⁸ Man ájez án o droshag butagán,
cha delay áshópá nálán.

⁹ Oo Hodáwand! Mani sajjahén armán tai démá ant,
áhsard o ginsárton cha taw chér naant.

¹⁰ Delon mán sénagá kop koppá ent,
wák o twánon dar shotag,
chammáni rozhnái ham gár ent.

¹¹ Dóst o hambalon thappáni sawabá cha man watá kerré dárant o
nazzikén ham dur óshtátagant.

¹² Á ke mani kóshay randá ant, dám chéra kanant,
badwáh mani gomsár kanagay habará kanant o
sajjahén róchá pandala sázant.

¹³ Bale man karréay paymá án ke naeshkont o
gongéay paymá ke bétawár ent.

¹⁴ Pa rásti man anchén mardoméay dhawlá án ke naeshkont o
dapá passawé nésti.

¹⁵ Oo Hodáwand! Pa taigi ent ke wadárá án.
Oo Hodáwand, mani Hodá! É taw ay ke passawa dayay.

¹⁶ Chiá ke gwashton: “Wahdé pádona larzit,
hamá mardomán mani sará shádehi kanagá mayl
ke watá cha man mastera zánant.”

¹⁷ Chiá ke kapagi án o
mani dard modám gón man gón ent.

¹⁸ Wati mayárbáriá mannán o
cha wati gonáhá sakk padard án.

¹⁹ Sarzór o salámat ant, á ke mani dozhmen ant,
bázéné bé sawabá cha man naprata kant.

²⁰ Á ke nékiay badalá gón man badia kanant,
mani dozhmen o bohtám janók ant, chiá ke man nékiay randá án.

²¹ Oo Hodáwand! Maná yalah makan.
Oo mani Hodá! Cha man dur mabay.

²² Oo Hodáwand, mani rakkénók!
Pa mani madatá eshtáp kan.

Mani rócháni hesáb chi ent?

Pa sázger o washázáni sálárá. Pa Yedutuná.^a Dáuday Zabur.

39 Gwashton ke “pahréza kanán
tán gón wati zobáná gonáh makanán.

Tán wahdé badkáré mani kerrá ent
wati dapá lagáma kanán.”

² Chopp o bétawár bután, tantaná sharrén habaré ham nakorton,
bale dard o andóhon géshter butant.

³ Delon mán daruná jósh janagá ent.

^a 39:0 Yedutun cha mazanén parasteshgáhay washázán yakké at.

Wahdé géshter pegrона kort, ásá shamálaha^a kasshet,
gorhá zobánon pach but.

⁴ “Oo Hodáwand! Mani ákebatá paddar kan,
mani rócháni hesáb chi ent,
bell tán bezánán ke chón zutta gwazant.

⁵ Taw mani zend bechilléay kaddá kortag,
mani zendmánay sál, tai chammá hecch naant.
Saddak án ke ensánay zend yak sáhé gésh naent.” Ósht...

⁶ Béshakk ensán chó sáhegéá chakkarit,
béshakk ke á mopt o náhudagá tach o tága kant,
mocch o ambára kant, bale nazánt ke kayá rasant.

⁷ “Bale nun oo Hodáwand! Man che chizzay wadará án?
Ométon tai sará ent.

⁸ Maná cha sajjahén náparmánián chotthén o
ahmakáni kalági makan.

⁹ Bétawár án o dapá pacha nakanán,
chiá ke é taw kortag.

¹⁰ Wati zarbatá cha mani sará dur kan,
ke cha tai shahmátá tostag o kaptagán.

¹¹ Taw pa hakkal ensáná cha gonáhá adaba dayay o
áiay dósténán hamá paymá kanay ke raméz o waróka kant.
Saddak án ke ensánay zend sáh o damé gésh naent. Ósht...

¹² “Oo Hodáwand! Mani dwáyá beshkon o
pa komaká mani peryátay némagá delgósh kan,
arsánon mashamósh o bétawár mabay.

Chiá ke tai gwará mehmánéay paymá án,
darámadé, wati pet o pirénáni dhawlá.

¹³ Wati gazabá cha man dur kan,
tán cha jahánay yalah kanagá pésar padá gal bebán.”

Hodáwandá nökén sawté mani dapá dát

Pa sázger o washázáni sálárá. Dáuday Zabur.

40 Gón sabré pa Hodáwandá wadáron kort,
démi gón man tarrént o mani peryáti eshkot.

² Maná cha johlánkén kalléá dar áworti,
cha gel o gandápá,
mani pádi taláréay sará óshtárént o
gámi mohr kortant.

³ Nökén sawté mani dapá dáti,
may Hodáay satá o sanáay shayr.
Bázéné gendit o mannit o

^a 39:3 Shamálah, bezán ásay zobánok.

Hodáwanday sará tawkala kant.

⁴ Bahtáwar hamá ent ke Hodáwanday sará tawkala kant o
démá gón porkebrénána nakant,
gón hamáyán ke drógén hodáyáni randgiriá gomráh ant.

⁵ Oo Hodáwand, oo mani Hodá!
Taw pa má bázén ajabén kár o shawré kortag,
hechkas tai matth buta nakant.

Agan belóthán tai káráni bárawá jár bejanán o habar bekanán,
haminchok báz ant ke cha hesábá dar ant.

⁶ Tará pa hayrát o korbánigá hájaté nést,
bale mani góshet pach kortag,
sóchagi korbánig o gonáháni korbániget nalóthetag.

⁷ Gorhá gwashton: “Man átkag o tayár án,
mani bárawá ketábay tumará^a nebisag butag.

⁸ Oo mani Hodá! Armánon tai lóth o wáhagay sarjam kanag ent,
tai Sharyat mani delá ent.”

⁹ Rakkénag o nejátay wasshén hálón mazanén diwáná jár jatag.
Oo Hodáwand! Hamá dhawlá ke taw zánay man watí dap lagám najatag.

¹⁰ Tai rakkénökén madaton watí delá chér nadátag,
tai wapádári o nejátbakshiay bárawá habaron kortag o
cha mazanén diwáná tai mehr o wapáon napóshéntag.

¹¹ Oo Hodáwand! Maná cha watí rahmatá zebahr^b makan,
tai mehr o wapá tán abad maná émen bedárát.

¹² Chiá ke béhesábén sakkián maná angerr kortag,
mayárbárián maná geptag o dista nakanán,
cha mani saray mudán gésh ant,
mani del kaptag.

¹³ Oo Hodáwand! Mehrabáni kan o maná berakkén.
Hodáwandá! Zutt pa mani madatá byá.

¹⁴ Á sajjahén ke mani kóshay randá ant o mani marká lóthant
sarjahl o sharmsár bátant,
á ke mani syahróchiay padá ant
poshtá berawát o rosuwá bátant.

¹⁵ Á ke mani sará “hah, haha” kanant
watí sarjahliá hayrán o habakkah bátant.

¹⁶ Bale á ke tai shóházá ant
sajjahén tai bárgáhá shádehi kanát o gal o bál bátant,
á ke tai rakkénökén madatesh dóst ent,
modám begwashátant: “Hodáwand mazan ent.”

¹⁷ Man garib o hájatmand án,

^a 40:7 Tumár hamá ketábána gwashant ke kwahnén zamánagá kágad yá póstáni sará nebisag o gerd gerdá patáyag butagant. ^b 40:11 Zebahr, bezán bébahr.

Hodáwandá mani hayál gwar bát.
Taw mani komak o rakkénók ay.
Oo mani Hodá! Dér makan.

Oo Hodáwand! Mani sará rahm kan

Pa sázger o washáwázáni sálárá. Dáuday Zabur.

41 Bahtáwar hamá ent ke garib o bazzagáni hayálá ent,
Hodáwand áiá baláh o mosibatáni róchá rakkénit.

² Hodáwand áiay negahpániá kant o zendaga dárit,
á, molkay tahá bahtáwara bit.
Taw áiá dozhmenáni wáhagáni sará yalahá nakanay.
³ Hodáwand áiá nádráhiay wahdá zór o wáka dant,
cha nájórhi o kamzórián áiá dráha kant.

⁴ Man gwasht: “Oo Hodáwand! Mani sará rahm kan,
maná dráh kan ke tai gonahkár án.”

⁵ Dozhmen pa badwáhi mani bárawá gwashant:
“Kadéna merit o námi gára bit?”

⁶ Wahdé cha áyán yakké mani didárá kayt
dozobáni habara kant o
delá badia ródénit,
dhanná ke dara kapit, wati delay habará kant.

⁷ Sajjahén dozhmen mani helápá halwat o soksoka kanant o
pa mani tágán dayagá pandala sázant.

⁸ Gwashant: “Sellén nádráhiéá geptag,
cha waptagén jáhá hechbar pád átka nakant.”

⁹ Tantaná mani nazzikén dóst ke cha áiá deljam atán,
hamá ke góñ man hamkásag at,
áiá ham maná dróhetag.^a

¹⁰ Bale taw, oo Hodáwand! Mani sará rahm kan,
maná pád kan tán wati jostánesh bekanán.

¹¹ Cha eshiá zánán ke cha man washnód ay,
ke dozhmen mani sará báládast nabutagant.

¹² Cha mani tachki o rástiá, taw mani posht o panáh butagay o
modám wati bárgáhá jágaha dayay.

¹³ Hodáwandá satá bát, Esráilay Hodáyá,
cha azal tán abad.
Anchosh bát. Ámin.

^a 41:9 Dróhag, bezán pa repk rad dayag. Arabi o Pársiá “khiánat”.

Zaburay domi ketáb

Zabur 42—72

Oo mani arwáh! Chiá paréshán ay?

Pa sázger o washawázáni sálárá. Kórahay chokkáni shayri gwashtánk.

42 Áskay paymá ke pa kawray ápán zahirwár ent,
hamé paymá, oo mani Hodá, mani arwáh tai zahirán ent.

² Mani arwáh pa Hodáyá tonnig ent,
pa zend bakshókén Hodáyá,
ke bárén kadi Hodáay bárgáhá rawán o áiay démá záhera bán?

³ Shap o róch warákon ars ent,
Wahdé mardom modám maná gwashant:
“Tai Hodá kojá ent?”

⁴ Wahdé wati delay dardán darshána kanán,
hayálá kapán ke che paymá mazanén mocchiay hamráh atán,
jashnay mazanén mocchiay o
gón shádehiay kukkár o shogrgozáriay sawtán
dém pa Hodáay lógá áyáni rahshón atán.

⁵ Oo mani arwáh! Chiá gimmortagay?
Chiá mani del o daruná paréshán ay?
Óst o omét Hodáay sará bekan,
chiá ke nóksará hamáiá názénán,
wati rakkénók o
⁶ wati Hodáyá.

Mani daruná arwáh gimmortag
paméshká tará cha Ordonay sardhágá^a o Hermónay kóhá yáta kanán,
cha Misáray kóhá.

⁷ Tai mazanén ápsháráni grandá,
johlánki, johlánkiá gwánka jant,
tai sajjahén chawl o mawj,
mani sará proshtagant.

⁸ Róchá, Hodáwand wati mehrá déma dant o
shapá sawt o zémeli gón man ent,
dwáé dém pa wati zend bakshókén Hodáyá.

⁹ Gón Hodáyá ke mani talár ent gwashán:
“Chiá maná shamoshtaget?
Chiá cha dozhmenay ázará
mótk byárán?”
¹⁰ Dozhmenáni shegánán, mani haddh hurt kortagant,

^a 42:6 Ordonay sardhágáray máná maróchigén Ordonay molk naent, Ordonay kawr o darag ent.

chiá ke sajjahén róchá maná gwashant:
“Tai Hodá kojá ent?”

¹¹ Oo mani arwáh! Chiá gimmortagay?
Chiá mani del o daruná paréshán ay?
Óst o omét Hodáay sará bekan,
chiá ke nóksará hamáiá názénán,
wati rakkénók o wati Hodáyá.

Oo mani arwáh! Chiá paréshán ay?

43 Oo Hodá! Gonáhay bohtámá cha mani sará bethagalén,
Hodánábáwarén kawméay démá, pa mani hakká jáh bejan o
maná cha badkár o prébkáráni dastá berakkén,
² chiá ke taw mani kalát ay.

Taw parchá maná cha wat dur kortag?
Chiá cha dozhmenay ázárá
mótk byárán?
³ Wati rozhn o rástiá ráh day,
tánke mani rahshón bebant o
maná pákén kóhá o tai bárgáhá byárant.
⁴ Á wahdi Hodáay korbánjhá rawán,
dém pa Hodáyá ke mani wasshi o shádehi ent.
Oo Hodá, mani Hodá!
Tará gón changá názénán.

⁵ Oo mani arwáh! Chiá gimmortagay?
Chiá mani del o daruná paréshán ay?
Óst o omét Hodáay sará bekan,
chiá ke nóksará hamáiá názénán,
wati rakkénók o wati Hodá.

Oo Hodá! May madatá byá

Pa sázger o washázáni sálárá. Kórahay chokkáni shayri gwashtánk.

44 Oo Hodá! Má wati góshán eshkotag,
may pet o pirénán gwashtag
ke áyáni zamánagá chónén káret kortag,
gwastagén dawr o bárigán.

² Taw gón wati dastá kawm dar kortant,
bale may pet o pirén sabz kortant.
Kawmet droshtant o

may pet o pirén sháhegáni bakshátant.

³ Na áyáni zahmáni zór at ke molkesh gept
na ke básk o bázuán sóbén kortant.
É tai rástén dast at, tai básk o
chehragay rozhn,
chiá ke áyáni sará mehrabán atay.

⁴ Oo Hodá! Taw mani bádsháh ay.

Pa Ákubá péróziay hokmá borr.

⁵ Cha tai némagá ent ke dozhmenán pada kenzénén,
cha tai námá ent ke orosh barókán lagatmála kanén.

⁶ Man wati kamánay sará tawkala nakanán o
zahm maná sóbéna nakant.

⁷ É taw ay ke márá cha dozhmenán rakkéntag o
badwáh sarjahl kortagant.

⁸ Oo Hodá! Má modám tai sará pahr kortag o
tán abad tai námay shográ gerén. Ósht...

⁹ Bale nun taw márá dawr dátág o béezzat kortag,
may lashkaray hamráha nabay.

¹⁰ Márá dozhmenáni démá pada kenzénay o
badwáh márá áwára^a janant.

¹¹ Márá korbánigén pasáni paymá pa koshagá eshtaget o
kawmáni nyámá sheng o sháng kortag.

¹² Taw wati kawm arzáná bahá kortag o
cha áyáni baháyá sutté nabortag.

¹³ Márá hamsáhegáni rishkandi kortag o
kerr o gwaray mardománi kalági.

¹⁴ Taw márá kawmáni nyámá thekk o neshán kortag,
darkawm sará chandhénant o maskará kanant.

¹⁵ Sajjahén róchá gón sarjahliá dém pa dém án o
sharmá mani dém póshetag,

¹⁶ cha bad o rad gwashókáni shegáná,
cha dozhmen o bérgiray dastá.

¹⁷ É sajjahén may sará átkagant,
bale angat má tará nashamoshtag o
gón tai ahdá nárást nabutagén.

¹⁸ May del cha taw per natarretag o
pád o gám cha tai ráhá dar nabutag.

¹⁹ Bale taw márá prósh dátág o gón wahshién haywánán yakjáh kortag,
gón tahárterén tahárókiá póshéntag.

²⁰ Agan má wati Hodáay nám beshamoshtén,
yá dast pa bigánagén hodáéá borz kortén,

²¹ Hodáyá nazántagat?

Chiá ke á cha delay ráz o asrárán sarpad ent.

²² Bale má tai sawabá sajjahén róchá gón marká dém pa dém én o
korbánigén pasáni paymá hesáb áraga bén.

²³ Oo Hodáwand! Ágáh bay. Pa ché wáb ay?

Jáh jan o márá tán abad yalah makan.

²⁴ Chiá wati démá chéra dayay o
pa ché may bazzagi o lagatmáliá shamóshay?

^a 44:10 Áwár, bezán jangay tahá lotth o pol kortagén mál o mardom.

²⁵ Chiá ke má háká dém pa chér én o
láp zeminá lacchetag.

²⁶ Pád á o may madatá byá,
wati mehray sawabá márá bemók^a o berakkén.

Oo Hodá! Tai bádsháhi abadmán ent

Pa sázger o washawázáni sálárá. “Susanáni” tarzay sará. Kórahay chokkáni shayri gwashtánk. Eshki sawt.

45 Delon cha zébáén gálán sarréch ent,
shayré pa bádsháhá gwashán,
zobán, zabardastén nebisókéay kalamay paymá ent.

² Taw ádamiáni nyámá zébáterén ay o
cha tai lonthán lál o gawhara gwárit,
paméshká Hodáyá tará abadmánén barkaté dátág.

³ Oo tamardén bádsháh! Gón wati shán o shawkatá
zahmá lánká band.

⁴ Gón hamá shawkatá péróziay aspá betáchén,
pa rásti, békebri o ensápay dáragá,
bell ke rástén dast tará bákamálén kár sój bedant.

⁵ Tai tir téz ant o bádsháhay dozhmenáni delá nendant,
kawm tai pádáni chérá kapant.

⁶ Oo Hodá! Tai bádsháhi taht modámi o abadmán ent,
tai bádsháhi asá, adl o ensápay asá ent.

⁷ Taw páki o rásti dóst dáshtag o cha badiá naprat kortag,
paméshká Hodáyá, tai Hodáyá, tará géshter cha tai hamráhán
shádehiay rógen per moshtag.^b

⁸ Sajjahén jámaget gón morr o aud o tójá moshtag o washbó butagant.
Ájén^c kasráni tahá simmi sázáni zémel tará shádána kanant.

⁹ Bádsháháni jenek tai gránázén mehmán ant,
tai rástén némagá, malakah gón Opiray^d teláháni singará óshtátag.

¹⁰ Oo jenek! Beshkon o sharriá delgósh kan,
wati kawm o peti lógá shamósh,

¹¹ bell bádsháh tai zébáiy shaydá bebit,
áiay démá pa adab bósht ke á tai wájah ent.

¹² Suray shahray mardom^e gón wati thékiá kayt,
shahray hastómandén mardom tai razá o washnódiay randá bant.

¹³ Sháhay jenek wati kasrá sakk zébdár ent,
áiay póshák zargwáp ant.

¹⁴ Gón pardochén jámagán bádsháhay kerrá baranti,

^a 44:26 Mókag, bezán pa kaséay jánay rakkénagá gránén kimmáte dayag, Pársiá “bázkharid”. ^b 45:7 Rógen per moshtag, bezán pa bádsháhiá gechén kanag. ^c 45:8 Ájén, bezán cha ájá addh butagén. Áj cha pillay dantánán dara kayt. ^d 45:9 Ópir jágahé at ke teláhi báz at. ^e 45:12 Asligén Ebráni nebeshtánka gwashit: “Suray shahray jenek”. Sur bandené at o mardomi hastómand atant.

neshtagén jenek, áiay dazgohár, áiay padá gón ant.

¹⁵ Pa shádehi dém dayaga bant o
bádsháhi kalátá sara bant.

¹⁶ Tai pet o pirokáni jágahá, óbádageta nendant,
áyán sajjahén molkay kamásh o mastera kanay.

¹⁷ Tai námay yátá naslání nasl zendaga dárán,
paméshká sajjahén kawm tará abad tán abada názénant.

Hodá may kalát ent

Pa sázger o washázáni sálárá. Kórahay chokkáni Zabur. “Alámutay”^a tarzay sará. Sawté.

46 Hodá may panáhgáh o zór o wák ent,
madat kanóké ke sakkiáni wahdá tayár ent.

² Paméshká natorsén, toré zemin bezombit o
kóh daryáay delá bekapant.

³ Toré áiay áp grumbán o kap o gajj beabant o
kóh cha áyáni grumbagá belarzant. Ósht...

⁴ Kawré hast ke jói Hodáay shahrá shádmána kanant,
borzén arshay Hodáay pákén jágahá.

⁵ Hodá shahray nyámá ent o shahra nasorit,
bámgwáhá Hodá madatia kant.

⁶ Kawm shóresha kanant o hokumat sarshakuna bant,
á wati tawará borza kant o zemin ápa bit.

⁷ Lashkaráni Hodáwand gón má gón ent,
Ákubay Hodá may kalát ent. Ósht...

⁸ Byáét Hodáay kárán bechárét,
begendét ke áiá zeminá chónén béráni áwortag.

⁹ Zeminay chárén kondhán jangán halása kant,
kamáná próshit, nayzahá hurt hurta kant o
arrábahán ás mána dárit.

¹⁰ “Watá bedárét o bezánét ke man, Hodá án,
kawmáni sará hokmrán o
jaháná hákem.”

¹¹ Lashkaráni Hodáwand gón má gón ent,
Ákubay Hodá may kalát ent. Ósht...

^a 46:0 Alámutay máná “warnáén jenek” ent. Báwar esh ent ke Alámut muzikay yak gálé.

Hodá, sajjahén jahánay bádsháh

Pa sázger o washázáni sálárá. Kórahay chokkáni Zabur.

47 Oo sajjahén kawmán! Cháp bejanét.

Gón shádmániay borzén sawtán dém pa Hodáyá kukkár kanét.

² Chiá ke borzén arshay Hodáwand bákamál ent,
sajjahén jahánay mazanén bádsháh.

³ Kawmán may chérdasta kant,
ráján may pádáni chérá.

⁴ May mirásá pa má gechéna kant,
wati dóstén Ákubay pahrá. Ósht...

⁵ Hodá shádmániay kukkáráni nyámá borzád shotag,
Hodáwand sornáay tawáray nyámá.

⁶ Gón wati názénkán Hodáyá satá kanét, názénk janét,
benázénét, may bádsháhá benázénét.

⁷ Chiá ke Hodá sajjahén jahánay bádsháh ent,
áiá gón shayré benázénét.

⁸ Hodá kawmáni sará bádsháhia kant,
á wati pákén tahtá neshtag.

⁹ Kawmáni sarók o master mocch butagant,
gón Ebráhémay Hodáy kawmá yakjáh,
chiá ke jahánay sajjahén sardár,^a Hodáayg ant,
á béhesáb mazanshán ent.

May Hodáay shahr

Kórahay chokkáni Zabur.

48 Hodáwand mazan o satáay báz láhek ent,
may Hodáay shahray tahá.

Áiay pákén kóh,

² Sahyunay kóh, zébá gón wati borziá,
sajjahén jahánay shádehi,
shomálay borzterén bolandi,
mazanshánén bádsháhay shahr ent.

³ Hodá áiay borján ent,
watá mohrén kaláté pajjáréntagi.

⁴ Bádsháh yakjáh butant o
hóriá démá shotant,

⁵ bale anchosh ke shahresh dist,
hayrán o habakkah mantant o torsáná jestant.

⁶ Larzagesh delá kapt,

^a 47:9 Asligén Ebráni nebeshtánka gwashit: “espar”, ke pa sardár o hokmránán kár bandaga bit.

dardé trondén chó ke janénéay chellag o zanká.

⁷ Taw gón ródarátki gwátá

Tarshishay bandenay bójig^a próshtant.

⁸ Hamá dábá ke eshkotag nun gón wati chammána gendén,

lashkaráni Hodáwanday shahray tahá,

may Hodáay shahrá

ke Hodá tán abad pádária kant. Ósht...

⁹ Oo Hodáwand! Tai parasteshgáhay tahá
may johlánkén pegr o hayál gón tai mehrá ent.

¹⁰ Oo Hodá! Tai námay paymá,

tai satá zeminay chárén kondhán sara bit.

tai rástén dast adl o rástiá porr ent.

¹¹ Cha tai dadrasiá Yahudáay métag shádmán bátant o
Sahyunay kóh shádán.

¹² Sahyuná zyárat kanét, áiay chágérdá begardét o
borján hesáb kanét,

¹³ áiay mohréni diwáláni némagá sharriá hayál gwar dayét o
sajjahén kalátáni bechárét,
tánke gón nökén naslá begwashét

¹⁴ ke Hodá hamesh ent, may Hodá, abad tán abad,
hamá ent ke tán marká may rahshóna bit.

Málay sará tawkal nádánié

Pa sázger o washázáni sálárá, Kórahay chokkáni Zabur.

49 Oo sajjahén kawmán! Beshkonét.

Oo jahánay drostigén jahmenendán! Delgósh kanét.

² Borz o jahlén mardom doén,

azgár o nézgár, shomá sajjahén.

³ Mani dap, hekmat bayána kant,

delay johlánkén pegr, pahm o zánta bakshit.

⁴ Góshá dém pa nemunah o batalé tarrénán,

wati delay cháchay granchá gón changay sázá pacha kanán.

⁵ Baláh o sakkiáni róchán chiá betorsán,

á wahdá ke rad dayókáni badi maná angerra kant?

⁶ Áyáni tawkal pa wati zarr o málá ent o

wati mazanén hastiay sará pahra kanant.

⁷ Saddak án ke hechkas wati brátay zendá móketa^b nakant o
áiay hónbaháyá Hodáyá dáta nakant.

⁸ Chiá ke zenday mókag sakk grán ent o

^a 48:7 Bójig, bezán lánch, yakdár, kashti.

^b 49:7 Mókag, bezán pa kaséay jánay rakkénagá gránén kimmáté dayag, Pársiá “bázkhárid”.

hech kimmaté áiá porr korta nakant

⁹ tánke ensán namirán bemánit o

hechbar kabrá magendit.

¹⁰ Chiá ke gendagá én, dáná ham merant o

nádán o bésodd ham haláka bant o

wati mál o hastiá pa degarána kellant.

¹¹ Kabr áyáni abadmánén lóga bit,

nasláni nasl, áyáni menendjáh,

harchont ke kallagáná wati námesh per kort.

¹² Ádami wati arzesh o hastómandiá namánit,

chárpádáni paymá ent ke bérána bant.

¹³ Esh ent jáheláni ásar,

hamáyáni ákebat ke wati habaráni mannók ant. Ósht...

¹⁴ Pasáni paymá dém pa mordagáni jaháná ráh dayaga bant,

hamódá ke mark áyáni shopánka bit.

Bámgwáhán, nékdel áyáni sará hokmránia kanant o

áyáni jesm o ján kabrá pussit,

dur cha borzén márhián.

¹⁵ Bale Hodáwand mani arwáhá cha mordagáni jaháná mókit o

maná wati dastá zurit. Ósht...

¹⁶ Wahdé shomá gendét kasé hastómanda bit o

lógay shawcati gésha bit, matorsét.

¹⁷ Chiá ke markay wahdá chizzé gón wata nabárt o

shawcati gón áiá kabrá narawt.

¹⁸ Tán hastómand ent mardom áiá satá dayant.

Harchont ke zendá watá bahtáwar zántagi,

¹⁹ bale wati pet o pirénáni hamráha bit,

ke zenday rozhná hechbara nagendant.

²⁰ Ádami wati arzesh o hastómandiay tahá nádán ent,

chárpádáni paymá ent ke bérána bant.

Hodá wat may dádras ent

Asápay Zabur.

50 Hamá porwák, Hodáwandén Hodá
habara kant o zeminá gwánka jant,
cha ródarátká tán rónendá.

² Hodá cha Sahyuná

ke zébáiy kamál ent, wati nurá drapshána kant.

³ May Hodá kayt o bétawára nabit,

ér barókén ásé démá enti o

trondén gwát o lurhé chágerdá.

⁴ Borzén ásmánán ham gwánka jant o zeminá ham,
tánke wati mardománi dadrasiá bekant.

⁵ “Hodádóstán mani gwará yakjáh kanét,
hamá ke gón korbánig kanagá, gón man ahdesch bastag.”

⁶ Ásmán áiay adl o rástiá jára janant,
chiá ke Hodá wat dádras ent. Ósht...

⁷ “Oo mani mardomán! Beshkonét ke habara kanán.
Oo Esráil! Tai helápá gwáhia dayán.
Man Hodá án, shomay Hodá.

⁸ Pa korbánigi naent ke tará hakkala dayán,
tai sóchagi korbánig modám mani chammáni démá ant.

⁹ Na cha tai lógá gwaské zurán o
na pasé cha tai gwáshá.^a

¹⁰ Chiá ke jangalay sajjahén haywán manig ant,
hazárán kóháni dalwat^b.

¹¹ Kóhestagáni sajjahén báli morgán jáha kárán o
har ché ke zeminá gardit manig ent.

¹² Agan shodig atán tará sahigon nakortagat,
chiá ke jahán o harché áiá hast, manig ant.

¹³ Gókáni góshá warán?
Pasáni hóná nóshán?

¹⁴ Wati shogrgozáriay korbánigá Hodáyá pésh kan o
wati kawlá gón borzén arshay Hodáyá purah kan.

¹⁵ Sakki o sóriáni róchá maná belóth,
man tará nejáta dayán o
taw maná shán o shawkata dayay.”

¹⁶ Bale Hodá gón badkárá chosha gwashit:
“Tará che hakk ent ke mani Sharyatay rahbandáni habará bekanay
yá mani ahd o paymánay bárawá chizzé begwashay?

¹⁷ Chiá ke cha adab o tálimá bázár ay o
mani habará poshtá dawra dayay.

¹⁸ Dozzé ke genday, démet róshena bit o
gón zenákárán hamráha bay.

¹⁹ Dapay lagámá pa badiá yalahá kanay o
zobáná pa prébá.

²⁰ Modám wati brátay helápá habara kanay,
wati mátay chokkay sará bohtáma janay.

²¹ Taw é kár kortagant o man hecch nagwasht,
hayálet kort ke man tai payméné án.
Bale nun tará malámata kanán o
tai mayár o gonáhán tai chammáni démá éra kanán.

²² “Oo Hodá shamoshtagénán!
É habará neshán kanét,
agan na, shomará chondh chondha kanán o kas shomará rakkénta nakant.

^a 50:9 Gwásh, bezán wárh. ^b 50:10 Dalwat, bezán haywán.

²³ Á kas ke shogrgozáriay korbánigá pésha kant
hamá maná shán o shawkata dant,
pa wat ráhé tayára kant o
man áiá hamá nejátá pésha dárán ke cha mani némagá ent.”

Cha mani gonáhán sar gwaz

*Pa sázger o washawázáni sálárá, Dáuday Zabur, wahdé Nátán Nabi, cha
Dáud o Batshebahay wapt o wábá rand, áiay kerrá átk.*

51 Oo Hodá! Pa wati mehrá bechár o mani sará rahm kan!

Cha wati békésásén rahmatán
náparmániánon gár kan.

² Pa sarjami maná cha mayárbárián beshód o
cha gonáhánon pák kan!

³ Chiá ke wati náparmániána zánán o
mani gonáh modám chammáni démá ent.

⁴ Man tai helápá, tahná tai helápá gonáh kortag o
hamá káron kortag ke tai chammá bad ent.

Paméshká, taw ke habara kanay barhakk ay o
dádrasaiy wahdá béayb ay.

⁵ Pa rásti man mayárbár pédá butagán o
cha hamá wahdá ke mátay lápá kaptán, gonahkár.

⁶ Nun deljam án ke taw cha mani del o jabiná^a rástiay lóthók ay o
chér o panáhén daruná maná hekmata bakshay.

⁷ Gón zupáay lambán^b pákon kan ke pákizaga bán,
maná beshód ke cha barpá espéttera bán.

⁸ Bell ke shádehi o shádmániá beshkonán,
bell á haddh ke taw droshtagant gal o bál bebant.

⁹ Cha mani gonáhán sar gwaz o
sajjahén mayárbáriánon gár kan.

¹⁰ Oo Hodá! Mani daruná pákén delé bejórhen o
mani del o jabiná padá mohrénu ruhé byár.

¹¹ Maná cha wati bárgáhá dur maperrén o
wati Pákén Ruhá cha man pach mager.

¹² Wati dátágén rakkénagay shádehiá padá beday o
maná morádigén ruhé bebaksh.

¹³ Gorhá sarkashén mardomán tai ráhán tálima dayán o
gonahkár tai kerrá wátarra kanant.

¹⁴ Oo Hodá! Oo mani rakkénokén Hodá!
Maná cha hón o kóshay gonáhá berakkén o
zobánon tai adl o rástiá názénit.

^a 51:6 Jabin, bezán wajud, darun, zamir, wejdán. ^b 51:7 Zupáay lamb Esráiliáni korbánigáni rasmán pa palgár kanagá kár bandaga butant. Zupá kasánén drachké.

¹⁵ Hodáwandá! Mani lonthán pach kan,
tánke mani dap tará satá bekant.

¹⁶ Tará pa korbánigá wáhagé nést,
agan na, mana áwort,
sóchagi korbánig tará washnóda nakant.

¹⁷ Hodáy delpasondén korbánig, proshtagén arwáh ent.
Oo Hodá! Proshtag o tawbahkárén deléa taw jahla najanay.

¹⁸ Pa wati washnódiá bechár o gón Sahyuná mehrabán bay,
Urshalimay diwálán padá addh kan.

¹⁹ Gorhá cha rást o ádelén korbánigán shádána bay,
cha sóchagi korbánigá ke sarjamá sóchaga bit,
tai korbánjáhá gwask pésh kanaga bant.

Tawkal pa Hodáay mehrá

*Pa sázger o washawázáni sálárá, Dáuday shayri gwashtánk, á wahdá ke Edumi Duig,
Sháulay kerrá shot o á sahig korti ke “Dáud, Ahimelekay lógá shotag.”*

52 Oo porzórén mard! Chiá badiay sará pahra kanay?

Hodáay mehr dáemi ent.

² Oo prébkár! Tai zobán, tabáhi o barbádiay pandalána sázit,
almásén tégeay paymá.

³ Tará badi cha nékiá dóster ent o
dróg cha rástiá. Ósht...

⁴ Oo prébkárén zobán! Har bérán kanókén habará dóstá dáray.

⁵ Bale Hodá tará abadia próshit.
Tará chakápit o cha tai gedáná gwajit o
cha zendagénáni zeminá tai risshagá casshit. Ósht...

⁶ Pahrézkára gendit o torsit,
badkárav sará kandit o gwashit:

⁷ “Haw! Esh ent á kas ke Hodái wati kalát nakort.
Tawkali wati bázén mál o dawlatay sará bast o
wati barbád kanagá twáná but.”

⁸ Bale man zaytunay sabzén drachkéay paymá án,
ke Hodáay lógá sabza bit.

Mani tawkal Hodáay mehray sará ent
abad tán abad.

⁹ Pa tai kortagén kárán
modám tai shográ gerán o
Hodádóstáni démá
pa tai námá ométwár án,
chiá ke tai nám nék ent.

Nékkáré nést

Pa sázger o washázáni sálárá. “Mahallátay”^a tarzay sará. Dáuday shayri gwashtánk.

53 Nádán wati delá gwashit:

“Hodáé nést.”

É palit ant o káresh bazhnák,
nékkáré nést.

² Hodá cha ásmáná bani ádamá chárít
tán begendit bárén dánáé hast
ke Hodáay shóházá ent.

³ Sajjhénán Hodáay ráh gár dátág,
hórigá palit butagant,
nékkáré nést,
yakké ham nést.

⁴ Badkár hech sarpada nabant?
É mani kawmá anchosha warant ke mardom nagana warant o
Hodáyá hech tawára nakanant.

⁵ Ódá ke hech torsé nést
é sakka torsant,
chiá ke Hodá shomay angerr kanókáni haddhán sheng o shángá kant,
taw eshán sharmendaga kanay,
chiá ke Hodáyá á cha wat dawr dátagant.

⁶ Kasé cha Sahyuná byáyat o Esráilá berakkénát.
Wahdé Hodá washbahtiá pa wati kawmá pera tarrénit,
Ákub gal o bála bit o Esráil shádehia kant.

Gón wati námá maná berakkén

*Pa sázger o washázáni sálárá. Gón simmi sázán. Dáuday shayri gwashtánk, hamá wahdá ke Zépay
mardom Sháulay kerrá shot o gwashtesh: “Bárén, Dáud watá may nyámá chér dayagá naent?”*

54 Oo Hodá! Gón wati námá maná berakkén.

gón wati zórá gonáhay bohtámá cha mani sará bethagalén.

² Hodáyá! Mani dwáyá gósh kan o
dapay habarán beshkon.

³ Chiá ke bigánag, mani démá pa dozhmeni pád átkagant o
setamger mani kóshay padá ant,
hamá ke Hodáyá wati chammáni démá nayárant. Ósht...

^a 53:0 Báwar esh ent ke Mahallát sázé yá muzikay yak gálé.

⁴ Bale haw! Hodá mani komak kanók ent,
Hodáwand mani zenday dárók ent.

⁵ Mani dozhmenáni badi áyáni jenday chakká kapát,
wati wapádáriay sawabá, áyán gár kan.

⁶ Oo Hodáwand! Wati delkasshén korbánigán tará pésha kanán o
tai námay shográ gerán, chiá ke nék ent.

⁷ Parchá ke taw maná cha har sakki o sóriá rakkéntag,
mani chamm dozhmenay prósh waragay sháhed butagant.

Cha dozhmenáni tawará hayrán án

Pa sázger o washawázáni sálárá. Gón simmi sázán. Dáuday shayri gwashtánk.

55 Oo Hodá! Mani dwáyá beshkon o
watá cha mani zári o peryátán chér maday.

² Mani némagá delgósh kan o passaw day,
wati nálag o zangán paréshán án.

³ Cha dozhmenáni tawár o
cha badkáráni kukkárán bétágat o hayrán án.
Chiá ke náhakká maná ranjénant o
gón hezhmé mani dozhmeniá kanant.

⁴ Del mán sénagá azáb ent o
markay torson sará kaptag o

⁵ bimm o dehshatá maná chér tarréntag.

⁶ Gwashán: “Dréchá kapóti bálon per butén,
tánke bálon bekortén o áram begepténán,

⁷ Haw! Dém pa durén jágahána shotán o
dasht o gyábánon wati hankéna kort. Ósht...

⁸ Pa eshtápia shotán o jáhé chéra bután,
cha lurh o tuppánán dur.”

⁹ Hodáwandá! Áyáni zobáná anchosh betarrén
ke yakdomiá sarpad mabant,
chiá ke shahrá jang o chópa gendán.

¹⁰ Róch o shap shahray chágerdá diwáláni sará tarragá ant o
shahr cha náensápi o petnahá porr ent,

¹¹ cha harábi o bérániá sarréch ent o
setam o repk, cha áiay bázárá dura nabít.

¹² É dozhmené naent ke maná shegána jant,
agan na, mana sagget,
badwáh naent ke gón pahré mani démá óshtátag,
agan na, cha áiá chéra bután.

¹³ Ji, taw ay mani matth,
mani bráhondag o nazzikén dóst,
¹⁴ ke márá wasshén hamráhié hastat

hamá wahdá ke gón mazanén mocchié Hodáay lógá gámena jat.

¹⁵ Mark áyáni chakká bekapát o
zendahgórr bátant,
chiá ke badi áyáni lóg o deláni tahá ent.

¹⁶ Bale man Hodáyá gwánka janán o
Hodáwand maná rakkénit.

¹⁷ Bégáh o sabáh o némróchá
zanga janán o peryáta kanán o
á mani tawárá eshkont.

¹⁸ Mani jesm o jána cha hamá jangá ke démá dar átkag
pa dráhi o salámatia rakkénit,
bell toré bázéné mani démá óshtátag.

¹⁹ Hodá ke cha azal wati bádsháhi tahtay sará neshtag,
eshkont o sharmendagesha kant. Ósht...

Chiá ke badala nabant o
Hodátorsiesh nést.

²⁰ Mani bráhondagá wati dast dóstáni helápá shahárt o
wati kawli prósht.

²¹ Zobáni chó thélá charp at
bale deli jangig,
dapay habari cha rógená narmter,
bale kasshetagén zahm atant.

²² Wati paréshánián pa Hodáyá bell,
ke á tai dárók ent,
á hechbar pahrézkárán kapagá naylit.

²³ Bale taw, oo Hodá,
badkárán johlterén kallá dawra dayay,
hónwár o prébkárén mardom
wati rócháni némá ham zendaga namánant,
bale man tai sará tawkala kanán.

Hodáay sará tawkala kanán

*Pa sázger o washawázáni sálárá. “Bétawár o durdastén kapótay” tarzay sará.
Dáuday shayr, hamá wahdá ke Pilistián Dáud Gatay shahrá dazgir kort.*

56 Oo Hodá! Mani sará rahm kan,
ke dozhmen sakk mani randá ant,
sajjahén róchá, mani sará orosha kanant.

² Sajjahén róchá, dozhmen maná lagatmála kanant,
chiá ke bázéné pa kebr mani sará orosha kant.

³ Wahdé maná torsit

tai sará tawkala kanán.

⁴ Hodáay sará, ke áiay habará satá kanán,
Hodáay sará tawkala kanán o natorsán,
hákién ensán maná ché korta kant?

⁵ Sajjahén róchá, mani habarán tába dayant o
sajjahén honaresh pa mani ázár dayagá ent.

⁶ Pandala sázant o kamina kanant,
mani gámána chárant o
mani koshagay randá ant.

⁷ Gón é sajjahén badián rakketa kanant?
Oo Hodá! Wati hezhmay tahá kawmán sarshakun kan.

⁸ Taw mani darpadariay hesábána dáray,
mani arsán wati arsdáná bekan,
é tai ketáb o daptarán nebeshtah naant?

⁹ Gorhá á wahdá ke tará gwánka janán
dozhmen pada kenzant.

Eshiá zánán ke Hodá gón man ent.

¹⁰ Hamá Hodá ke áiay habará satá kanán,
haw, hamá Hodáwand ke áiay habará satá kanán,

¹¹ Hamá Hodáay sará tawkala kanán o natorsán.
Ensán maná ché korta kant?

¹² Oo Hodá! Báyad ent gón taw wati kortagén kawlán purah bekanán,
pa taw shogrgozáriay korbánigán pésha kanán.

¹³ Chiá ke taw, oo Hodá, maná cha marká rakkénay o
mani pádán cha lakoshagá dáray,
ke zenday rozhná tai bárgáhá gám bejanán.

Tai bánzoláni sáhegá panáha zurán

*Pa sázger o washázáni sálárá. “Barbád makanay” tarzay sará. Dáuday shayr,
hamá wahdá ke Dáud cha Sháulá tatk o gáréá chér but.*

57 Mani sará rahm kan. Oo Hodá! Mani sará rahm kan,
chiá ke mani arwáh tai mayár o báhóth ent.

Tai bánzoláni sáhegá panáha zurán,
tán hamá wahdá ke é baláh berawt o begwazit.

² Borzén arshay Hodáay gwará peryáta kanán,
hamá Hodá ke gonáhay bohtámá cha mana thagalénit.

³ Cha ásmáná wati komaká ráha dant, maná rakkénit o
áyán ke maná lapáshant, pa hakkal adaba kant. Ósht...
Hodá wati mehr o wapádáriá rawána kant.

⁴ Mani arwáh shéráni nyámá ent,
ás bon dayókáni nyámá wapsán,

hamá mardománi nyámá ke dantánesh tir o nayzah ant o
zobánesh tézén zahm.

⁵ Oo Hodá! Ásmánáni sará bátay,
tai shawkat sajjahén zeminá sheng bát.

⁶ Mani pádáni démá dámesh chér kort o
arwáhon sarshakun but.
Ráhay sará chátesh kótk,
bale wat ódá shakun butant. Ósht...

⁷ Oo Hodá! Mani del mohr ent.
Mani del mohr ent o
sawt o sáza janán.

⁸ Oo mani arwáh! Ágáh bay.
Oo chang o soródán! Ágáh bét.
Man bámgwáhá cha wábá páda kanán.

⁹ Oo Hodáwand! Tará kawmáni nyámá satá kanán o
pa taigi kabilaháni nyámá sawta janán.

¹⁰ Chiá ke tai mehr báz ent,
tán arshá rasit o
tai wapádári tán jambarán.

¹¹ Oo Hodá! Ásmánáni sará bátay,
tai shawkat sajjahén zeminá sheng bát.

Hodá zeminay dádras ent

Pa sázger o washáwázáni sálárá. “Barbád makanay” tarzay sará. Dáuday shayr.

58 Oo hákemán! Shomay bétawári náensápi naent?
Mardománi nyámá pa ensáp dádrasia kanét?

² Enna, wati delá béadlia sázét o
shomay dast zeminá petnah páda kanant.

³ Badkárán cha mátay lápá wati ráh gár dátág o
cha pédaeshá gomráh o drógband ant.

⁴ Áyán zahré mán ent chosh ke máray zahrá,
syahmáréay dhawlá ant ke góshi bastagant o

⁵ hech paymá wati démá pa márgeráni áwázá natarrénit,
harchont ke ezm o honara kanant.

⁶ Oo Hodá! Esháni dantánán mán dapá prósh.
Hodáwandá! É warnáén shéráni néshén dantánán cha boná dar kan.

⁷ Tachókén ápáni paymá gár bátant,
wahdé kamána kasshant tiresh konth bátant o pad o nesháné maylátant,
⁸ halazunay paymá ke góón rawagá ápa bit o
eshkand butagén chokkay paymá ke hechbar róchay rozhná nagendit.

⁹ Cha eshiá pésar ke shomay déz konthagáni ásá bemárant, ^atarr bebant yá hoshk, Hodáesh gár o gomsár kanát.

¹⁰ Pahrézkár, bérá ke gendit, shádehia kant, wati pádán mán badkáráni hóná shódit.

¹¹ Mardoma gwashant:
“Albat ke pa pahrézkárá mozzé hast, Hodáé hast ke zeminay sará dádrasia kant.”

Maná cha dozhmenán berakkén

Pa sázger o washawázáni sálárá. “Barbád makanay” tarzay sará. Dáuday shayr, hamá wahdá ke Sháulá pa Dáuday kóshá, lahtén chárug áiay lógá rawán dát.

59 Oo mani Hodá! Maná cha dozhmenán berakkén o cha áyán ke mani helápá jáha janant, mani negahpániá bekan.

² Maná cha badkárán berakkén o cha hónigán neját beday.

³ Bechár ke che paymá pa mani kóshá kaminesh kortag.
Oo Hodáwand! Zórákén mard mani helápá yakjáh butagant, maná hech gonáh o mayáré ham nést.

⁴ Man hech gonáh o mayáré nakortag, bale é angat mani sará orosh kanagá tayár ant.
Pa mani komaká pád á o mani hálá bechár.

⁵ Oo Hodáwand, oo lashkaráni Hodá! Taw Esráilay Hodá ay, ágáh bay, sajjahén kawmán sezá beday o
badkárén dróhókáni^b sará rahm makan. Ósht...

⁶ Shapá pera tarrant,
kochekáni paymá gorrant o
shahray chágerdá gardant.

⁷ Bechár ke cha dapá ché dara kanant,
zahmesh dapá ent,
gwashant: “Kass eshkonagá naent.”

⁸ Bale taw, oo Hodáwand, áyáni sará kanday,
sajjahén kawmáni sará rishkanda kanay.

⁹ Oo mani wák o zór! Tai rahchár án,
chiá ke taw mani kalát ay, oo Hodáwand!

¹⁰ Hodá pa man mehrabán ent o mani komaká kayt,
dozhmenáni sará wati péróziá gendán.

¹¹ Oo Hodáwand ke may espar ay! Áyán makosh,
chosh mabit ke mani kawm beshamóshit.

^a 58:9 Márag, bezán mahsus kanag. ^b 59:5 Dróhók, bezán mardomé ke pa repk rada dant. Pársiá “khiánatkár”, Orduá “dhukábáz”.

Gón wati zórákiá eshán sargardán kan o ér byár.

¹² Pa wati dapay gonáh o lontháni habarán
wati kebray tahá bandig bebant.

Esháni nálat o drógbandiay sawabá,

¹³ eshán wati hezhmay tahá gár o gomsár kan,
gár o gomsár kan ke hech pasht makapant,
tán zánag bebit
ke cha Ákubá beger tán zeminay har kondhá Hodá bádsháhia kant. Ósht...

¹⁴ Shapá pera tarrant,
kochekáni paymá gorrrant o
shahray chágérdá gardant.

¹⁵ Warákay shóházá sar sar janána bant o
agan sér mabant wába nakapant.

¹⁶ Bale man tai kodratay tawsipá sawt o sáza janán,
sohbá tai mehray satáyá sawta janán o shádehia kanán,
chiá ke taw mani borzén kalát ay o
sakkiáni wahdá mani panáhgáh.

¹⁷ Oo mani wák o twán! Tará názénán.
Hodá mani borzén kalát ent,
mani Hodá ke gón man mehra kant.

Dozhmenáni démá márá madat kan

Pa sázger o washázáni sálárá. “Susanay” tarzay sará. Gwáhié. Pa tálimá Dáuday shayr, hamá wahdá ke Dáudá gón Naharaymay Árámián o Sóbahay Árámián jang kort o hamá wahdá ke Yuáb per tarret o Wáday dashtá cha Edumián dwázdah hazár mardomi kosht.

60 Oo Hodá! Taw márá yalah kortag o may sangar próshtagant,
hezhmnák butagay, bale nun gón má wasshán bay.

² Zeminet jombéntag o tal dátág,
taláni beger ke larzagá ent.

³ Wati kawmet gránén jáwarán perréntag,
márá madhósh kanókén sharábet wáréntag.

⁴ Bale angat bayraket pa Hodátorsán borzad kortag
tánke yakjáh bebant o cha dozhmenay kamáná berakkant. Ósht...

⁵ Gón wati rástén dastá berakkén o passaw beday
tán hamá ke tará dóst ant berakkant.

⁶ Hodáyá cha wati pákiá habar kort:
“Shekémá gón shádehi bahra kanán o
Sukkótay daragá kesása kanán.

⁷ Galyád manig ent o Manassi mani,
Epráim mani jangi koláh ent,
Yahudá bádsháhiaj asá o

⁸ Muáb mani dasshódi trasht,

Edumay sará wati swásá chagala dayán^a o
Pilstiahay sará wati péróziay gwánká janán.”^b

⁹ Kay maná choshén shahréá kárit ke sangarband ent?

Kay maná dém pa Edumá rahshóna bit?

¹⁰ Oo Hodá! Taw márá yalah dátág.

Oo Hodá! Padá may lashkaráni hamráha nabay.

¹¹ Dozhmenáni démá márá madat kan,
chiá ke ensánay madat békár o náhudag ent.

¹² Gón Hodáyá sóbéna bén,
hamá ent ke may dozhmenán pádmála kant.

Maná dém pa talárá bar

Pa sázger o washawázáni sálárá. Gón simi sázán. Dáuday Zabur.

61 Oo Hodá! Mani peryátá beshkon o
mani dwáyá gósh dár.

² Tará cha zeminay godhsará gwánka janán,
wahdé delona drahit.

Maná dém pa taláréá bar ke cha man borzter ent.

³ Chiá ke taw mani panáhgáh butagay o
dozhmenáni démá mohréni borjé.

⁴ Bell ke tai tambuá tán abad bemánán o
tai bánzoláni sáhegá panáh bezurán. Ósht...

⁵ Chiá ke taw, oo Hodá, mani dátágén kawl eshkotagant o
wati námay torsetagénáni miráset maná baksháttag.

⁶ Bádsháhay omray róchán báz kan o
áiay sálán, tán sajjahén naslán.

⁷ Hodáy bárgáhá tán abad sháhi tahtá benendát,
wati mehr o wapádáriá áiay negahpán kan.

⁸ Nun tai námá modám názénán o
wati kawlán har róch puraha kanán.

Arwáhon Hodáay rahchár ent

Pa sázger o washawázáni sálárá. “Yedutunay”^c tarzay sará. Dáuday Zabur.

62 Mani arwáh pa émeni tahná Hodáay rahchár ent,
chiá ke mani rakkénag cha hamáiay némagá ent.

² Mani talár o mani rakkénók tahná hamá ent,

^a 60:8 Swás chagal dayagay máná gerag o wati kanag ent. ^b 60:8 Band 6 tán 8 á bázén jágah o mardománi náma kayt.

^c 62:0 Yedutunay cha mazanén parasteshgáhay washawázán yakké at.

mani kalát ent, hechbara nalarzán.

³ Tán kadén mardéay sará orosha kanét
tánke sarjamiá bekoshéti,
chosh ke proshtagén diwál o kaptagén shank o pallé?

⁴ Albat pandala sázant ke áiá cha borzád sarshakun bekanant.
Cha dróg bandagá lezzata barant,
gón watí dapá barkata dayant,
bale delay tahá nálata kanant. Ósht...

⁵ Oo mani arwáh! Pa émeni tahná Hodáay rahchár bay,
chiá ke mani omét gón hamáiá ent.

⁶ Mani talár o mani rakkénók tahná hamá ent,
mani kalát ent, mana nalarzán.

⁷ Mani neját o ezzat gón Hodáyá ent,
hamá mani mohréni talár ent, mani panáhgáh ent.

⁸ Oo mardomán! Hodáay sará tawkal kanét o
delay hálán hamáiay démá darshán kanét,
Hodá may panáhgáh ent. Ósht...

⁹ Pa rásti ke ensán cha daméá géshter naent,
bani ádam prébé,
agan sháhémá tóresh bekanant hech naant.
É sajjahén, yakjáh cha damé géshter naant.

¹⁰ Pa zolm o zórá tawkal makanét o
pa dozzia omét mabandét,
harchont ke shomay mál géshtera bit,
pa áiá del mabandét.

¹¹ Hodáyá yak habaré gwashtag o
man do eshkotag,
ke zór o kodrat Hodáayg ent o
¹² mehr o rahm ham taig ent, oo Hodáwand!
Taw harkasá áiay kortagén káráni hesábá, mozza dayay.

Arwáhon tai tonnig ent

Dáuday Zabur, hamá wahdá ke Yahudáay gyábáná at.

63 Oo Hodá! Mani Hodá taw ay,
gón watí sajjahén del o jáná tai shóházá án,
arwáhon tai tonnig ent o
jesm o jánon tai hodónák,
béáp o hoshkén zeminéá.

² Tai pákén jághá, maná tai shobén butag,
tai shán o kodraton distag,

³ chiá ke tai mehr cha zendá sharter ent,
mani lonth tará názénant.

⁴ Tán zendag án tará názénán o

pa tai námá dastán borza kanán.

⁵ Arwáhon anchosh séra bit chó ke yakké wasshén waráké bwárt o dapon gón shádmánén lonthán tará názénit.

⁶ Wati bestaray tahá ham tará yáta kanán o shapáni pásán tai hayálá bán.

⁷ Tai bánzoláni sáhegá tará názénán, chiá ke taw mani madatkár ay.

⁸ Arwáhon gón taw bandók ent o rástén dastet mani posht o panáh.

⁹ Á ke mani koshagay pad o randá ant gár o gomsára bant o zeminay johlánkián éra rawant.

¹⁰ Zahmáni dapá tarrant o tólagáni waráka bant.

¹¹ Bale bádsháh Hodáay dargáhá shádehia kant o harkas ke gón Hodáyá sawgenda wárt pahra kant, chiá ke drógbandáni dap chopp o bandaga bit.

Maná cha badkárán chér day

Pa sázger o washawázáni sálárá. Dáuday Zabur.

64 Oo Hodá! Wahdé nálán o peryáta kanán, mani tawará beshkon o zendá cha torsnákén dozhmenán berakkén.

² Maná cha badkáráni pandalán chér day, cha radkáráni áshópá.

³ Chiá ke wati zobáná zahmáni paymá téza kanant o wati tahlén habarán tiray paymá kára bandant

⁴ tánke cha wati sangarán bémayárá neshánag bekanant.

Anágat o bé torsá áiá tira janant.

⁵ Radén kárá yakdomiá delbaddhia dayant, habar ke kanant, maksadesh wati dámáni chér kanag ent. Gwashant: “Kayesha gendit?”

⁶ Náensápiá dalil o honara kanant o gwashant: “Má tamán o kamálén shawré kortag.”

Pa rásti ke ensánay del o hayál zánaga nabant.

⁷ Bale Hodá áyán tira jant o anágat thappiga bant.

⁸ Á wati jenday zobánay sawabá thagala warant. Harkas ke begenditesh pa áyán sará chandhénit.

⁹ Sajjahén bani ádama torsant, Hodáay kárá jára janant o áiay kárá pa hósh o sára chárant.

¹⁰ Pahrézkár Hodáwanday dargáhá shádehi kanát o

áiay dargáhá panáh bezurát.
Sajjahén nékdel pahr bekanátant.

Hodáay kawr sarréch ent

Pa sázger o washázáni sálárá. Dáuday Zabur. Sawté.

65 Oo Hodá! Sahyuná satá o saná tai wadará ent,
gón taw may kawl puraha bant.

² Oo taw ke dwáyána eshkonay!

Sajjahén mardom dém pa taw káyant.

³ Á wahdá ke gonáh mani sará lombetant,
taw márá bakshet.

⁴ Bahtáwar hamá ent ke tawi gechéna kanay o wati bárgáhá káray
tánke hamódá jahmenend bebit.

Cha tai dargáhay nékiá séráp bátén,
cha tai parasteshgáhay pákiá.

⁵ Gón wati bákamálén kárán, márá pa adl o ensáp passawa dayay.
Oo may rakkénókén Hodá!

Zeminay chár kondh o durdastterén daryáyáni omét gón taw ent.

⁶ Taw ay ke gón wati zór o wáká kóhet jórhéntagant o
watá gón kodratá selahbandet kortag,

⁷ daryáyáni gorraget áram kortant,
mawjáni tawár o kawmáni áshóp.

⁸ Zeminay chár kondhá nendók cha tai neshánián hayrán ant,
taw shagreb o magrebá parmáay ke shádmániay kukkárá bekanant.

⁹ Taw zeminay hayáldáriá kanay,
áiá ápa dayay o ábáda kanay.

Hodáay kawr sarréch ent
taw mardomán gandoma bakshay
chiá ke tai shawr hamé butag.

¹⁰ Taw zeminay palán^a ápa dayay o
dhagárá hamdasta kanay,
gón gwáragá narmia kanay o
rost o rodómá barkata dayay.

¹¹ Gón wati nékiá sálá tájé sará dayay,
tai pádráh ham cha barkatá sarréch ant.

¹² Gyábánáni charágáh ábáda bant o
kóhán wati srén pa shádmáni bastagant.

¹³ Dhagárán watá gón ramagán póshéntag o
daragán gón gandomá,
shádmániay kukkárá borza kanant o sawta janant.

^a 65:10 Pal, bezán dhagáray nangár kanagá rand, hamá drájén borz o jahli ke áyáni tahá keshaga bit.

Tai kár bákamál ant

Pa sázger o washawázáni sálárá. Sawté. Zaburé.

66 Oo zeminay sajjahén mardomán! Pa Hodáyá shádehiay gwánká bejanét.
Áiay námay mazaniá názénét o
áiay shán o shawkatá satá kanét.

³ Hodáyá begwashét: “Tai kár chenkadar bákamál ant.

Tai wák o kodratay mazaniay sawabá
dozhmen tai démá háká kapant.

⁴ Zeminay sajjahén mardom tará sojdaha kanant o
tará názénant.

Haw! Tai námá sárháyant.” Ósht...

⁵ Byáét o bechárét ke Hodáyá ché kortag,
ajabén kár pa bani ádamá.

⁶ Daryái hoshk kort o
Hodáay kawm ódá pád payádaká cha kawrá gwast,
áiay bárgáhá shádmáni bekanén.

⁷ Á gón wati kodratá tán abad bádsháhia kant,
chammi gón kawmán ent.

Sarkesh áiay helápá pád mayáyant. Ósht...

⁸ Oo kawmán! May Hodáyá satá kanét,
pa borztawári benázéneti.

⁹ May zendí rakkéntag o
pádi cha thagalagá dáshtagant.

¹⁰ Oo Hodá! Chiá ke taw márá chakkásetag,
taw márá nograhay paymá palgártag.

¹¹ Taw márá dámá dawr dátág o
may gardená mazanén báré eshtag.

¹² Cha tai razáyá mardomán márá sarjamiá lagatmál kortag,
cha áp o ásá gwastagén,
bale márá sarsabzén jáhéá áwortaget.

¹³ Gón sóchagi korbánigán tai dargáhá káyán o
gón taw wati kawlán puraha kanán,

¹⁴ hamá kawl ke lonthán wádah dátág o dapá gwashtagant
sakki o sóriáni wahdá.

¹⁵ Pazzórén dalwatán sóchagi korbániga kanán,
gón gwarándháni korbánigay duttán,
pa taw pas o gók nadra kanán. Ósht...

¹⁶ Oo sajjahén Hodátorsán! Byáét o beshkonét,
hamá chizzána gwashán ke pa man kortaganti.

¹⁷ Gón wati dapá áiay kerrá peryáton kortag,

áiay satá o saná mani zobáná at.

¹⁸ Agan badié mani delá butén

Hodáwandá mani habar gósh nadáshtagat.

¹⁹ Bale Hodáyá pa rásti eshkotag o
mani dwáay tawári gósh dáshtag.

²⁰ Hodáyá satá bát ke cha mani dwáyá nádelgósh nabutag o
wati mehri cha man dur nadáshtag.

Sajjahén kawm tará satá kanátant

Pa sázger o washawázáni sálárá. Pa simmi sázán. Zaburé. Sawté.

67 Hodá may sará mehrabán bát, márá barkat bedayát o
wati démá pa má drapshán kanát, ósht...,

² tánke tai ráh jaháná zánag bebit o
tai dátágén rakkénag sajjahén kawmáni nyámá.

³ Oo Hodá! Kawm tará satá kanátant,
sajjahén kawm tará satá kanátant.

⁴ Kawm shádehi kanátant o shádmániay gwánká bejanátant,
chiá ke taw kawmáni sará pa ensáp dádrasia kanay o
jahánay kawmáni rahshóna bay. Ósht...

⁵ Oo Hodá! Kawm tará satá kanátant,
sajjahén kawm tará satá kanátant.

⁶ Zeminá wati bar o samar dátág,
Hodá, may Hodá, márá barkat bedayát.

⁷ Hodá márá barkat bedayát
tánke zeminay chár kondh áiay mazaniá sharap bedayant.

Hodá jáh janát

Pa sázger o washawázáni sálárá. Dáuday Zabur. Sawté.

68 Hodá jáh bejanát o áiay dozhmen sheng o sháng bátant,
á ke cha áiá naprata kanant cha áiay dargáhá betachátant.

² Anchosh ke dutt bála kant eshán betáchén,
anchosh ke mórm ásay démá ápa bit,
badkár Hodáy dargáhá gár o gomsár bátant.

³ Bale pahrézkár shádmán o
Hodáy dargáhá gal o bál bátant o
cha wasshiá shádehi kanátant.

⁴ Pa Hodáyá sawt bejanét o áiay námá názénét,

pa áiá ke jambarán swár ent satá o sanáay tawará borz kanét.

Áiay nám Hodáwand ent,

áiay bárgáhá shádehi kanét.

⁵ Hodá wati pákén bárgáhá

chórhawáni pet ent o janózámáni dádras.

⁶ Hodá békásán pa lóg o jáha kant o

bandigán, ázát o ábád,

bale sarkesh, hoshkén zeminéá nendóka bant.

⁷ Oo Hodá! Á wahdá ke wati kawmay rahshón atay,

á wahdá ke gyábáná mallán atay, ósht...,

⁸ zemin larzet o

ásmánán hawr gwart,

Hodáay bárgáhá, Sináay kóhay yakdánagén Hodáay,

Hodáay bárgáhá, Esrailay Hodáay.

⁹ Oo Hodá! Taw bázén hawré gwárént o

tai mirás ke hoshk o wayrán butagat, taw séráp kort.

¹⁰ Tai ramag ódá jahmenend but.

Cha wati nékiá, oo Hodá,

taw béwas rózi dátant.

¹¹ Hodáwand wati habará jára jant,

bashárat árókén janén, mazanén lashkaré ant.

¹² Bádsháh gón wati lashkarána jehant o tachant,

janén wati lógá áwárán^a bahra kanant.

¹³ Toré gwásh o áhorráni tahá wáb bebay

kapódaráni bál nographósha bant o potthesh teláhrang.

¹⁴ Wahdé Porwákén Zórá bádsháh sheng o sháng kortant,

barpá Salmunay kóhay sará gwart.

¹⁵ Oo mazankóh! Oo Báshánay kóh!

Oo bázthollén^b kóh! Oo Báshánay kóh!

¹⁶ Oo bázthollén kóh! Pa ché hamá kóhá gón hasaddé cháragá ay

ke Hodáyá pa wati lögjáhá gechén kortag,

hamódá ke Hodáwand tán abad jahmenenda bit?

¹⁷ Hodáy arrábah hazáráni hazár o

lakkáni lakk ant,

Hodáwand cha Sináay kóhá wati pákén jágahá átkag.

¹⁸ Á wahdá ke arshá borz butay

bázén bandigé zortet,

cha mardomán thékiet zort,

tantaná cha sarkashán ham,

tánke taw, oo Hodáwandén Hodá, ódá jahmenend bebay.

¹⁹ Hodáwandá satá bát, may rakkénökén Hodáyá

ke har róch may bárána saggit. Ósht...

^a 68:12 Áwár, bezán jangá dast áwortagén mál, zarr o mardom. ^b 68:15 Tholl, bezán kóhay tuskén borzi. Bázthollén kóhéá bázén borzié hast.

²⁰ May Hodá rakkénokén Hodá ent,
cha marká rakkénag Hodáwanday dastá ent, tahná Hodáwanday.

²¹ Bale Hodá dozhmenáni sará próshit,
hamáyáni pormudén saray gobbahá próshit ke warí gonáháni tahá gáma janant.

²² Hodáwandá gwashtag: “Áyán cha Básháná pera tarrénán,
áyán cha daryáay johlánkián pera tarrénán,

²³ tánke tai pád áyáni hóná lagatmál bekanant o
tai kochekáni zobán ham warí bahrá cha dozhmenán begerant.”

²⁴ Oo Hodá! Tai jashnay kárwán gendaga bit
mani Hodá o mani bádsháhay kárwán mán pákén jágahá.

²⁵ Démá sháer o poshtá sázger o
nyámá jenek tamburag janagá ant.

²⁶ Hodáyá mán mazanén diwánán benázénét.
Oo Esráilay óbádagán! Hodáwandá benázénét.

²⁷ Benyáminay kasánén kabilah hamódá ent,
Yahudáay kamásh áyáni hákem ant,
Zebulunay kamásh o Naptáliay kamásh, mazanén rombé ant.

²⁸ Tai Hodáay parmán ent ke taw zóráwar bebay.
Oo Hodá! Anchosh ke pésará kortaget, warí zór o wáká márá pésh bedár.

²⁹ Pa tai parasteshgáhay háterá ke Urshalimá ent
bádsháhay pa taw thékia kárant.

³⁰ Kalam o kásháni nyámay rastará^a hakkal day o
kawmáni gwaskáni nyámá gókáni góromá.^b
Rastar érdasta bit o nograha kárit.

Jangdóstén kawmán sheng o sháng kan.

³¹ Kásed cha Mesrá káyant
Habashah eshtápiá warí dastán dém pa Hodáyá borzáda kant.

³² Oo jahánay molkán! Pa Hodáyá sawt bejanét,
Hodáwandá gón sawtá benázénét, ósht....

³³ hamáiá ke ásmánán shahswária kant, kwahnén ásmánán,
hamáiá ke warí áwázá borza kant, trond o porwákén áwázá.

³⁴ Hodáay kodratá jár bejanét,
ke shán o shawkatí Esráilay sará ent o
kodrati, ásmánáni sará.

³⁵ Oo Hodá! Taw warí pákén jágahá bákamál ay,
Esráilay Hodá warí kawmá zór o wáká bakshit.
Hodáyá satá o saná bát.

^a 68:30 Rastar, bezán derrókén jánwaré chó ke shér o polang. ^b 68:30 Górom, bezán gókáni romb.

Oo Hodá! Maná berakkén

Pa sázger o washawázáni sálárá. “Susanáni” tarzay sará. Dáuday Zabur.

69 Oo Hodá! Maná berakkén
ke áp tán mani gardená ent.

² Johlánkén pujgelán mén butagán,
jágahé ke páda naóshtit.

Johlánkén ápáni tahá kaptagán o
hár o lahrhán maná angerr kortag.

³ Cha bázén peryátán damon bortag,
mani nokk hoshk ent o
chamm wati Hodáay wadárá tahár butagant.

⁴ Á ke bésawab cha man naprata kanant
cha mani saray mudán géshter ant.

Bázéné mani gár kanagay randá ent
dozhmen mani sará drógén bohtáma janant.
Cha man lóthant hamá chizzán per betarrénán
ke man nadozzetagant.

⁵ Oo Hodá! Taw zánay ke man ahmaki kortag,
mani gonáh cha taw chér naant.

⁶ Oo Hodáwand, oo lashkaráni Hodáwand!
Hamá ke tai wadárig ant mani sawabá sharmendag mabántant.
Oo Esráilay Hodá!

Hamá ke tai shoházá ant mani sawabá roswá mabántant.
⁷ Chiá ke pa taigi maná sobakka kanant o
mani dém cha sharmá póshénag butag.

⁸ Brátáni chammá bigánag butagán o
wati mátay chokkáni démá darámadé.

⁹ Á gayrat ke maná pa Hodáay lógá hastent,
maná jánsócha kant o báhénit o
tai rad o bad kanókáni rad o bad,
mani sará kaptagant.

¹⁰ Á wahdá ke arson rétkag o róchagon dáshtag
sobakk kanag butagán.

¹¹ Á wahdá ke sugi god o póshákon gwará kortagant,
esháni kerrá batalé butagán.

¹² Shahray masteráni gwará nám o dap án o
sharábiáni sawt.

¹³ Bale man, oo Hodáwand, tai rahmay wahdá,
tai dargáhá dwá kanán.

Oo Hodá! Cha wati bázén mehr o wapádáriá,
gón deljamén rakkénagé passaw beday.

¹⁴ Maná cha pujgelán dar kan,
tánke ér maboddhán.
Cha naprat kanókáni panjagá maná berakkén o

cha johlánkén ápán dar kan.

¹⁵ Mayl ke hár maná angerr kanant,
yánke johlánki maná ér barant,
yá mani sará kall wati dapá bebandit.

¹⁶ Oo Hodáwand! Mani passawá beday ke tai rahmat báz ant,
wati rahmatáni kesás o hesábá, wati démá gón man betarrén.

¹⁷ Démá cha wati hezmatkárá mapóshén,
pa mani madatá eshtáp kan
ke sakk tang átkagán.

¹⁸ Nazzik byá o maná berakkén,
dozhmenáni sawabá maná bemók.

¹⁹ Taw á sobakkián wata zánay ke mani sará ant o
mani sharmsári o roswáián,
mani sajjahén dozhmen tai démá ant.

²⁰ Sobakki o béezzatián mani del próshetag o dar mantagán,
rahmay wadárá atán o dastá nakapt,
gamwáréay shóházá atán o naraset.

²¹ Warákay badalá, maná jawresh dát o
wahdé tonníg bután tropshén sharábesh noshént.

²² Parzónagesh dámé bát o
sohl o émeniesh talké.

²³ Chammesh tahár bát o magendátant o
srénesh drahag o larzagá bát.

²⁴ Wati hezhmá áyáni sará begwárén,
gazabay ácheshá pa áyán berasén.

²⁵ Lóg o jágahesh haráb o wayrán bát,
áyáni gedánán hechkas jahmenend mabát.

²⁶ Chiá ke hamáiá ázára rasénant ke taw jatag o
hamáiay ranjáni habará kanant ke taw thappig kortag.

²⁷ Mayár pa mayáresh beladdh,
cha tai adlá bébahr bátant.

²⁸ Cha zendagénáni daptará gár bátant,
gón pahrézkárán yakjáh nebisag mabátant.

²⁹ Bale nun man, setam distag o padard án.
Oo Hodá! Tai neját maná émen bedárát.

³⁰ Hodáay námá gón sawta názénán o
gón bázén shogrgozáriá shán o shawkatia dayán.

³¹ É chizz Hodáyá cha gwaskéá géshter pasonda bit,
cha mazankánth o mazansrombén gókéá.

³² Békebr o darbesh é chizzá ke begendant gal o shádána bant.
Oo Hodáay shóház kanókán! Zendahdel bátét.

³³ Hodáwand nyázmandáni dwáyán gósha dárit o
wati bandigén mardomán bazzag o wára nakant.

³⁴ Ásmán o zemin áiá benázénant,
daryá o áiay tahay sajjahén sahdár.

³⁵ Chiá ke Hodá Sahyuná nejáta dant o
Yahudáy shahrán nóksará addha kant.

Kawm ódá jahmenenda bit o
molkay hakkén wáresa bit.

³⁶ Molk áiay hezmatkárani poshtpaday mirása bit o
áiay námay dóst dárók ódá jahmenenda bant.

Pa mani madatá eshtáp kan

Pa sázger o washázáni sálárá. Dáuday Zabur. Dazbandié.

70 Oo Hodá! Zutt kan o maná berakkén.
Oo Hodáwand! Pa mani madatá eshtáp kan.

² Á ke mani kóshay randá ant,
sarjahl o sharmsár bátant,
á ke mani barbádiá gala bant,
pad bekenzát o roswá bátant.

³ Á ke mani sará “hah, haha” kanant,
cha pashaliá poshtoká kenzántant.

⁴ Bale á ke tai shoházá ant,
sajjahén tai dargáhá shádehi kanát o gal o bál bátant,
á ke tai dátágén nejátesh dósta bit,
modám begwashántant:
“Hodáwand mazanhán ent.”

⁵ Bale man setam distagén mohtájé án.
Oo Hodá! Dém pa man eshtáp kan,
taw mani rakkénók o madatkár ay.
Oo Hodáwand! Dér makan.

Oo Hodáwand! Maná yalah makan

71 Oo Hodáwand! Man tai mayár o báhóth án,
maná sharmsár makan.

² Pa watí adlá maná berakkén o bechotthén,
delgóshá gón man kan o maná berakkén.

³ Mani panáh dayagay talár bay,
ke modám dém pa áiá byáyán.

Taw pa mani rakkénagá hokm kortag,
chiá ke mani talár o kalát taw ay.

⁴ Oo mani Hodá maná cha badkáráni dastá berakkén,
cha setamger o bérahmáni panjagá.

⁵ Chiá ke taw, oo Hodáwand, mani omét ay o
cha kasániá, oo Hodáwand, óst o ométon tai sará butag.

⁶ Cha pédáeshá mani komak kanók butagay,
é taw butagay ke maná cha mátá pédá kortag,
mani satá o sárháyagáni dém modám gón taw ent.

⁷ Pa bázénéá neshánié butagán,
chiá ke taw mani mohréen panáhgáh ay.

⁸ Dapon cha tai tawsipá porr ent,
cha tai shán o shawkatá sajjahén róchá.

⁹ Piriá maná cha watá dur makan,
á wahdá ke twánona kotthit, yalahon makan.

¹⁰ Chiá ke dozhmen mani helápá habará ant,
á ke mani koshagay randá ant hórigá pandala sázant.

¹¹ Gwashant: “Hodáyá yalah kortag,
berawén begeréni,
kassia narakkénit.”

¹² Oo Hodá! Cha man dur mabay.

Oo mani Hodá! Mani madatá eshtáp kan.

¹³ Mani bohtám janók sharmsár o tabáh bátant o
á ke mani ázáray padá ant
pashal o sharmendag bátant.

¹⁴ Bale man modám tai komakay ométwár án o
tará gésh o géshter satá kanán.

¹⁵ Tai ádelén káráni habará kanán,
sajjahén róchá tai dátágén nejátay járá janán,
harchont ke áyáni hesáb cha mani zánagá dhann ent.

¹⁶ Mana káyán o Hodáwanday porwákén káráni járá janán, tahná Hodáwanday,
tai adlay járá janán, tahná tai.

¹⁷ Oo Hodá! Taw maná cha kasániá sój dátag,
modám tai ajabén káráni járá janán.

¹⁸ Oo Hodá! Nun ke pir án o mud espét ant,
maná yalah makan,
tán nökén padréchay nyámá tai zórav járá bejanán o
sajjahén áyókén naslán cha tai wák o twáná sahig bekanán.

¹⁹ Oo Hodá! Tai adl tán borzén arshá ent,
taw ay ke mazanén káret kortag.

Oo Hodá! Tai matth kay ent?

²⁰ Harchont taw maná bázén sakki o sóri pésh dáshtag,
bale padá mani zendá bódénaya^a,
Haw, nöksará maná cha zeminay johlánkiá borzáda káray.

²¹ Mani ezzatá borztera baray
maná padá ásudaga kanay.

²² Man tará gón chang o soróda názénán,
chiá ke taw wapádár ay, oo mani Hodá!
Gón rabábay sázá tará názénán,

^a 71:20 Bódénag, bezán zendá nökén shádábi o napas mán kanag.

oo Esráilay Pákén!

²³ Mani lonth shádmániay kukkárá kanant,
man tará názénán,
ke taw maná móketag.

²⁴ Sajjahén róchá tai ádelén káráni zegrá kanán
chiá ke á ke mani ázár rasénagay lóthók atant,
sarjahl o sharmsár butagant.

Wati adlá bádsháhá baksh

Solaymánay Zabur.

72 Oo Hodá! Wati adlá bádsháhá bebaksh,
wati ensápá bádsháhay chokká,

² tánke á pa ensáp tai kawmay sará dádrasi bekant,
setam distagénáni sará pa adl.

³ Kóh pa kawmá ábádi byárátant,
jomp o tomp, pahrézkáriay samará.

⁴ Bádsháhay kawmay setam distagénáni hakká bedayát,
mohtájáni chokkán berakkénát o
setamgerán tabáh kanát.

⁵ Nasláni nasl tai sharap o ezzatá bedárátant,
tánke rócha drapshit,
tánke máh nura dant.

⁶ Bádsháhay hákemi hamá hawráni paymá bát ke rotagén sabzagáni sará gwárant,
hamá hawráni paymá ke zeminá sérápa kanant.

⁷ Áiay ahdá pahrézkár shádáb bátant,
tán hamá wahdá ke máh nura dant ábádi bát.

⁸ Daryá tán daryá áiay bádsháhi barjáh bát o
cha kawrá^a tán zeminay goddhi simsarán.

⁹ Áiay dargáhá gyábánay nendók sará jahl bekanátant,
áiay dozhmen hák bechatthátant.

¹⁰ Tarshish o tayábgwaráni^b sardhagáray bádsháh hamáiá song o máliát bedayátant,
Shébá o Sabáay bádsháh pa áiá théki byárátant.

¹¹ Sajjahén bádsháh, áiay démá sará jahl bekanátant,
sajjahén kawm áiay hezmatá bekanátant.

¹² Chiá ke á hájatmandán hamá wahdá rakkénit ke peryáta kanant,
setam distagénán o hamáyán ke madatkáré néstesh.

¹³ Nezór o hájatmandáni sará rahma kant o
hájatmandáni zendá rakkénit.

¹⁴ Áyáni zendá cha zolm o sheddatá nejáta dant,
áyáni hóná gránkimmata zánt.

¹⁵ Omri báz bát,
Sabáay teláh áiay peshkash bátant.
Mardom modám áiay dwágó bátant o

^a 72:8 Bezán cha Parátay kawrá. ^b 72:10 Tayáb, bezán daryáay kerr, sáhel.

sajjahén róchá pa áiá barkat belóthátant.

¹⁶ Gandom sajjahén moltká anchosh báz bát ke
jompáni sará chawl bejant o
bar o samari anchosh báz bát ke Lobnáná ent.

Shahrán mardom anchosh ábád bátant ke sabzag mán dhagárán.

¹⁷ Bádsháhay nám namirán bát,
tán rócha drapshit nám o tawári bemánát.
Sajjahén kawm cha áiá barkat begerátant o
áiá mobárak begwashátant.

¹⁸ Hodáwandén Hodáyá satá bát, Esráilay Hodáyá,
ajabén káráni kanók tahná hamá ent.

¹⁹ Áiay porshawkatén námá tán abad satá bát,
áiay shán o shawkat sajjahén zeminá begerát.
Anchosh bát. Ámin.

²⁰ Dáude Yassiay dwá hamedá kotthant.

Zaburay sayomi ketáb

Zabur 73—89

Á ke cha taw dur ant gár o gomsára bant

Asápay Zabur.

73 Pa rásti Hodá pa Esráilá mehrabán ent,
pa hamáyán ke delesh sáp ent.

² Bale kammé mantagat bethagalán,
nazzik at pád belakoshant.

³ Chiá ke pa porkebrán hasaddi bután,
hamá wahdá ke man badkár ábádi o ásudagiá distant.

⁴ Chiá ke áyán tán marká dardé per nést o
wassh o sérláp ant.

⁵ Á degaráni paymá ranj o zahmatá naant o
mardomi baláháni tahá nakapant.

⁶ Paméshká kebr áyáni gwaray hár ent o
hezhm o gazab áyáni póshák.

⁷ Chammesh cha pazzóriá dar átkagant o
delay hayálánesh haddé nést.

⁸ Pa maskará o badwáhi habara kanant,
pa kebr zolm o setamá wati zobáná kárant.

⁹ Dapá ásmánay helápá pacha kanant o
zobánesh sajjahén zeminá gipt.

¹⁰ Paméshká kawm dém pa áyána rawt o
pa galé hamáyáni dastay ápána wárt.

¹¹ Gwashant: “Hodá che paymá zánt?
Borzén arshay Hodáyá é dhawlén zántkári hast?”

¹² Haw, badkár chosh ant,
modám ásudag ant o mál o melkatesh démá rawán ent.

¹³ Pa rásti man wati del mopt o náhudagá pák dáshtag o
dast mán bégonáhiá shoshtagant.

¹⁴ Har róch ázárán kaptagán o
har sohbá hakkala warán.

¹⁵ Agan begwashténon: “É habarána kanán,”
man tai chokkáni nasl dróhetagat.

¹⁶ Wahdé é sajjahén chizzáni zánagay johdon kort,
pa man grán at,

¹⁷ tán hamá wahdá ke Hodáay pákén jágahá shotán.
Nun é mardománi ákebaton dist.

¹⁸ Pa rásti áyán lakoshánkén jáhána perrénay,
gár o gomsáriay chátá dawra dayay.

¹⁹ Anágat gár o zawála bant,
cha torsá sarjamá bérána bant.

²⁰ Wábéay dhawlá ant ke wahdé chamm pacha bant gára bit,
á wahdá ke taw páda káay, oo Hodáwand,
eshán wahméay paymá mána nayáray.

²¹ Á wahdá ke mani arwáh zahr o tahl at o
del résh,

²² bépahm o nazántkár atán,
tai dargáhá haywánéay paymá,
cha pahm o póhá dhann.

²³ Angat ham modám gón taw án,
taw mani rástén dastá geray.

²⁴ Gón wati sar o sóján maná rahshónia kanay o
randá gón shán o shawkaté zuray.

²⁵ Ásmáná, abéd cha taw maná kay hast?!

Zeminá ham, abéd cha taw hech chizzé nalóthán.

²⁶ Mani jesm o jáñ o del balkén zawál bebant,
bale Hodá mani delay kalát ent,
tán abad mani gisshetagén bahrwandh.

²⁷ Pa rásti á ke cha taw dur ant gár o gomsára bant o
hamáyán bérána kanay ke gón taw béwapá ant.

²⁸ Bale pa man wasshi hamesh ent ke Hodáay nazziká bebán,
Hodáwandon wati panáhgáh kortag,
tán tai sajjahén kárán jár bejanán, oo Hodáwand!

Oo Hodá! Chiá márá yalah dátaget?

Asápay shayri gwashtánk.

74 Oo Hodá! Chiá márá tán abad yalah dátaget?

Pa ché tai hezhmay ás pa tai charágáhay pasán rók ent?

² Wati kawmay yátá bekap,
ke taw cha déréen zamánagán pa bahá zortagatant,
ke taw móketagant tán tai kawm o mirás bebant.

Sahyunay kóhay hayálá bekap ke ódá jahmenend butagay.

³ Wati gámán dém pa wati hamé modámigén wayránagán betarrén,
chiá ke dozhmená har chizz bérán kortag ke tai pákén jágahá butag.

⁴ Dozhmenán tai didárjháhay tahá gorret o
wati bayrak^a pa neshániá mekk kortant.

⁵ Hamáyáni paymá atant ke wati taparán
jangalay drachkáni sará borza barant.

⁶ Áyán, tai pákén jágahay sajjahén ájetagén dár
góñ wati tapar o téshagán prósh o hurt kortant.

⁷ Tai pákén jágahesh ás kasshet o hák o por kort,
tai námay menendjháhesh palit kort.

⁸ Wati delá gwashtesh: “Áyán sarjamiá wati panjagay chérá kárén,”
gorhá Hodáy sajjahén didárjháhesh é sardhagárá sótkant.

⁹ Nun hech neshánié nagendagá én,
hech nabié pasht nakaptag o
cha má kass ham nazánt ke tán kadén é paymá bit.

¹⁰ Oo Hodá! Tán kadén dozhmen tai sará bekandit?
Dozhmen tán abad tai námá bad o rad bekant?

¹¹ Chiá wati dastá poshtá dáray,
wati rástén dastá?
Dastá pach kan o pa áyán góri o tabáhié byár.

¹² Bale Hodá cha déréen zamánagán mani bádsháh ent,
ke zeminay sará nejátbakshén kára kant.

¹³ É taw atay ke daryáet góñ wati zór o wáká do nérm kort o
daryáay baláháni saret ápáni nyámá próshtant,

¹⁴ Liwyátánay^b saret próshtant o
gyábánay sahdáráni waráket kort.

¹⁵ Jó o sarchammag, taw rombént o rawán kortant,
modámigén kawr, taw hoshk kortant.

¹⁶ Róch taig ent o shap ham tai
máh o róch taw barjáh dáshtagant.

¹⁷ É taw atay ke zeminay hand o simsaret gisshéntant,
garmág o zemestánay addh kanók taw ay.

^a 74:4 Bayrak, bezán parcham. ^b 74:14 Liwyátán mazanén ápi rastaré butag.

¹⁸ Oo Hodáwand! Yátá bekap ke dozhmen che paymá maskará kanant o názántén mardom tai námá che paymá bad o rada gwashant.

¹⁹ Wati kapótá rastaráni warák makan o setam distagén kawmay zendá tán abad mashamósh.

²⁰ Wati bastagén ahdá bedár,
chiá ke é sardhagáray tahárén jágah
cha zolm o zórav kodóh o kodámá porr ant.

²¹ Mayl ke pádmálén mardom góón roswái pad bekenzant,
setam distag o hájatmand tai námá satá bekanátant.

²² Oo Hodá! Jách jan o wati hakkay démpániá bekan,
yátá bekap ke názánt sajjahén róchá che paymá tai sará kandant.

²³ Wati dozhmenáni kukkanári mashamósh,
dozhmenáni shóreshá ke modám borzád ent.

Hodá ádel ent

Pa sázger o washawázáni sálárá. “Barbád makanay” tarzay sará. Asápav Zabur. Sawté.

75 Oo Hodá! Tai shográ gerén,
tai shográ gerén ke tai nám nazzik ent o
mardom tai ajabén káráni habará kanant.

² Taw gwashay: “Wati gisshéntagén wahdá
pa ensáp dádrasia kanán.

³ Hamá wahdá ke zemin o áiay sajjahén nendóka larzant,
é man án ke áiay pádagán mohra dárán. Ósht...

⁴ Gón porkebrán gwashán: ‘Pahr mabandét,’ o
gón badkárán: ‘Wati kánthán borz makanét.

⁵ Wati kánthán enkadar borz makanét o
pa kebr o gorunáki habar makanét.”

⁶ Chiá ke sarperázi na cha ródarátká kayt,
na cha rónendá o na cha gyábáná.

⁷ É Hodá ent ke dádrasia kant,
yakkéá éra jant o yakkéá sarborza kant.

⁸ Chiá ke Hodáay dastá jámé,
cha porjóshén sharáb o tahlagá porr ent.
Sharábá réchit o zeminay sajjahén badkár
áiá tán goddhi trampá warant.

⁹ Bale man modám Hodáay káráni habará kanán,
Ákubay Hodáyá názénán.

¹⁰ “Sajjahén badkáráni kánthána próshán,
bale pahrézkáráni kánth borz dáraga bant.”

Hodáay démá kay óshtáta kant?

Pa sázger o washawázáni sálárá. Gón simmi sázán. Asápay zabur. Sawté.

76 Yahudiahá Hodá zánag o pajjáh áraga bit,
Esráilá áiay nám mazan ent.

² Áiay tambu Shalimá^a ent o
menendjáh, Sahyuná.

³ Ásgwárén tiri hamódá próshtant,
zahm o espar ham, ke jangi seláh ant. Ósht...

⁴ Taw drapshán ay o
shawkat o shánet, cha á kóhestagán zébáter ent ke shekárá porr ant.

⁵ Delér áwár janag butant,
wati goddhi wábá ant,
cha jangáwarán yakké ham namant
ke dasté besorénit.

⁶ Oo Ákubay Hodá! Cha tai neherrán,
áyáni arrábah o aspán sar pa markay wábá dát.

⁷ Taw bákamál ay,
wahdé hezhma geray, kay tai démá óshtáta kant?

⁸⁻⁹ Taw cha ásmáná dádrasia kanay o
wahdé taw, oo Hodá, pa dadrasiá jáha janay
ke zeminay sajjahén setam distagénán neját bedayay,
zemin cha torsá chopp o bétawára bit. Ósht...

¹⁰ Pa ensáná tai hezhm ham tai satáay sawaba bit o
pasht kaptagén hezhmá taw wati lánká banday.

¹¹ Gón wati Hodáwandén Hodáyá kawl bekanét o wati zobánay sará bóshtét,
á sajjahén ke kerr o gwarán ant
pa hamáiá théki byárant ke bákamál ent.

¹² Á hákemáni gorurána próshit,
zeminay bádsháh cha áiá torsant.

Sakki o sóriáni róchá Hodáay shóházá án

Pa sázger o washawázáni sálárá. Pa Jedutuná. Asápay Zabur.

77 Man Hodáyá tawára kanán o pa komaká hamáiá gwánka janán,
mani peryát gón Hodáyá ent o á mani áwázá gósha dárit.

² Sakki o sóriáni róchá Hodáwanday shóházá án,
sajjahén shapá mani dast dráj ant o dama nabarán,
mani arwáh áram geraga nalóthit.

³ Hodáyá yáta kanán o nálán,
pegra kanán o delprósha bán. Ósht...

^a 76:2 Shalim hamá Urshalim ent.

⁴ Taw mani chammán nazz bayagá naylay,
paréshán án o habar korta nakanán.

⁵ Gwastagén wahdáni hayálá kapán,
kwahnén ahd o bárigáni.

⁶ Shapán, wati sawtay hayálá kapán,
delá báz pegriga bán o arwáhon josta kant:

⁷ “Hodáwand tán abad yalaha kant o
padá hechbar mehrabána nabit?

⁸ Áiay mehr pa modámi halás butag o
kawli pa sajjahén naslán zawl?

⁹ Hodáyá mehrabán bayag shamoshtag o
wati rahmati hezhmay tahá band kortag?” Ósht...

¹⁰ Mana gwashán: “É shakk o sawál maná ranjénant.
Nun hamá ahd o bárigáni hayálá kapán
ke borzén arshay Hodáyá wati rástén dast shahártag.”

¹¹ Oo Hodáwand! Tai kárán yáta kanán,
tai ajabén kárán ke taw péshi zamánagán kortagant.

¹² Tai kortagén sajjahén káráni bárawá pegra kanán o
tai kerdáni hayálá bán.

¹³ Oo Hodá! Tai ráh pák ent.

Kojám hodá may Hodáy paymá mazan buta kant?

¹⁴ Taw hamá Hodá ay ke ajabén kára kant.

Taw wati zór o wák sajjahén kawmáni nyámá pésh dáshtag,

¹⁵ gón wati básk o kodratá wati kawm rakkéntag,
Ákub o Issopay chokk. Ósht...

¹⁶ Ápán tará dist, oo Hodá!
Ápán tará dist o larzetant,
johlánki drahagá laggetant.

¹⁷ Jambarán ápa gwart o
ásmánán grandet,
tai grókay tir har némagá retkant.

¹⁸ Tai granday tawár danz o gwátáni tahá at,
tai nurá jahán róshná kort,
zemin larzet o jombet.

¹⁹ Tai ráh cha mazanén daryáyá gwast o
tai keshk cha mazanén ápán,
bale tai pádáni pad gendag nabutant.

²⁰ Taw wati kawm Mussá o Hárunay dastá rahshóni kort,
ramagéay paymá.

Eshiá pa démi naslán sar kanét

Asápay shayri gwashtánk.

78 Oo mani kawm! Mani sóján gósh dár o
delgóshá gón mani habarán kan.

² Wati dapá pa batal pacha kanán o
kwahnén chách o chistánán máná kanán,

³ hamá ke má eshkotag o zántagant,
hamá ke may pirénán márá gwashtagant.

⁴ Eshán cha áyáni chokk o nomásagán chéra nadayén,
gón áyókén naslá Hodáwanday porshawkatén káráni kessahá kárén,
Hodáwanday zór o twánay kessahá kárén o
áiay kortagén ajabén mójezaháni kessahá.

⁵ Áiá gwáhié pa Ákubá esht,
Sharyati pa Esráilá áwort o
may pet o piréni parmán dátant
ke eshán wati chokk o nomásagán sarpad bekanét,

⁶ tán démi naslesh bezánant o
hamá chokk ham ke angat pédá nabutagant,
wati wahdá, gón wati chokk o nomásagán esháni kessahá bekanant,
⁷ tánke á ham Hodáay sará tawkal bekanant o
Hodáay kárán mashamóshant o
áiay hokmán bemannant.

⁸ Wati pet o pirénáni paymá mabant,
sarkash o mánmayátk^a
ke delesh gón Hodáyá nabast o
arwáhesh gón Hodáyá wapádár naat.

⁹ Epráimi, harchont ke gón kamánán selahband atant,
bale janagay róchá tatkant.

¹⁰ Áyán Hodáay ahd nadásht o
wati delá shawresh kort ke “áiay Sharyatay sará zenda nagwázénén.”

¹¹ Áiay kortagén káresh shamoshtant,
hamá ajabén kár ke áyáná péshi dáshtagatant,

¹² Hamá kár ke áyáni pet o pirénáni démá kortagatanti,
Mesray moltká, Zohánay gyábáná.

¹³ Áyáni démay daryái ném kort o ái gwázéntant,
ápi, doén démán chó diwálá mekk kort.

¹⁴ Róchá, gón jambará rashónii dátant o
shapá gón ásay rozhná.

¹⁵ Gyábáná, talári tal kortant o
áyáná, johlén zeréay kesásá ápi dát.

¹⁶ Cha talárán chammagi bótkant o
ápi chó kawrá rombént.

^a 78:8 Mánmayátk, bezán hamá ke kassá namannit.

¹⁷ Bale áyán angat géshter gonáh kort o
gyábáná borzén arshay Hodáay helápá shóreshesh kort.

¹⁸ Hodáesh pa zánt hamá warákáni sará chakkáset
ke áyáni delá lóthet.

¹⁹ Hodáay helápá habaresh kort o gwashtesh:
“Hodá é gyábáná parzónagé pach korta kant?

²⁰ Talári wa jat o cha áiá áp rawán but o
kawr sar rechán butant,
bale wati mardomán nán ham dátá kant?
Yá pa wati kawmá gósh ham tayár korta kant?”

²¹ Hodáyá ke eshkot, zahr gept,
ásé pa Ákubá róki kort,
hezhmi pa Esráilá chest but.

²² Chiá ke Hodáay sará imánesh néstat o
báwaresh nabut ke Hodáesha rakkénit.

²³ Ásmáni pa pach bayagá parmán dát o
arshay darwázagi pach kortant.

²⁴ Manni^a pa áyán chó hawrá gwart ke bwarant,
ásmáni gandomi bakshátant.

²⁵ Mardomán préshtagi warák wárt,
pa áyán békesás waráki rawán dát.

²⁶ Cha ásmáná ródarátki gwáti sar dát o
góñ wati zórá jonubi gwáti chest kort.

²⁷ Danzáni paymá pa áyán góshti gwárént,
daryáay rékáni kesásá, báli morg,

²⁸ áyáni ordgáhá^b éri áwortant,
áyáni gedánáni kerr o gwarán.

²⁹ Wárt o séresh kort,
pa har chizzá ke áyán hers at, dátanti.

³⁰ Bale cha áyáni hersay purah bayagá pésar,
ke warákesh angat dapá at,

³¹ Hodáay hezhm áyáni sará pád átk,
áyáni zórmandterén mardomi koshtant o
Esráilay warnái jokkéntant.

³² É sajjahén káresh distant o angat ham gonáhesha kort o
áiay ajabén káráni sará báwaresha nakort.

³³ Gorhá áyáni róchi pa náhudagi halás kortant o
sál pa tors.

³⁴ Hodáyá ke áyáni koshag bendát kort, nun áiay shóházá dar kaptant.
Dém pa Hodáyá per tarretant o pa setk o del Hodáay shóházá butant.

³⁵ Hayálá kaptant ke Hodá áyáni talár ent,
hamá borzén arshay Hodá, áyáni posht o panáh.

³⁶ Bale góñ wati dapá, góñ áiá charpzobániesha kort o
góñ zobáná drógesha bast.

^a 78:24 Mann hamá ásmáni nagan ent ke Mussáay zamánagá, Hodáyá pa Bani Esráilián hamá wahdá ér áwort ke á barr o gyábánán sapará atant. ^b 78:28 Ordgáh hamá jágha ent ke mardom pa kasánén wahdéá gedána bandant o nendant.

³⁷ Delesh gón áiá wapádár naat o
áiay bastagén ahdesh nadásht.

³⁸ Bale á angat mehrabán at o áyáni gonáhi bakshetant o
sajjahéni nakoshtant.

Rand pa randá wati hezhmia dásht o
wati sajjahén gazabi darshána nakort.

³⁹ Zánti ke é hákién ensán ant,
rawókén gwáté ke padá pera natarrit.

⁴⁰ Gyábáná chinchok randá cha Hodáyá sarkashiesh kort,
ódá áesh gamig kort.

⁴¹ Rand pa randá Hodáesh chakkáset,
Esráilay pákénesh ázár dát.

⁴² Áiay dastay zóresh yát nakort
ke á róchá chón cha dozhmenáni dastá rakkéntanti,

⁴³ hamá wahdá ke Mesrá wati neshánii paddar kortant o
Zohánay gyábáná ajabén kári kort.

⁴⁴ Áyáni kawri hóná badal kortant
ke kassá cha wati jóán áp wárta nakort.

⁴⁵ Makeskáni rombi áyáni nyámá ráh dátant ke makeskesh bwarant o
pogoláni romb, ke barbádesh bekanant.

⁴⁶ Áyáni keshári madagáná dátant o
bar o samar kathagán^a wártant.

⁴⁷ Áyáni anguri gón tróngalá zawál kortant o
enjiráni drachk, gón hár o tuppánán.

⁴⁸ Áyáni ramagi pa tróngal koshtant o
dalwat, pa grand o grók.

⁴⁹ Wati sóchókén kahr o gazabi áyáni sará rawán dát,
kahr o gazab o azáb,
gár o gomsár kanókén préshtagáni thólié áyáni sará.

⁵⁰ Ráhi pa wati hezhmá rást o tachk kort,
cha marká narakkéntanti, wabáyáni dapái dátant.

⁵¹ Mesray sajjahén awali chocchi jatant,
Mesray^b gedánnendáni mardánagiay awali bar o samar.

⁵² Bale wati mardomi ramagay paymá sar dát o bortant,
pasáni dhawlá gyábánán rashónii kortant.

⁵³ Ái pa émeni rahshóni kortant ke matorsant
bale áyáni dozhmen daryáyá mán patátant.

⁵⁴ Gorhá ái wati pákén zeminá sar kortant,
hamá kóhestagén molká ke gón wati rástén dastá geptagati.

⁵⁵ Áyáni démá kawmi cha ódá dar kortant,
kawmáni zemini áyáni mirás kortant o
Esráilay kabilahi gedánáni tahá jahmenend kortant.

⁵⁶ Bale angat áyán borzén arshay Hodá chakkáset o
áiay helápá sarkashiesha kort,

^a 78:46 Kathag madagay záté. ^b 78:51 Asligén Ebráni syáhaga gwashit “Hámay”, ke pa Mesrá eshárahé.

áiay hokmesha namannet.

⁵⁷ Wati pirénáni paymá rástén ráhesh yalaha dát o béwapá butant,
chó sost o nábáwarén kamáná mantant.

⁵⁸ Borzén jáhán bothánahesha bast o Hodáesh zahra baráént,
botesha jórhént o Hodáesh hasaddiga kort.

⁵⁹ Hodáyá ke dist,^a sakk hezhm gept o
Esráili sarjamiá yalah kort.

⁶⁰ Wati Shiluhay menendjáhi yalah kort,
hamá tambu ke Hodá ódá mardománi nyámá jahmenend at.

⁶¹ Wati zór o wákay pétti^b bandig kanáént,
wati shán o shawkatay neshánii dozhmenáni dastá dát.

⁶² Wati kawmi zahmáni dapá dát,
wati mirásay sará sakk hezhmnák but.

⁶³ Warnáén bachak, ásá wártant o
jenek, pa suri názénkán sar nabutant.

⁶⁴ Dini péshwá zahmáni dapá kaptant o
janázámán gréta nakort.

⁶⁵ Nun Hodáyá anchosh jáh jat ke yakké cha wábá bosta kant,
chó ke jangólé cha sharábay békóshiá jáh bejant.

⁶⁶ Wati dozhmeni jat o poshtá kenzént o
abadi roswáiéá dawr dátant.

⁶⁷ Bale Issopay tambui nádóst kort o
Epráimay kabilahi nazort,

⁶⁸ Yahudáay kabilahi gechén kort,
Sahyunay kóh, ke dóst ati.

⁶⁹ Wati pákén jágahi, borzagáni paymá addh kort,
zeminay paymá namirán, jórhi kort.

⁷⁰ Wati hezmatkárén Dáudi gechén kort o
cha pasáni gwáshá dari kort,

⁷¹ cha edá o rand, ái cha mésháni shopánkiá dar kort o
wati kawm, Ákubay shopánki kort,
wati mirás, Esráilay.

⁷² Dáudá gón sápén delé áyáni shopánki kort o
gón honarmandén dasté áyáni rahshón but.

Bandigáni peryát tará sar bátant

Asápay Zabur.

79 Oo Hodá! Kawmán tai mirás geptag,
tai pákén parasteshgáhesh palit kortag o
Urshalim, wayrán.

² Tai hezmatkáráni jónesh bíli morgáni warák kortag o
tai wapádáráni jánay gósh, rastaráni.

³ Esháni hónesh ápay paymá sajjahén Urshalimá rétkag,

^a 78:59 Asligén Ebráni nebeshtánka gwashit: "Hodáyá ke eshkot..." ^b 78:61 Péti, bezán sanduk.

kass namant ke mordagán kabr bekant.

⁴ Hamsáhegáni démá roswá butagén o
kash o kerray mardománi kalági.

⁵ Oo Hodáwand! Tán kadén zahra bay? Tán abad?

Tán kadén tai hasadd ásay paymá róka bit?

⁶ Wati gazabá hamá kawmáni sará begwár ke tará pajjáha nayárant o
hamá molkáni sará ke tai námá nagerant,

⁷ ke Ákubesh wártag o ér bortag o
áiay molkesh wayrán kortag.

⁸ Gwastagén nasláni gonáhán may sará maladdh,
tai rahmat zutt may sará byáyátant
ke sakk wár o bazzag én.

⁹ Oo may rakkénökén Hodá! Márá madat kan,
wati námay shán o shawkatay sawabá,
pa wati námaygi márá berakkén o
may gonáhán bebaksh.

¹⁰ Chiá darkawm begwashant:
“Esháni Hodá kojá ent?”

May chammáni démá kawm begendátant ke
taw wati hezmatkáráni retkagén hónáni bérá geray.

¹¹ Bandigáni áh o peryát pa taw sar bátant,
góñ wati báskay zórá
hamáyán berakkén ke koshag bayagá ant.

¹² Oo Hodáwand! Cha may hamsáhegán hamá sobakkiáni bérá
hapt sari géshter beger ke tai sháná kortagantesh.

¹³ Gorhá má, tai kawm
ke tai charágáhay pas én,
tán abad tai shográ gerén,
nasláni nasl tará satá kanén.

Hodá! Wasshán bay

Pa sázger o washawázáni sálárá, “Susanáni” tarzay sará. Gwáhié. Asápay Zabur.

80 Oo Esráilay shopánk! Gósh dár,
taw ke shopánkéay paymá Issopay ramagay rahshón ay.
Oo Hodá! Taw ke karrubiáni^a nyámá bádsháhi tahtá neshtagay,
wati nurá tálán kan.

² Epráim, Benyámin o Manassiay démá,
wati wák o tágatá borz kan o
pa may rakkénagá byá.

³ Oo Hodá! Gón má wasshán bay

^a 80:1 Karrubi, ásmáni mahluké ke báñzolesh per o Hodáay tahtay chapp o chágerdá ant.

wati démá gón má rozhná kan
ke má berakkén.

⁴ Oo Hodáwand! Lashkaráni Hodá! Tán kadén
hezhmay ásá wati kawmay dwáyáni sará gwárána bay?

⁵ Taw áyáná arsay nagan o
arsáni sarréchéni jám wárént.

⁶ Taw márá hamsáhegáni démá bannám kortag o
dozhmen márá kalága bandant.

⁷ Oo lashkaráni Hodá! Gón má wasshán bay
wati démá gón má rozhná kan
ke má berakkén.

⁸ Taw anguray drachké cha Mesrá gwatk,
taw kawm dhanná dar kortant o é drachk kesht.

⁹ Taw zemin pa áiá práh kort,
gorhá risshagi jat o zemini porr kort.

¹⁰ Áiay sáhegá kóh póshetant o
áiay sháharhán, rostagén gazz.

¹¹ Sháharhi tán Myánzerá^a o
tháli tán Parátay kawrá sar butant.

¹² Gorhá taw chiá áiay pall próshť o dawr dát
ke hamok rahgwaz áiay barán bechent?

¹³ Jangali hukk áiá éra barant o
dashtay jánwaria warant o séra kanant.

¹⁴ Oo lashkaráni Hodá! May gwará per tarr,
cha ásmáná delgósh kan o bechár,
é anguray delgóshá bedár,

¹⁵ hamé anguray ke tai rástén dastá kesht,
hamé chokkay ke taw pa wat ródént o zórmand kort.

¹⁶ Dozhmenán angur goddhet o ásá dawr dát,
é gón tai hakkaléá gár o gomsár bátant.

¹⁷ Tai dast hamá marday sará bát ke tai rástén némagá ent,
hamá ensánay chokkay sará ke taw pa wat ródént o zórmand kort.

¹⁸ Gorhá má wati démá cha taw natarrénén,
márá zend bebaksh ke tai námá begerén.

¹⁹ Oo Hodáwand, lashkaráni Hodá! Gón má wasshán bay,
wati démá gón má rozhná kan
ke má berakkén.

^a 80:11 Myánzer, hamá daryá ent ke Yurop o Áprikkáay nyámá ent. Engréziá: Mediterranean Sea.

Drégatá mani kawmá mani habar gósh bedáshtén

Pa sázger o washáwázáni sálárá. “Gittitay”^a tarzay sará. Asápay Zabur.

81 Hodáyá pa shádehi benázénét ke may zór o wák ent,
pa Ákubay Hodáyá shádmániay kukkárá borz kanét.

² Sáz o tamburagá bongéj kanét,
washtawárén chang o soródán.

³ Mähay nöká, gwarándhay kánthay^b tawará borz kanét,
mähay chárdahá, may pákén aidá.

⁴ É pa Esráilá hokmé,
rahbandé cha Ákubay Hodáy némagá.

⁵ Wahdé Mesray helápá dar átk
kánuné pa Issopá eshti.

Man eshkot, nááshnáén zobánéá gwasht:

⁶ “Báron cha áiay kópagá dur kort o
dast cha gránén saptá ázát kortant.”

⁷ Taw sakkiáni sáhatán peryát kort o man tará rakként,
man grandán andém atán o tará passaw dát,
Meribáay ápáni kerrá tará chakkáseton. Ósht...

⁸ Oo mani kawm! Beshkon ke tará dháha dayán,
Oo Esráil! Drégatá^c taw mani habar gósh bedáshtén.

⁹ Shomay nyámá darámadén hodáé mabát o
bigánagén hodáéay démá sará jahl makanét.

¹⁰ Man Hodáwand án, tai Hodá
ke tará cha Mesrá dar kort o áwort.
Wati dapá sarjamá pach kan,
ke man porria kanán.

¹¹ “Bale kawmá mani habar gósh nadásht o
Esráil mani parmánbardár nabut.

¹² Gorhá man á yalah dátant ke wati sengén deláni randgiriá bekanant,
wati jenday ráh o hayáláni.

¹³ Drégatá mani kawmá mani habar gósh bedáshtén o
Esráil, mani ráhá beshotén.

¹⁴ Á wahdá man damáná áyáni dozhmen prósh dátagatant o
mani dast áyáni dozhmenáni helápá chest butagat.

¹⁵ Hamá ke cha Hodáwandá naprata kanant, dotal o sarjahl butagatant,
tán abad anchosh butagat.

¹⁶ Bale tará gehterén gandomay warákon dátagat o
tará cha talárá dar kortagén bénagá séron kortagat.”

^a 81:0 Báwar esh ent ke Gittit muzikay yak gálé.

^b 81:3 Gwarándhay kánth Esráiliáni kerrá sázé.

^c 81:8 Drégatá,

bezán drécha, Pársia “káshki”.

Nezóráni hakká begerét

Asápay Zabur.

82 Hodá, wati Hodái bárgáhá barjam ent,
“hodáyáni” diwáná dádrasia kant.

² Tán kadén pa náensápi shawra borrét?
Tán kadén badkáráni badalá bét? Ósht...

³ Nezór o chórhawáni dadrasiá bekanét o
garib o setam distagénáni hakká begerét.

⁴ Nézgár o hájatmandán berakkénét o
cha badkáráni dastá ázát kanét.

⁵ É “hodá” heccha nazánant o sarpada nabant,
taháriá sargardán ant o
zeminay sajjahén bonyád larzagá ant.

⁶ Gwashton: “Shomá ‘hodá’ ét o
shomá sajjahén, borzén arshay Hodáay chokk ét,

⁷ Bale mardománi paymá merét o
shahzádagáni paymá sarshakuna bét.”

⁸ Oo Hodá! Ják jan o zeminay dadrasiá bekan,
ke sajjahén kawm tai mirás ant.

Oo Hodáwand! Bétawár mabay

Asápay Zabur. Sawté.

83 Oo Hodá! Bétawár mabay,
hámósh mabay o hoshká manend, oo Hodá!

² Bechár ke tai dozhmen che paymá gorrant o
cha taw naprat kanókáni sar chón borz ent.

³ Tai kawmay helápá pa cháláki pandala sázant o
tai gránkadrénáni helápá shawr o saláha kanant.

⁴ Gwashant: “Byáét gár o gomsáresha kanén ke kawmé mamánant o
Esráilay nám pa yátéá ham pasht makapit.”

⁵ Pa hamdeli shawresh kortag o
tai helápá ahdé bastagesh.

⁶ Edumi o Esmáili,
Muábi o Hágári,

⁷ Gébáli, Ammini o Amálikí,
Pilsti o Suray nendók,

⁸ Áshuri ham gón áyán hamráh ant o

pa Lutay chokkán báské butagant. Ósht...

⁹ Gón áyán hamá paymá bekan ke taw gón Midyáná kort,
gón Siserá o Yábiná, Kishunay kawray kerrá,

¹⁰ ke Endórá tabáh butant o
zeminay kad o samát^a butant.

¹¹ Esháni sardárán Óréb o Zehébay paymá kan,
shahzádagánesh Zebah o Zalmunnáay dhawlá,

¹² ke gwashtagatesh: “Byáét Hodáay charágáhán pa zóra gerén.”

¹³ Oo mani Hodá! Eshán danzéay paymá bál day,
chó ke paláré, gwátay démá.

¹⁴ Anchosh ke ás jangalá sóchit o
kóhán mána dárit,

¹⁵ gón wati tuppánán randáesh kap o
gón syahgwátán betorsénesh,

¹⁶ démáesh cha sharmá syáh kan
tánke tai námay shóházá bebant, oo Hodáwand!

¹⁷ Sharmsár bát o abadi torséá kapátant,
roswá bát o bemerátant.

¹⁸ Bell bezánant ke tai nám Hodáwand ent o
tahná taw, oo borzén arshay Hodá,
sajjahén zeminay sará hákemia kanay.

Pa Hodáwanday parasteshgáhá hodónák án

Pa sázger o washázáni sálárá. Kórahay chokkáni Zabur. “Gittitay”^b tarzay sará.

84 Oo lashkaráni Hodá!

Tai bárgáh chón dóstnák ent.

² Mani arwáh pa Hodáwanday parasteshgáhay péshjáhán^c shaydá o hodók ent,
mani del o jáñ pa zendagén Hodáyá pa shádehi kukkára kant.

³ Jengolá ham pa wat lógé dar gétk o
pistáná^d pa wat kodohé
ke wati chureg o chippokán ódá beródénit,
tai korbánjáhay nazziká, oo lashkaráni Hodáwand,
mani bádsháh o mani Hodá!

⁴ Bahtáwar ant hamá ke tai bárgáhá jahmenend ant,
á modám tará názénant. Ósht...

⁵ Chón bahtáwar ant hamá ke wák o zóresh cha tai némagá ent o
delesh tai ráhán ent.

⁶ Á, wahdé cha arsáni^e daragá gwazant,
daragá cha chammagá porra kanant o
tákchandhay mósomay hawr ham áiá rahmata póshénit.

^a 83:10 Kad o samát, sakan o ólém ent ke Orduá “khád” o Pársia “kud” gwashaga bit. ^b 84:0 Báwar esh ent ke Gittit muzikay yak gálé. ^c 84:2 Péshjáh, bezán péshgáh, lögay chárdiwál, sahn. ^d 84:3 Pistán kasánén morgé. ^e 84:6 Bakáay darag, ke mánái arsáni darag ent.

⁷ Cha mohrá mohrter bayána bant
tán hamá wahdá ke Sahyuná Hodáay bárgáhá rasant.

⁸ Oo Hodáwand, lashkaráni Hodá! Mani dwáyá gósh dár,
beshkon, oo Ákubay Hodá! Ósht...

⁹ May bádsháhá^a delgósh kan, oo Hodá!
Wati rógen per moshtagéná^b delgósh kan.

¹⁰ Tai bárgáhay yak róché
gehter ent cha dega jágahéay hazárán róchá,
cha badkáráni tambuáni tahá áramén zendéay gwázenagá
maná wati Hodáay dargáhay dapá óshtag dóstera bit,

¹¹ ke Hodáwandén Hodá róch o esparé,
Hodáwand rahmata bakshit o ezzata dant.

Hamá ke zendá pa bémayária gwázénit,
Hodáwand sharrén chizzán cha áiá dura nadárit.

¹² Oo lashkaráni Hodáwand!
Bahtáwar ent hamá ke tai sará tawkala kant.

Zenda nabakshay?

Pa sázger o washázáni sálárá. Kórahay chokkáni Zabur.

85 Oo Hodáwand! Taw wati sardhagará rahmat gwart o
Ákubay gwastagén washbahti padá per tarrént.

² Taw wati kawmay mayárbári bakshetant o
áyáni sajjahén gonáh póshetant. Ósht...

³ Taw wati sajjahén gazab poshtá dawr dát o
wati hezhmay ás tóst.

⁴ Oo may rakkénökén Hodá!

Gón má wasshán bay o
wati gazabá cha má dur kan.

⁵ Tán abad gón má zahra bay?
Wati hezhmá nasláni nasl drájkassha kanay?

⁶ Márá padá zenda nabakshay
ke tai kawm tai bárgáhá shádehi bekant?

⁷ Oo Hodáwand! Wati mehrá márá pésh bedár o
márá hamá rakkénagá bebaksh ke cha tai némagá ent.

⁸ Har chizz ke Hodáwandén Hodá gwashit, man gósha dárán,
chiá ke pa wati kawmá émeniay kawlá dant, pa wati wapádárán,
chó mabit ke á ahmakiay ráhá per betarrant.

⁹ Béshakk, á mardománi rakkénag nazzik ent ke cha Hodáyá torsant,
tán may sardhagár cha áiay shán o shawkatá sarréch bebit.

^a 84:9 Asligén Ebráni syáhaga gwashit: may espará. ^b 84:9 Rógen per moshag, bezán pa bádsháhiá gechén kanag.

¹⁰ Mehr o wapádári yakdegará dochára kapant,
adl o émeni yakdomiá chokkant.

¹¹ Wapádári cha zeminá rodit o
adl cha ásmáná jahláda chárít.

¹² Béshakk, Hodáwand nékén chizza bakshit o
may zemin áiay bar o samará kárit.

¹³ Adl, áiay démá rawána bit o
pa áiay gámán ráhé tayára kant.

Wati móleday chokká berakkén

Dáuday dwá.

86 Oo Hodáwand! Wati delgóshá gón man kan o maná passaw day,
ke garib o mohtájé án.

² Mani zenday negahpániá bekan ke tai dóstdár án,
wati hezmatkárá berakkén ke tai sará tawkala kant.

³ Oo Hodáwand! Mani sará rahm kan,
ke sajjahén róchá tará tawára kanán.

⁴ Wati hezmatkáray delá shádmán kan, oo Hodáwand,
ke man cha taw dwá lóthán.

⁵ Taw, oo Hodáwand, nék o bakshendah ay o
pa áyán cha mehrá sarréch ay ke gón taw peryáta kanant.

⁶ Oo Hodáwand! Mani dwáyán gósh dár,
mani peryát o zárián delgósh kan.

⁷ Sakkiáni róchá tará tawára kanán,
ke taw passawa dayay.

⁸ Oo Hodáwand! Hodáyáni nyámá kass tai mattha nabit o
tai kár bématt ant.

⁹ Oo Hodáwand! Tai jórh kortagén sajjahén kawma káyant o
tará sojdaha kanant,

tai námá shán o shawkata dayant,

¹⁰ ke taw mazan ay o ajabén kára kanay,
Hodá tahná taw ay.

¹¹ Wati ráhá maná sój day, oo Hodáwand,
ke tai rástén ráhá berawán,
mani delá sarjamá gón wat kan ke cha tai námá betorsán.

¹² Gón tamánén delé tai shográ gerán, oo Hodáwand, mani Hodá!
Tai námá tán abad shán o shawkata dayán

¹³ ke pa man tai mehr sakk mazan ent,
taw maná cha johlánkián rakkéntag, cha mordagáni jaháná.

¹⁴ Oo Hodá! Gorunákén mardom mani helápá pád átkagant,
zórákáni rombé mani koshagay johdá ent o
tará hech mána nayárit.

¹⁵ Bale taw, oo Hodáwand, rahm kanók o mehrabánén Hodáé ay,
hezhm geragá déra kanay o mehr o wapáyá sarréch ay.

¹⁶ Démá gón man tarrén o mani sará rahm kan,
wati hezmatkárá zór o wák bebaksh o
wati móleday chokká berakkén.

¹⁷ Maná warahmatáni neshánié beday,
tán hamá ke gón man naprat kanant begendant o sharmendag bebant,
chiá ke taw, oo Hodáwand, maná madat kortag o tasallá dátág.

É hamódá pédá butag

Kórahay chokkáni Zabur. Sawté.

87 Áiá, pákén kóhay sará shahré addh kort.

Hodáwandá Sahyunay darwázag dóster ant
cha á dega hamá sajjahén jágahán ke Ákub jahmenend butag.

³ Oo Hodáay shahr!
Tai bárawá porshánén habar kanaga bit. Ósht...

⁴ Mesr^a o Bábelá gón hamáyán hór hesába kárán ke maná zánant,
Pilistiah o Surá ham, gón Kushá hawár.

Esháni bárawá gwashaga bit: “É hamódá pédá butag”.

⁵ Sahyunay bárawá gwashaga bit:
“É mardom o á mardom hamódá pédá butagant,
borzén arshay Hodá wat Urshalimá pádára kant.”

⁶ Wahdé Hodáwand kawmáni námán nebeshtaha kant, nebisit:
“É hamódá pédá butag.” Ósht...

⁷ Á ke sawta janant o á ke nácha kanant gwashant:
“Mani sajjahén chammag cha taw bojant.”

Róch o shap gón taw zári o peryáta kanán

*Pa sázger o washawázáni sálárá. Kórahay chokkáni Zabur. “Mahallat Léhanutay”^b
tarzay sará. Hémán Ezráhiay shayri gwashtánk. Sawté.*

88 Oo Hodáwand! Oo mani rakkénökén Hodá!

Shap o róch tai bárgáhá dwá o peryáta kanán.

² Mani dwá tai dargáhá berasát,
wati delgóshá gón mani peryátá kan.

³ Man janjálán kaptagán o
mani zend pa marká sar butag.

⁴ Hamá mardománi paymá hesáb áraga bán ke johlén kandhá kaptagant,

^a 87:4 Asligén Ebráni syáhaga gwashit: Raháb. Raháb pa Mesrá pernámé.
“paréshániy dard” ent. Báwar esh ent ke edá muzikay yak gálé.

^b 88:0 “Mahallat Léhanutay” máná

anchén mardoméay paymá ke nezór o nátwán ent.

⁵ Mordagáni nyámá yalah dayag butagán,
chó mordagéá ke kabrá waptag,
ke taw áyáni yátá naay o
cha tai dastá jetá butagant.

⁶ Taw maná johlterén kandhá dawr dáttag,
tahárén johlánkiá.

⁷ Tai hezhm mani chakká kaptag,
chawlán maná mán patátag. Ósht...

⁸ Taw mani hamdelén sangat cha man dur bortag o
cha man békár kortagant.

Bandig án o dar átka nakanán.

⁹ Mani chamm cha andohá tahár butagant.

Oo Hodáwand! Har róch tará tawára kanán o
dastán pa taw shahárán.

¹⁰ Wati ajabén kárán mordagán pésha dáray?
Mordagáni arwáh páda káyant o tará satá kanant? Ósht...

¹¹ Mordag, kabrá tai mehray járá janant?
Mordagáni jaháná tai wapádáriay kessahána kárant?

¹² Taháriá, tai ajabén kár zánaga bant o
tai adl, shamóshkáriay moltá?

¹³ Bale man gón taw madatay peryátá kanán, oo Hodáwand!
Hamok sabáhá mani dwá tai bárgáhá rasant.

¹⁴ Oo Hodáwand! Chiá maná yalahá kanay o
wati démá cha man chéra dayay?

¹⁵ Cha warnáiá sakkiáni ámách o markig butagán,
tai torsá maná bazzag kortag o béwas án.

¹⁶ Tai hezhmá maná patátag o
tai bimmá maná próshtag.

¹⁷ Sajjahén róchá ápay paymá maná chapp o chágerdá geptag o
cha har némagá angerresh kortag.

¹⁸ Taw mani dóst o sangat cha man dur kortagant,
tahná tahári ent ke mani hamráh ent.

Adl o ensáp tai bádsháhiay bonyád ant

Itán Ezráhiay shayri gwashtánk.

89 Hodáwanday mehrá tán abada názénán
cha wati zobáná, tai wapádáriay kessahá sajjahén naslán sara kanán.

² Man gwasht ke “tai mehr abadmán ent o
taw wati wapádári, ásmáná káhem kortag.”

³ Taw gwasht: “Man gón wati gechén kortagéná ahd o karáre bastag o

góñ wati hezmatkár Dáudá pa sawgend kawl kortag:

⁴ “Tai padréchá tán abad barjáha dárán o
tai bádsháhi tahtá nasláni nasl.” Ósht...

⁵ Oo Hodáwand! Ásmán tai ajabén kárán satá kant o
tai wapádáriá ham, pákénáni diwáná.

⁶ Ásmánán, kay Hodáwanay matth buta kant?
Choshén ásmáni hastié hast ke Hodáwanday paymá bebit?

⁷ Hodáay tors ásmáni hastiáni nyámá sakk mazan ent,
á cha wati chapp o chágérdaj sajjahénán bákamálter ent.

⁸ Oo Hodáwand, lashkaráni Hodá! Kay tai matth o darwar ent?
Taw zórák ay, oo Hodáwand, o tai wapádáriá tará chapp o chágérd kortag.

⁹ Taw mastén daryáyáni sará hokmránia kanay o
wahdé chawlesh chesta bant, taw éresha káray.

¹⁰ Taw Raháb,^a láshéay paymá drosh o
góñ wati zórmándén báská wati dozhmen sheng o sháng kortant.

¹¹ Ásmán taig ent o zemin ham,
jahán o eshiay tahá harché ke hast, taw addh kortagant.

¹² Shomál o jonub taw addh kortagant,
Tábór o Hermónay kóh tai námá názénant.

¹³ Tai básk zórmánd ent,
tai dast zóráwar ent,
tai rástén dast porwák o sóbén ent.

¹⁴ Adl o ensáp tai bádsháhiay bonyád ant,
mehr o wapádári tai hamráhiá, démá gám janán ant.

¹⁵ Oo Hodáwand! Bahtáwar hamá ant ke shádmániay áwázá pajjáha kárant o
tai bárgáhay nurá gáma janant.

¹⁶ Sajjahén róchá tai námay sará shádehia kanant o
cha tai adlá sarboland ant.

¹⁷ Chiá ke taw áyáni shán o shawkat o áyáni wák o twán ay o
cha wati mehrabániá may kánthá^b sarperáza kanay.

¹⁸ Béshakk, may bádsháh Hodáwandayg ent,
may espar Esrálay pákénay.

¹⁹ Yak wahdé taw, shobéná góñ wati wapádárán habar kort o gwasht:

“Man jangólé madat kortag o
cha kawmá gechéni warnáé ródéntag.

²⁰ Man wati hezmatkár, Dáud shóház kortag o
wati pákén, rógen per moshtag^c.

²¹ Mani dast góñ áiá góna bit o
mani báski zórmanda kant.

²² Dozhmen cha áiá bája nabárt o
badkár áiay sará sarzóra nabit.

²³ Dozhmenán áiay démá prósha dayán o

^a 89:10 Raháb, bezán gorunák. Edá balkén pa Shaytáni tágatán gwashag butag. ^b 89:17 Kánthay máná edá zór o kodrat ent. ^c 89:20 Rógen per mosthag, bezán pa bádsháhiá gechéni kanag.

harkas ke cha áiá naprata kant, prósháni.

²⁴ Mani mehr o wapádári áiay hamráha bant o
mani námá áiay kánth borzáda bit.

²⁵ Áiay dastá tán daryáyá sara kanán,
áiay rástén dastá tán kawrán.

²⁶ Á maná gwánka jant o gwashit: ‘Taw mani Pet ay,
mani Hodá o mani nejátay talár.’

²⁷ Man ham áiá wati masterén chokka kanán,
jahánay masterén bádsháh.

²⁸ Wati mehrá tán abad áiay hamráha kanán o
góń áiá wati ahd o karárá mohra dárán.

²⁹ Tán abad áiay naslá barjáha dárán,
áiay bádsháhiay tahtá ásmánay rócháni hesábá.

³⁰ “Agan áiay chokk mani Sharyatá yalah bekanant o
mani parmánáni randgiriá makanant,

³¹ agan mani rahbandán bepróshant o
mani hokmán mamannant,

³² áyáni gonáhán pa latth sezá dayán,
náparmánián pa hayzarán,

³³ bale áiay dóst dáragá bassa nakanán o
góń áiá wati kortagén kawlá napróshán.

³⁴ Wati ahd o paymáná napróshán o
á habar ke cha mani dapá dar átkag, badalia nakanán.

³⁵ Man yak baré mán wati pákiá sawgendé wártag o
góń Dáudá dróga nabandán,

³⁶ ke áiay nasl tán abad barjáha mánit o
áiay taht mani dargáhá chó róchá abadi ent,

³⁷ chó máhá tán abad barjáha mánit,
ke jambaráni tahá tachk o rástén sháhedé.” Ósht...

³⁸ Bale annun taw wati dém tarréntag o á yalah kortag,
wati rógen per moshtagénay sará hezhm geptagay.

³⁹ Taw góń wati hezmatkárá bastagén ahd o paymán pad tarréntag o
áiay táj, zeminá dawr dátág.

⁴⁰ Taw áiay sajjahén diwál karótkagant o
áiay mohréni kalát próshtag.

⁴¹ Harkas ke cha ráhá gwazit, áiá pol o páncha^a kant o
á wati hamsáhegáni kalági jórh butag.

⁴² Taw áiay dozhmenáni rástén dast borzád bortag o
sajjahén badwáh shádmán kortagant.

⁴³ Taw áiay zahm konth kortag o
jangá madat nadátag.

⁴⁴ Taw áiay shán bortag o
taht hákán dawr dátág.

⁴⁵ Taw áiay warnáiay róch kamm kortagant o
sharmendagiay kabáhéá póshéntag. Ósht...

^a 89:41 Pol o pánch, bezán zórbord, lotth o pol.

⁴⁶ Tán kadén, oo Hodáwand! Watá tán abad chéra dayay?

Tán kadén tai hezhm chó ásá róka mánit?

⁴⁷ Hayálá bekap ke mani omray róch chón kamm ant,
taw bani ádam nákárén chizzé jórh kortag.

⁴⁸ Kojám ensán ent ke marka nagendit,
kay cha kabray zórá rakketa kant? Ósht...

⁴⁹ Oo Hodáwand! Tai á pésarigén mehr kojá ent
ke taw gón Dáudá sawgend wárt o kawl kort.

⁵⁰ Oo Hodáwand! Hayálá bekap ke tai hezmatkárá chón shegána janant,
sajjahén kawmáni rishkandán wati delá dárán.

⁵¹ Oo Hodáwand! Tai dozhmenán mani sará rishkand kortag o
hamok gámá tai rógen per moshtagénesh kalág bastag.

⁵² Hodáwandá tán abad satá bát.

Anchosh bát. Ámin.

Zaburay cháromi ketáb

Zabur 90—106

May dastáni kárán barkat beday

Hodáay hezmatkár Mussáay dwá.

90 Oo Hodáwand! Nasláni nasl
taw may menendjáh butagay.

² Cha kóháni péda bayag o
zemin o jahánay addh kanagá pésar,
cha azal tán abad, Hodá taw ay.

³ Ensáná padá hákay chérá baray o
gwashay: “Oo ensánay chokk! Háká per tarr.”

⁴ Hazár sál pa taw chó gwastagén yak róchéá ent,
chó shapi yak páséá.

⁵ Ensán wábé o chó háréá áiá rópána kanay.

Sohbá chó káhá tázag ent,

⁶ sabáhá rodit o sabzit,
bégáhá gimmerit o hoshka tarrit.

⁷ Cha tai hezhmá halása bén,
cha tai gazabá paréshán.

⁸ Taw may mayár wati démá kortagant o
chérén gonáh wati bárgáhay rozhnáiá.

⁹ May sajjahén zend tai hezhmay chérá gwazit o
wati sálán pa nálagá halása kanén.

¹⁰ May omray róch haptád sál ant
yá hashtád sál, agan sakk zreng bebén,

bale sharterén róch ham zahmat o janjálá porr ant,
sakk zutta gwazant o má bála kanén.

¹¹ Kay tai hezhmay trondiá zánt?
tai gazab delá torsa nádénit.

¹² Gorhá márá é zántá beday ke may rócháni hesáb kamm ent,
tán may del aglmand bebit.

¹³ Dém pa má per tarr, oo Hodáwand! Tán kadén chosha bit?
Wati hezmatkáráni sará rahm kan.

¹⁴ Bámgwáhán, márá gón wati mehrá sér kan,
tánke sajjahén omrá sawt bejanén o shádehi bekanén.

¹⁵ Haminchok róchá ke taw márá azáb dátág,
haminchok róchá márá shádmán kan,
haminchok sálá ke sakkián dochár butagén.

¹⁶ Tai kár tai hezmatkáráni démá paddar bátant o
tai mazani pa áyáni óbádagán.

¹⁷ May Hodáwandén Hodáay mehrabáni pa má sar bát,
may dastáni kárán barkat beday,
haw, may dastáni kárán barkat beday.

Hodáay báenzoláni chérá panáha bay

91 Hamá ke borzén arshay Hodáay panáhgáhá neshtag,
zórákay sáhegá áráma gipt.

² Hodáwanday bárawá gwashán: “Hamá mani panáh o kalát ent,
mani Hodá, ke hamáiay sará tawkala kanán.”

³ Deljam án ke hamá tará cha shekáriáni dámá rakkénit,
cha koshókén wabáyán.

⁴ Á tará gón wati poth o bálán póshénit o
áiay báenzoláni chérá panáha bay,
áiay wapádári espar o diwálé.

⁵ Cha shapay bimmá natorsay,
na cha á tirá ke róchá srapit,

⁶ na cha wabáyá ke taháriá gardit,
na cha á hawpá^a ke némróchá béránia kárit.

⁷ Hazárán kas tai kerrá kapit,
dahán hazár tai rástén némagá,
bale é tabáhi tai nazziká átka nakanant.

⁸ Tahná gón wati chammáni shánk dayagá
badkáráni sezáyána genday.

⁹ Agan Hodáyá wati panáh bekanay,
borzén arshay Hodáyá wati menendjáh,

¹⁰ hech kazá tai sará sarzóra nabit o

^a 91:6 Hawp, bezán wabá.

hech baláh tai gedánay nazziká nayayt.

¹¹ Tai bárawá préshtagán hokma kant
ke tai sajjahén ráhán, tai negahpániá bekanant.

¹² Á tará wati dastáni delá dárant
tán tai pád dhókéá malaggit.

¹³ Shér o máráni sará garday,
rostagén shér o syahmáráni saragán pádmála kanay.

¹⁴ Hodáwanda gwashit: “Á ke maná dósta dárit
áiá nejáta dayán o
hamáiay posht o panáha bán ke mani námá zánt.

¹⁵ Á maná tawára kant o man passawia dayán,
sakkián áiay hamráha bán,
áiá nejáta dayán o ezzata bakshán.

¹⁶ Áiá cha drájén omré sérápa kanán o
Hodái nejátá áiá pésha dárán.”

Tai wapádáriay járá janán

Pa Shabbatay róchá sawté. Zaburé.

92 Hodáay satá kanag wassh ent o
tai námay názénag, oo borzén arshay Hodá!

² Bámgwáhán tai mehr o
shapán tai wapádáriay járay janag,

³ gón dahtárén tamburag o
changay zémelá wassh ent.

⁴ Chiá ke taw, oo Hodáwand,
maná gón wati dastay kárán shádmán kortag,
tai tawsipá shádmániay sawta janán.

⁵ Oo Hodáwand! Tai kár chón mazan ant o
pegr chenkadar johlánk.

⁶ Ahmaka nazánt o
nádán sarpada nabit.

⁷ Harchont ke badkár chó káhá berodant o
radkár besabzant,

bale tán abad tabáha bant.

⁸ Bale taw, oo Hodáwand,
tán abad borzén arshay Hodá ay.

⁹ Tai dozhmen, oo Hodáwand,
allam gár o gomsára bant o
sajjahén badkár, sheng o sháng.

¹⁰ Bale taw mani kánth, wahshién gókay kánthay paymá borz dáshtag o
maná sapáén rógen per moshtag^a.

¹¹ Mani chammán dozhmenáni shekast distag o

^a 92:10 Rógen per moshag, bezán pa bádháhiá gechén kanag.

góshán badkáráni sarshakuniay habar eshkotag.

¹² Pahrézkár macchay paymá sabzant o
Lobnánay gazzáni paymá rodant.

¹³ Á Hodáwanday lógá keshag butagant o
may Hodáay bárgáhá sabzant.

^{14–15} Piriá ham bar o samara dayant o
pa é járay janagá tarr o tázag o sabza mánant
ke Hodáwand rást o ádel ent,
hamá mani talár ent o
áiá hech náensápi o badi mán nést.

Tai bádsháhi pák o palgár ent

93 Hodáwand bádsháhia kant
áiá watá pa shán o shawkat árástag,
Hodáwand porshawkat ent o
zór o wáká selahband.
Donyá mohr óshtátag o nalarzit.
² Tai bádsháhi taht cha azal barjam ent o
taw cha azal hastay.

³ Oo Hodáwand! Kawr chest butagant,
kawrán wati tawár chest kortag,
kawrán wati gorragáni tawár chest kortag.

⁴ Hodáwand cha mazanén ápáni tawárán,
cha daryáay chawláni proshagá
mazanshánter ent, borzén arshá.

⁵ Oo Hodáwand! Tai hokm modám barjáha mánant,
tai bádsháhi pák o palgár ent,
modám, tán abad.

Pád á, oo zeminay dádras!

94 Oo bérgerén Hodá! Oo Hodáwand!
Oo bérgerén Hodá! Wati shán o shawkatá záher kan.
² Pád á, oo zeminay dádras!
Porkebr o gorunákán sezá day.
³ Tán kadén, oo Hodáwand!
Badkár tán kadén sarzór bebant?

⁴ É mardom gón kebré habara kanant,
sajjahén badkár batháka janant.

⁵ Oo Hodáwand! Tai kawmá pádmála kanant o
tai mirásá ázára dayant.

⁶ Janózám o darámadán koshant o
chórhawán haláka kanant.

⁷ Gwashant: “Hodáwanda nagendit,
Ákubay Hodá sarpada nabit”.

⁸ Sarpad bét, oo kawmay názántán!
Oo jáhelán! Kadén ákela bét?

⁹ Á ke góshi addh kortag, naeshkont?
O á ke chammi addh kortag, nagendit?

¹⁰ Á kas ke kawmán sezá dant, áyán adaba nakant?
O á kas ke bani ádamá zánta bakshit, watá zánt o zánagi nést?

¹¹ Hodáwand ensánay sajjahén pegrána zánt,
á zánt ke náhudag o nákár ant.

¹² Oo Hodáwand! Bahtáwar ent hamá ke taw áiá adaba kanay,
hamá ke taw gón wati Sharyatá áiá tálima dayay.

¹³ Taw áiá cha sakkén róchána rakkénay,
tán hamá wahdá ke pa badkárán kallé kóchag bebit.

¹⁴ Chiá ke Hodáwand wati kawmá yalahá nakant o
wati mirásá dawra nadant.

¹⁵ Dádrasi padá pa ensápa bit,
sajjahén nékdel ensápay randgiriá kanant.

¹⁶ Kay ent ke pa manigi badkáráni démá pád byayt?
Kay ent ke pa manigi radkáráni démá bóshtit?

¹⁷ Agan Hodáwand mani komak mabutén,
man zutt markay bétawariá bokketagatán.

¹⁸ Wahdé gwashton: “Mani pád thagalagá ent”,
tai mehrá, oo Hodáwand, maná cha kapagá dásht.

¹⁹ Wahdé sargardána bán,
tai dáttagén delbaddhi maná shádmána kant.

²⁰ Choshén béensápén hákemé gón taw yak o tepák buta kant ke
gón wati hokm o kánunán náensápia kárit?

²¹ Áyáni thóli pahrézkáráni helápá hamdast o hamkára bant o
bégonáhán markay sezá dayant.

²² Bale Hodáwand mani kalát ent,
mani Hodá, mani talár, mani panáhgáh.

²³ Hodá, áyáni gonáhán hamáyáni jenday sará pera tarrénit o
áyán, áyáni jenday badén káráni tahá gár o gomsára kant.
Haw, may Hodáwand áyán gár o tabáha kant.

Má Hodáay dastay ramag én

95 Byáét Hodáwandá pa galé názénén,
pa wati nejátay talárá pa shádehi kukkára kanén.

² Byáét pa shogrgozári áiay bárgáhá rawén,
pa shádehi kukkára kanén, sawta janén o áiá satá kanén,

³ ke Hodáwand mazanshánén Hodá ent,
sajjahén “hodáyáni” masterén bádsháh.

⁴ Zeminay johli hamáiay dastá ant o
kóháni borzi ham hamáiayg ant.

⁵ Daryá Hodáwandayg ent ke wat addhi kortag,
hoshkén zemin ham hamáiay dastán jórh kortag.

⁶ Byáét, sará jahla kanén o sojdaха kanén,
wati addh kanókén Hodáwanday bárgáhá kóndhána kapén,
⁷ ke hamá may Hodá ent o
má, áiay charágáhay mardom,
hamáiay dastay ramag én.

Dréгatá shomá maróchi áiay tawár beshkotén:

⁸ “Wati delán á paymá sarkash makanét ke kawmá Meribáyá kort,
ke kawmá á róchi Massahay gyábáná kort.^a

⁹ Ódá shomay pirénán maná chakkáset o ázmáesh kort,
bell ke mani kortagén káresh distagatant.

¹⁰ Tán chel sálá cha á naslá békár atán,
gwashton: ‘É anchén mardom ant ke delesh gomráh ant o
mani ráhána nazánant,’

¹¹ Gorhá man wati hezhmá sawgend wárt ke
‘é hechbar mani ásudagiá sara nabant.’”

Ásmán shádehi bekanát o zemin gal bát

96 Pa Hodáwandá nökén sawté bejanét.

Oo sajjahén zemin! Hodáwandá benázén.

² Hodáwandá benázénét, áiay námá satá kanét.

Har róch hamá nejátay járá bejanét ke cha áiay némagá ent.

³ Kawmáni nyámá áiay shán o shawkatay járá bejanét,
sajjahén kawmáni nyámá áiay ajabén káráni.

⁴ Ke Hodáwand mazan ent o satáyáni láhek,
cha sajjahén “hodáyán” bákamálter ent.

⁵ Kawmáni sajjahén “hodá” náudagén bot ant,
bale Hodáwandá ásmán jórh kortant.

⁶ Ezzat o shán hamáiay chapp o chágerdá ent o
kodrat o zébái áiay pákén bárgáhá.

⁷ Oo kawmáni kabilahán! Hodáwandá benázénét,
Hodáwanday shán o kodratá benázénét.

⁸ Hodáwanday námay mazaniá benázénét,
korbánig byárét o áiay bárgáhá byáét.

⁹ Cha Hodáwanday pákiay zébáiá, áiay démá kóndhán bekapét.
Oo sajjahén zemin! Áiay dargáhá belarz.

¹⁰ Sajjahén kawmáni nyámá begwashét: “Hodáwand bádsháh ent.”

^a 95:8 Bechár Dargwaz 17:7. Meribá o Massah yakkén jághay nám ant ke Esráilián ódá Hodáay náshogri kort.

Jahán pa mohkami jórh kanag butag o nasorit,
á, kawmáni dadrasiá pa ensápa kant.

¹¹ Ásmán shádehi bekanát o zemin gal bát,
daryá o harché ke daryáyá mán, pa borztawári áiá benázénátant.

¹² Dhagár o harché ke dhagárá hast gal bátant,
jangular sajjahén drachk pa shádmáni áiá benázénátant.

¹³ Hodáwandá benázénátant, chiá ke á kayt,
haw, pa zeminay dadrasiá kayt.
Jahánay dadrasiá pa adl o ensápa kant o
kawmáni dadrasiá wati rásti o tachkiay hesábá.

Nur pa pahrézkárán keshaga bit

97 Hodáwand bádsháhia kant,

zemin shádehi bekanát o
sajjahén tayábi sardhagár gal bátant.

² Jambar o tahári áiay chapp o chágérdá ant,
adl o ensáp, áiay tahtay bonhesht o bonyád ant.

³ Ás áiay démá rawán ent o
cha har némagá áiay dozhmenán éra bárt.

⁴ Áiay grók jaháná róshná kant,
zemina gendit o larzit.

⁵ Hodáwanday démá kóh chó mórmá ápa bant,
sajjahén jahánay Hodáwanday démá.

⁶ Ásmán áiay adlay járá janant o
sajjahén kawm áiay shán o shawkatá gendant.

⁷ Á sajjahén mardom sharmsára bant ke bot sojdaha kanant,
hamá ke náhudagén botáni poshtá pahra bandant.
Oo sajjahén “hodáyán”! Áiá sojdah kanét.

⁸ Sahyun eshkont o shádehia kant o
Yahudiahay jenek^a gal ant
cha tai dadrasiá, oo Hodáwand!

⁹ Chiá ke taw, oo borzén arshay Hodáwand, sajjahén zeminay sará mazanshán ay,
taw sajjahén “hodáyáni” sará báládast ay.

¹⁰ Shomá ke Hodáwandá dósta dárét,
cha badiá naprat kanét,
chiá ke á Hodádóstáni zenday negahpán ent o
áyán cha badkáráni dastá nejáta dant.

¹¹ Nur pa pahrézkárán keshaga bit o
shádehi pa nékdelán.

¹² Oo pahrézkárán! Hodáwanday bárgáhá shádehi kanét o
áiay pákén námá benázénét.

^a 97:8 Yahudiahay jenek, bezán Yahudiahay sajjahén mardom.

Nókén sawté bejanét

Zaburé.

98 Pa Hodáwandá nökén sawté bejanét,
ke ajabén kári kortag,

áiay rástén dast o pákén báská
sób o pérózi katthetag.

² Hodáwandá hamá neját pésh dáshtag ke cha áiay némagá ent,
wati adli kawmáni chammán paddar kortag.

³ Áiá pa Esráilay óbádagán wati mehr o wapa yátá áwortag,
zeminay sajjahén goddhi hadd o simsarán, may Hodáay dátagén neját distag.

⁴ Oo sajjahén zemin! Pa Hodáwandá shádmániay kukkárá borz kan.
Kukkár kanét, pa shádehi sawt bejanét, benázénét.

⁵ Pa Hodáwandá chang o sáz bejanét,
góñ sázá sawt bejanét.

⁶ Gón sorná o gwarándhay kánthá^a
bádsháhén Hodáwanday bárgáhá,
shádehiay kukkárá chest kanét.

⁷ Daryá o daryáay tahay sajjahén chizz grandátant,
jahán o áiay sajjahén jahmenend.

⁸ Kawr cháp bejanátant o
kóh pa shádmáni sawt,

⁹ Hodáwanday bárgáhá sawt bejanátant,
ke á pa zeminay dadrasíá kayt.

Á jaháná pa adl dádrasia kant o
kawmán pa ensáp.

Áiay pádáni padagay démá sojdah kanét

99 Hodáwand bádsháhia kant,
kawm belarzátant,

á, karrubiáni^b nyámá, wati bádsháhi tahtá neshtag,
zemin belarzát.

² Sahyuná, Hodáwand mazan ent,
borzén arshay Hodá, sajjahén kawmáni sará hákem.

³ Tai mazan o bákamálén námá satá kanátant,
Hodáwand pák ent.

⁴ Bádsháh zóráwar ent, adli dóstá bit.
Taw, oo Hodá, ensáp barjáh dáshtag,
sajjahén Esráilá^c taw hamá kár kortag ke
pa adl o ensáp ant.

^a 98:6 Gwarándhay kánth Esráiliáni kerrá sázé. ^b 99:1 Karrubi, ásmáni mahluké ke bánzolesh per o Hodáay tahtay chapp o chágérdá ant. ^c 99:4 Asligén syáhaga gwashit: Ákubá.

⁵ May Hodáwandén Hodáyá shán o shawkat dayét o
áiay pádáni padagay démá parastesh kanét,
ke á pák ent.

⁶ Mussá o Hárún cha hamáiay dini péshwáyán atant o
Samuil ham cha hamáyán at ke Hodáwanday námesh gept.
Hodáwandesh tawár kort o
áiá passaw dátant.

⁷ Cha jambaray sotuná gón áyán habari kort o
áyán ham hamá hokm o Sharyat barjáh dásht ke dáttagati.

⁸ Oo Hodáwand, may Hodá! Taw á passaw dátant,
taw pa Esrálá pahell kanókén Hodáé atay,
harchont ke áyáni gonáháni sezáet ham dát.

⁹ May Hodáwandén Hodáyá shán o shawkat bedayét,
áiay pákén kóhay sará áiá parastesh kanét,
ke Hodáwand, may Hodá pák ent.

Hodáwand nék ent o mehri abadmán

Shogrgozáriay Zaburé.

100 Oo sajjahén zemin!
Pa Hodáwandá shádmániay gwánká bejan.

² Hodáwandá pa shádehi parastesh kanét,
gón shádmániay sawtán áiay bárgáhá byáét.

³ Bezánét ke Hodáwand, Hodá ent,
hamáiá márá addh kortag o má hamáiayg én,
má áiay kawm, áiay charágáhay ramag én.

⁴ Áiay darwázagán gón shogrgozári bepotrét o
áiay bárgáhá gón satá o saná.

Áiay shográ begerét o áiay námá besárháét,

⁵ ke Hodáwand nék ent o mehri abadmán,
áiay wapádári nasláni nasl barjáha mánit.

Wapádárén mardom shoháza kanán

Dáuday Zabur.

101 Mehr o adlay sawtá janán,
tará názénán, oo Hodáwand!

² Bémayáriay ráhá rawán.

Mani kerrá kadi káay?

Gón delpahki wati lógá zenda gwázénán.

³ Wati chammán sell o bazzhnákén chizzáni cháragá naylán,

cha náráhén kárán békár án, maná gón choshén chizzán kár nést.

⁴ Gomráhdelén mardomán cha wat dura dárán,
maná gón hecch badiéá kára nabit.

⁵ Gár o gomsára kanán hamáiá ke wati hamsáhegay báposhtá habara kant.
Hech porkebrén chamm o gorunákén deléay ópárá nakanán.

⁶ Mani chamm zeminay sará wapádárén mardom shoháza kanant
tánke gón man jahmenend bebant,
hamá kas mani hezmatkár buta kant
ke pa bémayária gardit.

⁷ Prébkárá mani lógá jágaha nabit o
drógband mani hezmatá korta nakant.

⁸ Har sohbá molkay sajjahén badkárán tabáha kanán,
radkárán cha Hodáwanday shahrá gár o gomsára kanán.

Sahyuná Hodáwanday námá jár bejanant

*Setam distagén mardoméay dwá, hamá wahdá ke wat
ájez ent o wati peryátá Hodáwanday bárgáhá sara kant.*

102 Oo Hodáwand! Mani dwáyá gósh dár, mani peryát tará sar bát.

² Mani sakki o sóriay róchá
wati démá cha man chér maday.

Wati delgóshá gón man kan,
wahdé tará tawára kanán, zutt passaw beday.

³ Chéá ke mani róch chó duttá gára bant o
haddh chó rókén eshkará sochant.

⁴ Mani del chó mortagén káhá gimmortag o hoshk tarretag o
cha ward o waráká kaptagán.

⁵ Cha bázén nálag o peryátá
hoshkén haddh o pósté án.

⁶ Gyábáni bumméay^a paymá án,
anchó ke bummé mán wayránagán.

⁷ Béwáb gandaláni tahá tachk án,
anchó ke tahnáén morgé lógéay sará.

⁸ Dozhmen sajjahén róchá maná shegána janant,
kalága bandant o nálata kanant.

⁹ Chéá ke nánay badalá pora warán o
harché ke nóshán, arsá porr ant,

¹⁰ cha tai hezhm o gazabá,
chéá ke taw maná chest kort o zeminá jat.

¹¹ Mani róch, bégáhi sáhegeay paymá gára bant o
man káhay dhawlá hoshk bayagá án.

¹² Bale taw, oo Hodáwand, tán abad wati bádsháhi tahtá neshtagay o

^a 6:102 Bumm morgé ke gugu ham gwashaga bit, Orduá ollu, Pársiá buf, joghd.

tai nám nasláni nasl barjáh ent.

¹³ Taw jáha janay o tará Sahyunay sará bazzaga bit,
chéá ke Sahyunay sará rahm kanagay wahd átkag,
á gisshetagén wahd rasetag.

¹⁴ Chéá ke tai hezmatkárán é shahray seng dóst ant o
Sahyunay hákay sará ham bazzagesha bit.

¹⁵ Kawm cha Hodáwanday námá torsant o
zeminay sajjahén bádsháh cha tai mazani o sháná.

¹⁶ Chéá ke Hodáwand Sahyuná nóksará addha kant o
mán wati shán o shawkatá záhera bit.

¹⁷ Á bazzagáni dwáyán gósha dárit o
cha áyáni peryátán nádelgósha nabit.

¹⁸ Bell ke é pa áyókén nasléá nebisag bebit o
anchén kawmé ke angat addh nabutag, Hodáwandá satá o saná bekant.

¹⁹ Áiá cha wati pákén arshá jahlád cháretag,
Hodáwandá cha ásmáná dém pa zeminá cháretag,

²⁰ tánke bandigáni nálagán beshkont o
hamáyán ázát bekant ke markay sezá dayag butagant,

²¹ ke Sahyuná Hodáwanday námá jár bejanant o
Urshalimá áiay satáyá bekanant,

²² hamá wahdá ke kawm o bádsháhi
pa Hodáwanday parasteshá yakjáh moccha bant.

²³ Ráhay némá mani twáni prósht o
mani róchi gwandh kortant.

²⁴ Gorhá man gwasht:
“Oo Hodáwand! Omray nyámá mani zendá pach mager,
tai sál tán sajjahén naslán barjáh ant.

²⁵ Zemin, taw cha azalá jórh kortag o
ásmán tai dastáni kár ent.

²⁶ É sajjahén gár o bégwáha bant bale taw mánay,
é sajjahén chó pósháká kwahna bant,
taw eshán chó pósháká badala kanay o é bérána bant,

²⁷ bale taw mánay o
tai sál halása nabant.

²⁸ Tai hezmatkáráni chokk tai bárgáhá jahmenenda bant o
áyáni poshpad tai dargáhá barjáha mánant.”

Oo mani arwáh! Hodáwandá benázén

Dáuday Zabur.

103 Oo mani arwáh! Hodáwandá benázén.

Oo mani bátenay har chizz! Áiay pákén námá benázén.

² Hodáwandá benázén, oo mani arwáh!

Áiay hecch nékiá mashamósh,

³ hamá ke tai sajjahén gonáhána bakshit o
tai drostigén nádráhián dráha kant.

⁴ Tará cha mordagáni jaháná rakkénit o
mehr o rahmatay tájé tai sará dant.

⁵ Tará cha sharrén chizzán sérápa kant
ke tai warnái wakábéay^a paymá nök o tázag bebit.

⁶ Hodáwand adl o ensápa kant o
pa sajjahén setam distagénán dádrasi.

⁷ Áiá wati ráh pa Mussáyá záher kortant o
wati kár pa Esráilay kawmá.

⁸ Hodáwand rahm kanók o mehrbán ent,
hezhm geragá déra kant o mehrá sarréch ent.

⁹ Márá tán abad mayáriga nakant o
na modám pa má gazaba gwárénit.

¹⁰ Márá may gonáháni hesábá nachárit,
na ke márá may badiáni padmozzá dant.

¹¹ Chéá ke haminkas ke ásmán cha zeminá borz ent,
áiay mehr pa hamá mardomán ke Hodáay torsesh delá ent haminkas báz ent.

¹² Haminkas ke mashrek cha magrebá dur ent,
may gonáhi cha má haminkas dur kortagant.

¹³ Hamá dábá ke peté pa wati chokkán mehrabán ent,
hamé paymá Hodáwand pa hamá mardomán mehrabán ent ke áiay torsesh delá ent.

¹⁴ Chéá ke may sareshtá^b sarpad ent,
á zánt ke má hák én.

¹⁵ Haw, ensán chó káhá ent,
chó dhagáray goléá srapi^c.

¹⁶ Wahdé gwáté áiay sará kasshit, gára bit o
áiay jágha padá áiá pakkáha nayárit.

¹⁷ Bale Hodáwanday mehr, azal tán abad
hamá mardománi hamráh ent ke áiay torsesh delá ent o
áiay adl, esháni chokk o nomásagáni hamráh,

¹⁸ hamáyáni hamráh ke áiay rahbandáni randgiriá kanant o
áiay hokmáni manmagá nashamóshant.

¹⁹ Hodáwandá wati bádsháhiay taht ásmánán barjáh dáshtag o
áiay bádsháhi sajjahén hastiay sará hákemia kant.

²⁰ Oo Hodáwanday préshtagán!

Shomá, oo zóráwarán ke áiay habarán barjáha dárét o áiay parmánbardáriá kanét!
Hodáwandá benázénét.

²¹ Oo Hodáwanday sajjahén lashkarán!

Shomá, oo áiay hezmatkárán ke áiay wáhagay parmánbardáriá kanét!
Hodáwandá benázénét.

²² Oo Hodáwanday sajjahén jórh kortagénán,
har jágha ke áiay bádsháhi barjáh ent!

^a 5:103 Wakáb mazanén bíli sháhiné, Ordu o Pársia oqáb.

^c 103:15 Srapag, bezán pach bayag.

^b 103:14 Saresht, bezán báten, fetrat, jawhar.

Hodáwandá benázénét.

Oo mani arwáh!

Hodáwandá benázén.

Oo Hodáwand! Taw mazan ay

104 Oo mani arwáh! Hodáwandá benázén.

Oo Hodáwand, mani Hodá! Taw békesás mazan ay,
taw góñ ezzat o sháná póshetagay.

² Nurá chó kabáhéá gwará kanay,
ásmáná tambuéay paymá pacha kanay o

³ wati borzi lógáni menokán^a ápáni sará oshtárénay.

Jambarán wati arrábah jórha kanay o
gwátay bánzolán swár ay.

⁴ Gwátán wati káseda kanay o
ásay bránzá wati hezmatkár.

⁵ Taw zemin áiay bonredáni sará ér kortag
ke hechbar soreta nakant.

⁶ Taw zemin góñ ápáni johlánkián póshéntag, kabáhéay dhawlá,
áp kóháni sarborá óshtát.

⁷ Áp cha tai neherrán jestant,
cha tai grandáni tawárá bálesh kort,

⁸ kóháni sará tatkant o dém pa daragán shotant,
dém pa hamá jágahá ke taw pa áyán gisshéntagat.

⁹ Taw anchén hadd o simsaré gisshént ke áp cha ódá gwasta nakant o
nun dega baré zeminá nagipt o napóshit.

¹⁰ Taw chammag parmántant ke daragán áp berombénant o
kóháni nyámá tachán bebant.

¹¹ Gyábánay hamok jánwárá ápa dayant,
wahshién har wati tonná próshant.

¹² Báli morg chammagáni kashá kodóha bandant o
drachkáni sháharháni nyámá sawta janant.

¹³ Taw cha wati borzi bán o bárgáhá kóhán ápa dayay o
zemin cha tai káráni bar o samará séra bit.

¹⁴ Taw pa dalwatán káha ródénay o
sabzag ke ensán kesht o keshár bekant o
cha zeminá warák dar bekant,

¹⁵ sharáb ke mardomay delá shát bekant o
rógen ke áyáni démá rozhná bekant o
nán ke ensánay delá zórmánd bekant.

¹⁶ Hodáwanday drachk séráp ant,
Lobnánay gazz ke áiá keshtagant.

¹⁷ Morg hamódá kodóha bandant o

^a 3:104 Menok, bezán menag, sotun.

kunja^a sanóbarén drachkáni sará jágaha kanant.

¹⁸ Borzén kóh wahshién bozánig ant o
talár, rijgushkáni^b panáhgáh ant.

¹⁹ Taw máh pa wahdáni neshán kanagá addh kort o
róch wati ér nendagay wahdá zánt.

²⁰ Taháriá ke káray, shapa bit o
jangalay sajjahén jánwar soragá laggant.

²¹ Shér pa wati shekárá gorrant o
wati waráká cha Hodáyá lóthant.

²² Róch ke dara kayt, pera tarrant o
wati hóndháni tahá áráma kanant.

²³ Á wahdá mardom wati kárána rawant o
tán bégáhá zahmata kasshant.

²⁴ Oo Hodáwand! Tai kár chinkadar báz ant,
taw, é sajjahén pa hekmat addh kortagant,
zemin cha tai jórh kortagénán porr ent.

²⁵ Daryá ent ke práh o sháegán ent o
cha sahdárá sarréch,
kasán o mazanéná.

²⁶ Bójiga rawant o káyant o mazanén ápi jánwar ham,
ke taw jórh kortagant ke ápay tahá gwázi bekanant.

²⁷ Sajjahénáni chamm tará sakk ant,
ke áyáni waráká pa wahd bedayay.

²⁸ Taw ke dayayesh,
áesh yakjáha kanant,
taw ke wati dastá pacha kanay,
é cha sharrén chizzán séra bant.

²⁹ Taw ke wati démá chéra dayay,
é paréshána bant o sarsara janant,
esháni sáhá ke pacha geray
merant o háká pera tarrant.

³⁰ Wati ruhá ke déma dayay
é addha bant.
Zeminay sarborá nót o tázaga kanay.

³¹ Hodáwanday shán abad bemánát,
Hodáwand cha wati kárán shádmán bát.

³² Hamá ke zeminá chárit, zemina larzit,
kóhán ke dasta jant, dutta bant.

³³ Man wati sajjahén zendá pa Hodáwandá sawta janán,
tánke zendag án, wati Hodáyá názénán.

³⁴ Mani pegr o hayál áiá pasond bátant

^a 17:104 Kunj, mazanén morgé ke Orduá bagalá o Pársia laklak gwashaga bit. Engréziá “stork” ent. ^b 18:104 Rijgushk, moshkay paymén jánwaré, bale cha moskhá master ent.

ke man áiay bárgáhá shádmánia kanán.

³⁵ Bale gonahkár cha zeminá gár o gomsár bátant o
badkár pasht makapátant.

Hodáwandá benázén, oo mani arwáh!
Hodáwandá benázénét, Halléluyá.

Hodáay mójezahán yát kanét

105 Hodáwanday shográ begerét o hamáiy námá begerét,

kawmán cha áiay kárán sahig kanét.

² Áiá benázénét, áiá pa sawt benázénét,
áiay sajjahén bákamálén kárani habará bekanét.

³ Áiay pákén námay sará pahr bekanét,
Hodáwanday shóház kanókáni del shádmán bát.

⁴ Hodáwand o áiay zór o wákay lóthók bebét,
modám áiay chehragay didáray shóházá bebét.

⁵ Áiay kortagén bákamálén kárán yát kanét,
áiay mójezah o dátágén hokmán,

⁶ oo áiay hezmatkárén Ebráhémay nasl,
oo Ákubay chokkán ke áiay gechén kortagén ét!

⁷ Á, Hodáwand may Hodá ent.

Áiay dádrasi sajjahén jaháná rasant.

⁸ Á warí ahd o paymáná tán abad yáta kant,
hamá labz ke áiá gón hazár naslá kort,

⁹ hamá ahd ke gón Ebráhémá korti o
hamá sawgend ke gón Esáká wárti,

¹⁰ gón Ákubá karáré bast o pakkái kort,
gón Esráilá, abadmánén ahdé.

¹¹ “Kanhánay sardhagará tará bakshán,
ke shomay bahr o mirása bit.”

¹² Á wahdá ke é kammok mardom atant,
kammok atant o darámad,

¹³ é kawm o á kawmay nyámá darpadar atant,
é moltk o á moltká gashtant.

¹⁴ Kassá áyáni sará zolm kanagi naesht,
pa áyánigi, áiá bádsháh neherr dátant:

¹⁵ “Mani ‘rógen per moshtagénán’^a dast per makanét o
mani nabián noksán madayét.”

¹⁶ Zeminá dhokkáli ér áwort o
áyáni nánay ambári próshtant.

¹⁷ Áyáni démá mardomé rawáni dát,
Issop, ke goláméay hesábá bahá kanag but.

¹⁸ Áiay pádesh pa band o zamzil thappig kortant o

^a 105:15 Rógen per mosthagénán, bezán pa bádsháhiá gechén kanag.

ásenén tawké gotthá dátesh,

¹⁹ tán hamá wahdá ke áiay habar rást butant,

Hodáay habará áiay rásti pakká kort.

²⁰ Bádsháhá Issop lóthet o ázát kort,

mardománi hákemá ázát kort.

²¹ Bádsháhá wati lógay master kort,

wati sajjahén mál o melkatay hákem,

²² ke bádsháhay kárendahán wati tabá adab bekant o

kamáshán dánaiay tálimá bedant.

²³ Nun Esráil Mesrá átk,

Ákub, Hámay sardhagárá^a pa darámadi jahmenend but.

²⁴ Wati mahluki ábád o

cha áyáni dozhmenán zóráwarter kortant.

²⁵ Dozhmenáni deli gardént tán cha áiay kawmá naprat bekanant o

áiay hezmatkáráni helápá pandal besázant.

²⁶ Áiá wati hezmatkárén Mussá rawán dát o

Hárún, ke wat gechéni kortagat.

²⁷ Eshán mardománi nyámá Hodáay ajabbatén nesháni o

áiay mójezah pésh dáshtant, Hámay sardhagárá.

²⁸ Áiá tahári rawán dát o zemin tahár kort,

áiay habaray náparmániesh nakortagat.

²⁹ Áyáni ápi hón kort o

máhigi koshtant.

³⁰ Sardhagáresh cha pogolá porr but

ke tán áyáni bádsháhi wábjáhán sar butant.

³¹ Áiá habar kort o makeskáni lashkar átkant o

passhag áyáni sajjahén molká mán retk.

³² Hawray badalá tróngali gwárént,

ás o bir, áyáni sajjahén sarzaminá.

³³ Áyáni angur o enjiray drachki tabáh kortant o

molkay drachki próshtant.

³⁴ Hokmi kort o madag átkant,

kathag^b, béhesábá.

³⁵ Áyáni molkay sajjahén sabzagesh wártant o

hákay sajjahén bar o samaresh ér bort.

³⁶ Nun áyáni sajjahén awali chokki jatant

áiay mardánagiay awali bar o samar.

³⁷ Wati mardomi zarr o sohrá bár kort o dhanná áwortant o

cha áyáni kabilahán kassá thagal nawárt.

³⁸ Mesr cha Bani Esráilay rawagá gal but,

chéá ke áyáni torsá gár at.

³⁹ Áiá jambaré sáhél kort o póshéntant,

ásé róki kort ke shapá rozhnáiesh bedant.

^a 105:23 Hámay sardhagár, bezán Mesr. ^b 105:34 Kathag madagáni kesmé.

⁴⁰ Áyán lóthet o Hodáwandá baynkuén^a morg rawán dát o
ái gón ásmáni naganá sér kortant.

⁴¹ Taláré tali dát o áp rawán but,
gyábáná kawré tatk.

⁴² Chéá ke warí pákén kawli yát at
ke gón warí hezmatkárén Ebráhémá kortagati.

⁴³ Áiá warí kawm pa shádmáni dhanná áwort,
warí gechén kortagén, gón shádehiay kukkárán.

⁴⁴ Áyáná rájáni sardhagári dát o
á, kawmáni kortagén mehnatáni málek butant,

⁴⁵ ke áiay rahbandáni randgiriá bekanant o
áiay Sharyatay hokmáni sará kár bekanant.
Hodáwandá benázénét, Halléluyá.

Hodáwanday shográ begerét ke nék ent

106 Hodáwandá benázénét, Halléluyá. Hodáwanday shográ begerét ke nék ent o mehri abadmán.

² Kay Hodáwanday porwákén káráni tawsip o
áiay tamánén satá o sanáyá korta kant?

³ Bahtáwar ant hamá ke adlá barjáh dárant,
hamá ke modám ensápay sará kára kanant.

⁴ Oo Hodáwand! Hamá wahdá ke warí mardománi sará rahma kanay, maná mashamósh.
Mani kerrá byá o maná berakkén

⁵ ke tai gechén kortagénáni washbahtiá begendán,
ke tai kawmay shádmániá hawár bebán o
tai mahlukay hamráhiá pahr bekanán.

⁶ Má gonáh kortag, may petán ham,
má radén ráhé zortag o badkári kortag.

⁷ Á wahdá ke may pet o pirok Mesrá atant,
tai hayrán kanókén káráni némagá delgóshesh nakort o
tai sajjahén mehrabániesh shamoshtant,
daryáay kerrá sarkasshiesh kort, Sohrzeray kerrá.

⁸ Bale Hodáwandá pa warí námaygi rakkéntant,
tánke warí zór o wáká záher bekan.

⁹ Áiá Sohrzer neherr dát o zer hoshk but,
cha johlánkián anchosh gwázéntanti ke purah gyábáné.

¹⁰ Cha badwáháni dastá rakként o
cha dozhmenáni dastá móketanti.

¹¹ Ápá, áyáni dozhmen póshént,
cha áyán yakké ham pasht nakapt.

¹² Nun Hodáwanday labzay sará báwaresh kort o

^a 105:40 Baynku kapinjeray dhawlén morge, bale cha kapinjerá kaster.

áiay satá o sanáesh kort.

¹³ Bale zutt békayál butant ke áiá ché kortagat o
pa áiay shawr o saláhá wadáresh nakort.

¹⁴ Gyábáná wati hawá o hawasáni randgir butant o
hoshkáwagán^a Hodáesh chakkáset.

¹⁵ Gorhá harché ke lóthetesh, Hodáyá dátant,
bale áyáni jáná warókén nádráhié ham dáti.

¹⁶ Ordgáhá^b, Mussáay sará hasaddesh kort o
Hárunay sará ham, ke Hodáwanday palgárttagén dini péshwá at.

¹⁷ Gorhá zeminá dap pach kort o Dátán^c éri bort o
Abirámay thóli^d bári dát.

¹⁸ Áyáni thóliá ásé mán kapt o
bránzán badkár sótkant.

¹⁹ Sináay kóhá^e gwaské jórhesh kort o
ásá táptagén teláhén botesh parastesh kort.

²⁰ Wati mazanshánén Hodáy badalá
káhwárén jalabén gókéay^f botesh zort.

²¹ Wati rakkénókén Hodáesh shamosht,
hamá ke Mesrá mazanén kári kortagat.

²² Hámay sardhagárá hayrán kanókén o
Sohrzeray kerrá bákamálén kári kortagat.

²³ Gorhá Hodáyá gwasht: “Gár o gomsáresha kanán.”
Bale áiay gechén kortagén Mussá nyámá kapt o
pa áyáni tabáh kanagá Hodáay gazabi dásht.

²⁴ Á delkasshén molkay arzesh o kadresh nazánt,
áiay kawlay sará báwaresh néstat.

²⁵ Wati gedánáni tahá norondhetesh o
Hodáwanday habaresh nazort.

²⁶ Gorhá dasti chest kort o sawgendi wárt
ke gyábáná tabáhesha kanán o

²⁷ chokk o nomásagánesh darkawmáni nyámá gár o gomsára kanán o
sajjahén molkán sheng o shággesha kanán.

²⁸ Áyán watará gón Bahal Péórá[□] jog[□] kort o
pa mordagán kortagén korbanigesh wártant.

²⁹ Gón wati badkárián
Hodáwandesh zahr baráént,
hawp o wabáé saráesh kapt.

³⁰ Bale Pinihás[□] nyámá óshtát o dwái kort o

^a 14:106 Hoshkáwag, hoshk o béápén zemin ke ódá heccha narodit. ^b 106:16 Ordgáh hamá jágah ent ke mardom pa kasánén wahdáá gedána bandant o nendant. ^c 17:106 Dátán cha á mardomán yakké at ke gyábáná Mussái namannet. ^d 17:106 Abirámay thóli rombé at ke gyábáná Mussáesh namannet. ^e 19:106 Asligén Ebráni syáhaga gwashit: “Hórébay kóhá”. Hórébay kóh, Sináay kóhay domi nám ent. ^f 106:20 Jalabén gók, bezán warnáén narén góké ke pa kárá rám kanag nabutag. [□] 28:106 Bahal Péór boté at ke Péór námén jágahéá parastesh kanaga but. [□] 28:106 Jog dáré ke pa zeminay shóm kanagá do gókay gardená bandanti. [□] 106:30 Pinihás mardoméay nám ent.

wabá dárag but.

³¹ É pa áiá páki o palgárié hesáb árag but
nasláni nasl, tán abad.

³² Maribáay ápáni kerrá
Hodáwandesh hezhm geráent o
áyáni sawabá Mussá janjálá kapt,
³³ chéá ke Mussáesh delsyáh kort o
cha áiay dapá sobakkén habaré dar átk.

³⁴ Kawmesh á paymá tabáh nakortant ke
Hodáwandá parmán dáttagatant.

³⁵ Nun gón kawmán hór o tór but o
hamáyáni rasm o dódesh zortant.

³⁶ Hamáyáni botesh sojdaha kortant o
é bot pa áyán dámé butant.

³⁷ Wati bachakk o jenekkesh
pa déhán korbániga kortant.

³⁸ Bégonáhén hónesha rétk
wati bachakk o jenekkáni hón,
ke pa Kanhánay botán korbánigesha kortant o
zemin cha esháni hóná áludag but.

³⁹ Gón wati kárán watá nápák o
gón wati kerdán watá syahkáresha kort.

⁴⁰ Paméshká, Hodáwand wati kawmay sará zahr gept,
deli cha wati mirásá bad but.

⁴¹ Darkawmáni dastá dátanti o
badwáhán áyáni sará hákemi kort.

⁴² Dozhmenán áyáni sará zolm kort o
wati chérdast kortant.

⁴³ Hodáwandá báz bará ázát kortant
bale wati shawr o hayáláni tahá sarkasshiesh kort o
gonáháni tahá bokketant.

⁴⁴ Bale wahdé ke áyáni peryáti eshkot,
disti ke chón paréshán ant,

⁴⁵ gón áyán wati ahd o karári yát kort o
cha wati bázén mehrá, cha áyáni badián sar gwast.

⁴⁶ Áyáni sajjahén bandig kanókáni delá
pa áyán rahmi péda kort.

⁴⁷ Oo Hodáwand, may Hodá! Márá berakkén,
márá cha darkawmáni nyámá chen o yakjáh kan
ke tai pákén námay shográ begerén o
pa tai satáyá pahr bekanén.

⁴⁸ Hodáwandá satá o saná bát, Esráilay Hodáyá,
abad tán abad.

Sajjahén mardom begwashátant: “Anchosh bát. Ámin.”
Hodáwandá benázénét, Halléluyá.

Zaburay Panchomi ketáb

Zabur 150—107

Hodáwanday mehr abadmán ent

107 Hodáwanday shográ begerét ke nék ent o mehri abadmán.

² Hodáwanday rakkéntagén habar bekanátant,
hamá ke cha dozhmenáni dastá rakkéntaganti,
³ hamá ke cha bázén sardhagárán zortag o yakjáhi kortagant,
cha shagreb o magreb, cha shomál o jonubá.

⁴ Lahtén, jangal o gyábánán sargardán but o
pa choshén shahréá ráhé nadistesh ke jahmenend bebant.

⁵ Gozhnag o tonnig mantant,
markig butant.

⁶ Nun sakkiáni tahá Hodáwanday gwará peryátesh kort o
áiá cha sakkián rakkéntant.

⁷ Áiá cha tachkén ráhéá rahshóni kortant,
dém pa shahréá ke ódá jahmenend bebant.

⁸ Hodáwanday shográ begerátant, áiay mehr o
pa baniádamá áiay bákamálén káráni sawabá.

⁹ Hamá ent ke tonnigán sérápa kant o
gozhnagán cha sharrén waráká sérláp.

¹⁰ Tahárterén tahárián neshtagatant,
ásenén zamziláni bandig o azáb atant

¹¹ ke Hodáy habaráni helápá sarkasshiesh kortagat o
borzén arshay Hodáy sar o sójesh kalág bastagatant.

¹² Gorhá zahmatkasshiay sará dát o áyáni goruri prósht,
thagalesh wárt o madat kanókesh néstat.

¹³ Nun sakki o sóriáni tahá gón Hodáwandá peryátesh kort o
áiá cha janjálán rakkéntant.

¹⁴ Cha tahárterén tahárián dari kortant o
áiáni zamzili próshtant.

¹⁵ Hodáwanday shográ begerátant,
áiay mehr o
pa baniádamá áiay bákamálén káráni sawabá

¹⁶ ke brenjén darwázagi próshtant o
ásenén bandi goddhetant.

¹⁷ Cha wati sarkasshiá ahmak butant o
wati gonáháni sawabá sakki o sórián kaptant.

¹⁸ Warákesh gothá éra nashot o

markay darwázagá rasetant.

¹⁹ Nun sakki o sóriáni tahá gón Hodáwandá peryátesh kort o
áiá cha janjálán rakkéntant.

²⁰ Wati hokmi ráh dát o dráhi kortant o
cha kall o kaddhá rakkéntanti.

²¹ Hodáwanday shográ begerátant, áiay mehr o
pa baniádamá áiay bákamálén káráni sawabá.

²² Shogrgozáriay korbánig bekanátant o
gón shádmániay sawtán áiay káráni kessahá byárátant.

²³ Hamá ke gón bójigán daryáyá shotant,
hamá ke ápáni sará sawdágeriesh kort,

²⁴ Hodáwanday káresh distant,
mán johlánkián áiay hayrán kanókén kár.

²⁵ Áiá habar kort o tuppánén gwáté átk o
daryáay chawli chest kortant.

²⁶ Bójig borzád tán arshá shotant o
jahlád tán johlánkián kaptant o
cha janjálá áyáni arwáh áp but.

²⁷ Sharábiáni paymá tattarag o thagal waragá laggetant o
áyáni sajjahén ezm o honar gár but.

²⁸ Nun sakki o sóriáni tahá gón Hodáwandá peryátesh kort o
áiá cha janjálán rakkéntant.

²⁹ Tuppáni érmósh kort o
daryáay chawl neshtant.

³⁰ Tuppán ke ér nesht, gal butant,
dém pa hamá tayábá rashónii kortant ke wat rawagesh lóthet.

³¹ Hodáwanday shográ begerátant, áiay mehr o
pa baniádamá áiay bákamálén káráni sawabá.

³² Mardománi mocchiá áiá satá bekanátant o
kamásháni majlesá tawsip.

³³ Á kawrán gyábána kant,
tachókén chammagán, hoshkáwagén zemin o

³⁴ kesht o keshári zeminán sorágá^a kant,
óday jahmenendáni badkáriay sawabá.

³⁵ Gyábánán gwarma^b kant o
hoshkén zeminán, tachókén chammag.

³⁶ Shodigi áwort o hamódá jahmenend kortant o
áyán shahré ábád kort o neshtant.

³⁷ Áyán dhagár kesht o anguri bág ábád kort
ke báz bar o samaresh dát.

³⁸ Áiá barkat dátant o á sakk báz géshter butant,
naeshti ke dalwatesh kamm bebant.

³⁹ Nun á kamm tarrán o wár o zár butant,
cha ázár o janjál o gamá.

⁴⁰ Hamá ke sharapdárán bésharapa kant,

^a 107:34 Sórag, bezán gón wádá hawár butagén zemin ke ódá keshára narodit. ^b 107:35 Gwarm, bezán daryáchah.

ái zort o béráhén gyábánán darpadar kortant.

⁴¹ Bale hájatmandi cha sakkián dar kortant,

áyáni kahóli^a ramagáni paymá báz kortant.

⁴² Nékdelesha gendant o shádmánia kanant o
har badkár wati dapá banda kant.

⁴³ Harkas ke dáná ent, é kárán bechárit o
Hodáwanday pormehrén káráni sará sharriá pegr bekant.

Hodá ke gón ent, sóbéna bén

Sawté. Dáuday Zabur.

108 Mani del jam ent, oo Hodá!
Cha delay johlánkiá sawta janán o tará názénán.

² Oo soráz o changán! Ágah bét.

Man bámgwáhárá ham cha wábá páda kanán.

³ Kawmáni nyámá tai shográ gerán, oo Hodáwand!

Darkawmáni nyámá tará názénán,

⁴ ke tai mehr báz ent,
cha ásmánán borzter,
tai wapádári tán jambarán ent.

⁵ Oo Hodá! Ásmánáni sarborá tai mazansháni názénag bát o
sajjahén zeminá tai shán o shawkat sar bát.

⁶ Gón wati rástén dastá berakkén o maná passaw beday
tánke hamá mardom berakkant ke tará dóst ant.

⁷ Hodáyá cha wati pákiá habar kortag:
“Sóbéna bán o Shekémá bahra kanán o
Sukkótay daragá pa wat kadd o kesása kanán.

⁸ Galyád manig ent o Manassi manig,
Epráim mani jangi koláh ent,
Yahudá, bádsháhiay asá o
⁹ Muáb dasshódi trasht,
Edumay sará wati swásá chagala dayán^b o
Pilstiahay sará wati péróziay gwánká janán.”^c

¹⁰ Kay maná pasilbandén shahrá^d kárit?

Kay tán Edumá mani rahshóna bit?

¹¹ Oo Hodá! Taw hamá naay ke márá yalahet kortag?

Nun gón may lashkarán hamráha nabay?

¹² May dozhmenáni démá márá madat kan,
ke ensánay komakk náhudag ent.

^a 41:107 Kahól, bezán hánwár, hánwádah (yak lógéay nánwár). ^b 108:9 Swás chagal dayagay máná gerag o wati kanag ent. ^c 108:9 Band 7 tán 9 á bázén jágha o mardománi náma kayt. ^d 108:10 Pasilbandén shahr, bezán hamá shahr ke áiay chapp o chágerdá mohréni diwálé.

¹³ Hodá ke gón ent, sóbéna bén,
hamá ent ke may dozhamenán pádmála kant.

Sharmendagiay kabáh

Pa sázger o washalhánáni sálárá. Dáuday Zabur.

109 Oo mani satáyáni Hodá! Hámósh mabay.

- ² Chéá ke badkár o prébkárán
mani helápá wati dap pach kortag,
gón drógbandén zobánéá mani helápá gappesh jatag.
³ Maná gón napratién habarán chapp o chágerdesh kortag,
bésawabá gón man pa jangá pád átkagant.
⁴ Mani mehray badalá maná bohtámesh jatag,
bale man pa áyán nékén dwá kortag.
⁵ Mani nékiáni badalá gón man badia kanant o
mehray badalá naprat.

⁶ Gwashant: “Badkárén mardoméá eshiay chakká dawr day,
bell ke bohtám janóké eshiay rástén némagá óshtit.

⁷ Wahdé áiay dadrasiá kanant,
mayárbár zánag bát o
dwái gonáh hesáb bátant.

⁸ Róchi kammok bátant o
áiay ogdah o zemmawári degaréá berasát.

⁹ Chokki chóraw bátant o
jani janózám.

¹⁰ Chokki pendhók o darpadar bátant o
cha wati proshtagén lógán dar kanag bátant.

¹¹ Wámdári sajjahén mál o hastiá pach gerátant o
darámad áiay johdáni bar o samará barátant.

¹² Kass pa áiá mehrabán mabát o
áiay chórawáni sará bazzag makanát.

¹³ Padréchi gár bátant o
námesh pa démi naslán sar mabát.

¹⁴ Áiay pet o pirokáni gonáh Hodáwanday bárgáhá yát kanag bátant,
mátay gonáhi hechbar shódag mabátant.

¹⁵ Gonáhesh modám Hodáwanday chammáni démá bátant,
Hodáwand áyáni yátá cha zeminá gár kanát.

¹⁶ Chéá ke á hechbar pa kassá mehrabán nabut,
nézgár o hájatmandi ázár dátant o
delproshtagéni pa mark raséntant.

¹⁷ Nálat kanagi wassha but,
áiay wati sará kapátant.
Barkat dayagi wassha nabut,
hechbar barkati marasát.

¹⁸ Nálat kanagi chó pósháká gwará at,

ápay paymá áiay jáná ér nesht,
rógenay paymá haddháni shot.

¹⁹ Nálat kabáhé bát o áiay jendá bepóshát o
kamarbandéay paymá modám áiay sréná bandók bát.”

²⁰ Cha Hodáwanday némagá mani bohtám janókáni mozz hamé bát,
hamá ke mani helápá badén habara kanant.

²¹ Bale taw, oo Hodáwand, tahná taw
pa wati námaygi mani sará mehrabán bay,
cha wati mehray nékiá maná berakkén.

²² Chéá ke man nézgár o hájatmandé án o
delon bátená thappig ent.

²³ Man chó bégáhi sáhegéá gára bán,
chó madagéá chandhaga bán.

²⁴ Cha róchagá kóndhon drahagá ant,
jesm o jánon ranjetag o lágar ent.

²⁵ Bohtám janókáni kalági án,
maná ke gendant, sará chandhénant.

²⁶ Maná komakk kan, oo Hodáwand, mani Hodá!
Pa wati mehraygi maná berakkén.

²⁷ Bell bezánant ke é tai dast ent,
ke é kár taw kortag, oo Hodáwand!

²⁸ Á nálata kanant,
bale taw barkat bedayátay.

Hamlah ke kanant, sharmendag bátant,
bale tai hezmatkár shádmáni bekanát.

²⁹ Mani dozhmenán rosáiay jámag gwará dayag bát o
sharmendagiay kabáhá póshénag bátant.

³⁰ Man cha wati zobáná Hodáwanday sakk báz shográ gerán,
bázén mardoméay démá áiá satá kanán.

³¹ Chéá ke hájatmanday rástén némagá óshtit
tánke áiá cha dádrasáni hokmá berakkénit.

Mani rástén némagá benend

Dáuday Zabur.

110 É Hodáwanday paygám ent pa mani Hodáwandá:
“Mani rástén némagá benend
tán hamá wahdá ke tai dozhmenán
tai pádáni chéray padag o chárchóbáhá bekanán.”

² Hodáwand cha Sahyuná tai zóráwarén asáyá shahára dant o gwashit:
“Wati dozhmenáni nyámá hákemi kan.”

³ Á róchá ke taw wati lashkará moccha kanay,
tai mardom pa shawké góna bant.

Gón pákiay shán o zébáiá
tai warná tai gwará káyant,
chó ke nód^a cha bámgwáhay bátená.

⁴ Hodáwandá sawgend wártag o
pashómána nabít, ke:

“Taw tán abad dini péshwáé ay,
Malkisedikay^b hesábá.”

⁵ Hodáwand tai rástén dastá ent,
wati gazabay róchá bádsháhána droshit.

⁶ Kawmán sezá dant,
zeminá cha láshá porra kant o
sajjahén zeminay hákemána droshit.

⁷ Ráhá, cha kawréá ápa wárt o
sóbéna o sarbolanda bit.

Hodáwanday kár rást o pa adl ant

111 Hodáwandá benázénét, Halléluyá.

Cha delay johlánkiá Hodáwanday shográ gerán,
nékdeláni diwáná, mocchiay nyámá.

² Hodáwanday kár mazan ant,
harkasay delá ke neshtagant,
áyáni sará pa sharri pegra kanant.

³ Áiay kár shándár o porshawkat ant o
áiay adl tán abad barjama mánit.

⁴ Áiá waráka dant ke áiay torsesh delá ent,
Hodáwand mehrabán o rahm kanók ent.

⁵ Á hamáyán waráka dant ke áiay torsesh delá ent,
wati ahd o karará tán abad yáta kant.

⁶ Wati káráni zóri waráka dant ke áiay torsesh delá ent,
darkawmáni mirási waráka dáttagant.

⁷ Áiay dastáni kár rást o pa adl ant o
sajjahén rahbandi porehrebár.

⁸ Abad tán abad mohr o mohkam ant,
pa rásti o tachki kanag butagant.

⁹ Áiá waráka dant ke áiay torsesh delá ent,
tán abad waráka dant ke áiay torsesh delá ent.

¹⁰ Hodáwanday tors dánáiay bendát ent.
Hamá ke áiay rahbandáni randgiriá kanant,
áyán sharrén zántkária rasit.
Tán abad satá hamáiayg ent.

^a 110:3 Nód, bezan shapnamb. ^b 110:4 Malkisedik, Ebráhémay zamánagá bádsháh o dini péshwáé at.

Hodádóstáni bahtáwari

112 Hodáwandá benázénét, Halléluyá.

Bahtáwar ent hamá ke Hodáwanday tors áiay delá ent,
hamá ke áiay hokmi sakk báz dósta bant.

² Áiay nasl o óbádag zeminay sará porzóra bant,
barkat nékdeláni padréchá rasit.

³ Áiay lóg cha mál o melkatá porra bit o
áiay pahrézkári tán abad barjama mánit.

⁴ Pa nékdelán mán tahárókiá ham rozhna drapshénit,
á mehrabán, rahm kanók o ádel ent.

⁵ Bakshendah o wámdehén mardomay ásar sharra bit,
hamá ke wati kárán pa ensápa kant.

⁶ Chéá ke á hechbar larzénaga nabit,
pahrézkárén mardomé tán abad yát kanaga bit.

⁷ Á cha badén hálána natorsit,
deli jam ent, tawkali Hodáwanday sará ent.

⁸ Áiay del mohr ent, natorsit,
néth^a wati dozhmenáni shekastá gendit.

⁹ Gón garib o nézgárán béhesáb bakshendah ent,
áiay pahrézkári tán abad barjam ent.

Áiay kánth^b pa sháné borz kanaga bit.

¹⁰ Badkára gendit o hezhmnáka bit,
cha zahrá dantána droshit o ápa bit,
badkárav wáhag námoráda bant.

Hodáwand nézgárá chesta kant

113 Hodáwandá benázénét, Halléluyá.

Benázénét, oo Hodáwanday hezmatkárán!

Hodáwanday námá benázénét.

² Hodáwanday námá satá o saná bát,
cha annuná tán abad.

³ Mashreká beger tán magrebá,
Hodáwanday nám názénag bát.

⁴ Hodáwand sajjahén kawmáni sará porjalál ent o
áiay shán o shawkat cha ásmánán borzter.

⁵ Kay may Hodáwandén Hodáay dhawlá ent?
May Hodáay borzád, wati bádsháhi tahtá neshtag.

⁶ Á jahla bit
ke ásmán o zeminá bechárit.

⁷ Á nézgárá cha háká o

^a 8:112 Néth, bezán godhsará, áherá. ^b 9:112 Kánthay máná edá zór o kodrat ent.

hájatmandá cha poráni hákóthá^a chesta kant.

⁸ Shahzádagáni nyámá nádénitesh,
wati kawmay shahzádagáni nyámá.

⁹ Santh o béawládén janéná washdel o chokkáni máta kant o
áiay lógá ábád.

Hodáwandá benázénét, Halléluyá.

Wahdé Esráil cha Mesrá dar átk...

114 Wahdé Esráil cha Mesrá dar átk,
Ákubay hándán, cha darámadén zobánéay mardománi nyámá,
² Yahudá Hodáay gechén kortagén o
Esráil áiay bádsháhi but.

³ Daryáyá dist o tatk,
Ordonay kawr, poshtá kenzet.

⁴ Kóh chó gwarándhá setth janán butant o
jomp chó gwaragá.

⁵ Oo daryá! Ché but ke taw tatkay?
Oo Ordon! Ché but ke taw poshtá kenzetay?

⁶ Oo kóhán! Ché but ke shomá chó gwarándhá setth jat,
shomá chó gwaragá, oo jompán?

⁷ Belarz, oo zemin!
Hodáwanday bárgáhá,
Ákubay Hodáay bárgáhá.

⁸ Áiá talár gwarm kortant, cha ápá porr,
mohréen seng ápay chammag.

May Hodá arshá ent

115 Márá enna, oo Hodáwand! Márá enna,
tai námá shán o shawkat berasát,
tai mehr o wapádáriay sawabá.

² Á dega kawm chéá begwashant:
“Esháni Hodá kojá ent?”

³ May Hodá arshá ent,
harché ke áiá wassha bit, hamá kárá kant.

⁴ Áyáni “hodá” nograh o teláh ant,
ensánay dastay jórh kortagén bot.

⁵ Eshán dap per bale habar korta nakanant,
chammesh per bale dista nakanant,

^a 7:113 Poráni hákóth, sotkagén dáráni poray jágah, poráni bándhom.

⁶ góshesh per bale eshkota nakanant,
pónzesh per bale bó cheta nakanant,
⁷ dastesh per bale máreta nakanant,
pádesh per bale ráh shota nakanant,
na cha wati gotthá áwázé kassheta kanant.

⁸ Harkas ke eshán jórha kant,
hamesháni paymá bit o
hamá mardom ham ke esháni sará tawkala kant.

⁹ Oo Esráil! Hodáwanday sará tawkal kan,
hamá shomay komakk o espar ent.

¹⁰ Oo Hárunay lóg! Hodáwanday sará tawkal kan,
hamá shomay komakk o espar ent.

¹¹ Oo Hodátorsán! Hodáwanday sará tawkal kanét,
hamá shomay komakk o espar ent.

¹² Hodáwandá márá yát kortag o
márá barkata dant,
Esráilay lógá barkata dant,
Hárunay lógá barkata dant.

¹³ Hamáyán barkata dant ke Hodáwanday tors áyáni delá ent,
mazanén o kasánénán, yakk paymá.

¹⁴ Hodáwand shomará géshá cha géshter kanát,
shomay jend o chokk, doénán.

¹⁵ Hodáwand shomará barkat dayát,
zemin o ásmánay addh kanók.

¹⁶ Borzén arsh Hodáwandayg ent o
zemini baniádamará dátág.

¹⁷ Mordag Hodáwandá nanázénant,
na á mardom ke rawant o bétawára bant.

¹⁸ É má én ke Hodáwandá satá dayén,
annun tán abad.
Hodáwandá benázénét, Halléluyá.

Maná Hodáwand dóst ent

116 Maná Hodáwand dóst ent ke
mani tawári gósh dáshtag,
mani peryát o záriay tawár o

² wati delgóshi mani némagá tarrént.
Tán zendag án, gwánkia janán.
³ Markay sádán patáttagatán,
kabray tors mani sará kaptagat
gam o andóháni bandig atán.
⁴ Hodáwanday námon gept o gwashton:
“Oo Hodáwand! Mani zendá berakkén.”

⁵ Hodáwand mehrabán o ádel ent,

may Hodá, cha mehr o rahmá sarréch.

⁶ Hodáwand sádahdelén mardomána sambálit,
man ke wár o zár atán, maná rakkénti.

⁷ Padá áram bay, oo mani arwáh,
ke Hodáwand pa taw mehrabán butag.

⁸ Oo Hodáwand! Taw mani arwáh cha marká rakként,
mani chamm cha arsán o
pád cha lakoshagá

⁹ ke Hodáwanday bárgáhá gám bejanán
zendagénáni zeminá.

¹⁰ Maná báwar at, hamá wahdá ham ke gwashton:

“Sakk bazzag án.”

¹¹ Paréshániáni tahá gwashton:
“Harkas drógband ent.”

¹² É sajjahén sharri ke Hodáwandá gón man kortagant,
esháni badalá chón bedayán?

¹³ Nejátay pyálahá chesta kanán o
Hodáwanday námá tawára kanán.

¹⁴ Gón Hodáwandá wati kawlán puraha kanán,
áiay sajjahén kawmay démá.

¹⁵ Hodáay wapádáráni mark,
Hodáwanday démá gránkadr ent.

¹⁶ Oo Hodáwand! Man tai hezmatkár án,
haw, man tai hezmatkár án, tai móleday chokk,
taw maná cha zamzilán ázát kortag.

¹⁷ Shogrozáriay korbánigé tará pésha kanán o
Hodáwanday námá gerán.

¹⁸ Gón Hodáwandá wati kawlán puraha kanán,
áiay sajjahén kawmay démá,

¹⁹ Hodáwanday lógay péshgáhá,
tai nyámá, oo Urshalim!
Hodáwandá benázénét, Halléluyá.

Oo sajjahén kawmán! Hodáwandá benázénét

117 Oo sajjahén kawmán! Hodáwandá benázénét.

Oo sajjahén ráján! Áiá satá kanét,

² ke Hodáwanday mehr pa má sakk báz ent o
áiay wapádári abadmán.

Hodáwandá benázénét, Halléluyá.

Hodáwanday rástén dastá mazanén káré kortag

118 Hodáwanday shográ begerét ke nék ent o mehri abadmán.

² Esráil begwashát:

“Áiay mehr abadmán ent.”

³ Hárunay lóg begwashát:

“Áiay mehr abadmán ent.”

⁴ Hodátors begwashátant:

“Áiay mehr abadmán ent.”

⁵ Wati tangián gón Hodáwandá peryáton kort,
áiá maná passaw dát o ázát kort.

⁶ Hodáwand gón man ent, mana natorsán.

Ensán maná ché korta kant?

⁷ Hodáwand gón man ent, mani madat kanók,
pa sarperázi dozhmenáni némagá charán.

⁸ Hodáay kerrá panáh zurag
cha ensánay sará tawkal kanagá sharter ent.

⁹ Hodáay kerrá panáh zurag
cha shahzádagáni sará tawkal kanagá sharter ent.

¹⁰ Sajjahén kawmán maná angerr kort,
bale man Hodáwanday námá prósh dátant.

¹¹ Maná cha har némagá chapp o chágérdesh kort,
bale man Hodáwanday námá prósh dátant.

¹² Chó bénagmakeská^a mani sará per retkant,
bale chó konthagá, damáná sotkant o
man Hodáwanday námá prósh dátant.

¹³ Maná sakká télánkesh dát ke bekapán,
bale Hodáwandá maná komakk kort.

¹⁴ Hodáwand mani zór o mani sawt ent,
hamá mani rakkénók ent.

¹⁵ Pahrézkáráni tambuáni tahá sóbén bayag o shádmániay kukkár ent:
“Hodáwanday rástén dastá mazanén káré kortag.”

¹⁶ Hodáwanday rástén dast chest butag,
Hodáwanday rástén dastá mazanén káré kortag.”

¹⁷ Mana namerán, zendaga mánán o
Hodáwanday kortagén káráni járá janán.

¹⁸ Hodáwandá maná sharr adab dát,
bale markay dastá nadáti.

¹⁹ Adl o rástiay darwázagán pa man pach kan,
ke bepoterán o Hodáwanday shográ begerán.

²⁰ Esh ent Hodáwanday darwázag

^a 118:12 Bénagmakesk, bezán hamá gwamz yá góderre addha kant.

ke pák o pahrézkár cha edá tahá shota kanant.

²¹ Tai shográ gerán ke taw maná passaw dát,
taw mani rakkénók ay.

²² Á seng ke bábandén ostáyán pasond nakort o nazort,
hamá seng bonhesht but.

²³ É Hodáwanday kár ent o
may chammán bákamál ent.

²⁴ Esh ent hamá róch ke Hodáwandá áwortag,
byá pa é róchá gal o shádehia kanén.

²⁵ Oo Hodáwand! Márá berakkén.
Oo Hodáwand! Márá sóbén kan.

²⁶ Mobárak bát hamá ke Hodáwanday námá kayt.
Cha Hodáwanday lógá shomará barkata dayén.

²⁷ Hodáwand, Hodá ent,
wati nuri may sará drapshéntag.
Aiday korbánigá gón korbánjáhay kánthán pa sád bebandét.

²⁸ Taw mani Hodá ay,
tai shográ gerán.
Taw mani Hodá ay,
tará názénán.

²⁹ Hodáwanday shográ begerét
ke nék ent o mehri abadmán.

Tai Sharyat maná dóst ent

119 Bahtáwar ant hamá ke ráhesh rást ant o Hodáwanday Sharyatay hesábá gardant.

² Bahtáwar ant hamá ke Hodáwanday parmánána mannant o
pa setk o del áiay shóházá ant,

³ hamá ke hecch náensápia nakanant o
áiay ráhá rawant.

⁴ Taw watí rahband dátágant
ke pa sarjamiá áyáni randgiri kanag bebit.

⁵ Pa tai hokmáni barjáh dáragá
mani ráh mohr o mohkam bátant.

⁶ Gorhá á wahdá ke tai sajjahén hokmáni némagá chárán,
sharmsára nabán.

⁷ Gón tachkén deléa tai shográ gerán,
wahdé tai ádelén parmánán dar barána bán.

⁸ Tai hokmáni randgiriá kanán
maná pahk yalah makan.

⁹ Warnáén mardomé chón watí ráhá pák dáshta kant?
Gón tai habaray randgiriá.

¹⁰ Tará pa setk o del shóháza kanán,

maná mayl ke tai hokmáni ráhá yalah bekanán.

¹¹ Man tai habar wati delá ambár kortagant
ke tai helápá gonáh makanán.

¹² Tará satá bát, oo Hodáwand!
Wati hokmán maná sój day.

¹³ Man cha tai dapá dar átkagén sajjahén hokmán
dape wata gwashán.

¹⁴ Cha tai parmánáni mannagá anchó shádána bán
ke cha mazanén ganjéá.

¹⁵ Tai rahbandáni sará pegra kanán o
tai ráhána charán.

¹⁶ Cha tai hokmán shádmána bán o
tai habará nashamóshán.

¹⁷ Wati hezmatkáray sará mehrabán bay
tánke zendag bemánán o
tai habaray parmánbardáriá bekanán.

¹⁸ Mani chammán pach kan
ke tai Sharyatay bákamálén chizzán begendán.

¹⁹ Man zeminá darámadé án,
wati hokmán cha man chér maday.

²⁰ Pa tai hokmán
mani arwáh modám zahirán droshtag.

²¹ Taw gorunákén mardomán hakkala dayay, hamá nálat butagénán
ke tai hokmáni ráhá yalahá kanant.

²² Sobakki o kamsharapiá cha man dur kan,
chéá ke man tai parmánána mannán.

²³ Harchont ke hákem hóra nendant o mani helápá pandala sázant,
bale tai hezmatkár, tai hokmáni sará pegra kant.

²⁴ Tai parmán mani shádmáni ant,
pa man sój o saláh ant.

²⁵ Man hákán waptagán,
maná wati labzay hesábá zendag bedár.

²⁶ Man tará wati ráháni hál dát o taw maná passaw dát.

Nun maná wati hokmán sój day.

²⁷ Maná, wati rahbandáni ráhá sarpad kan o
man tai bákamálén káráni sará pegra kanán.

²⁸ Mani arwáh cha andohána nálit,
maná wati habaray hesábá mohkam kan.

²⁹ Maná cha prébay ráhán dur bedár,
mani sará rahm kan o Sharyatá maná beday.

³⁰ Man wapádáriay ráh dar chetag,
wati del tai hokmáni mannók kortag.

³¹ Man gón tai parmánána bandóka bán,
oo Hodáwand!

Mayl ke sharmsár kanag bebán.

³² Tai hokmáni ráhá maydána kanán,
ke taw mani delá dáná kanay.

³³ Oo Hodáwand! Wati hokmáni ráhá maná sój day,
ke tán áherá bedáránesh.

³⁴ Maná agl o hósh beday
ke man tai Sharyatay páband bebán o
pa del o setk eshiay randgiriá bekanán.

³⁵ Wati hokmáni ráhá mani rahshón bay,
ke mani wasshi hamesháni tahá ent.

³⁶ Mani delá dém pa wati parmánán betarrén,
mani nap o puttáni katthagay badalá.

³⁷ Mani chammán cha béarzeshén chizzán dur bedár,
maná wati ráhán zendag bedár.

³⁸ Gón wati hezmatkárá kortagén kawlá bedár
hamá kawlá ke gón Hodátorsána kanay.

³⁹ Hamá bénangiá dur kan ke maná cha áiá torsit,
ke tai hokm nék ant.

⁴⁰ Pa tai rahbandán hodónák án,
cha wati adlá maná zendag bedár.

⁴¹ Tai mehr maná sar bát, oo Hodáwand, o
hamá neját ham ke taw kawl kortag.

⁴² Gorhá man hamá mardomán passawa dayán ke maná kalága bandant,
chéá ke man tai habaray sará tawkala kanán.

⁴³ Rástén habará cha mani dapá pach mager,
ke mani omét tai hokmáni sará ent.

⁴⁴ Modám tai Sharyatay randgira bán,
abad tán abad.

⁴⁵ Pa ásudagia gardán,
ke tai rahbandáni shóházá butagán.

⁴⁶ Bágsháháni démá tai parmánáni habará kanán o
pashal o sharmendaga nabán.

⁴⁷ Cha tai hokmán shádmán án,
ke maná dóst ant.

⁴⁸ Man pa tai hokmáni zuragá wati dast shahár dáttagant
ke maná dóst ant o
tai parmánáni sará pegra kanán.

⁴⁹ Gón wati hezmatkárá kortagén kawlá yát kan,
ke tai kawl mani omét ent.

⁵⁰ Sakki o sórián mani tasallá hamesh ent,
tai kawl maná zendaga dárit.

⁵¹ Gorunákén mardom maná dáemá kalága bandant,
bale man tai Sharyatá yalaha nakanán.

⁵² Oo Hodáwand! Maná tai ahdi hokm yát ant o
maná cha hameshán tasallá rasit.

⁵³ Badkáráni sawabá hezhmnáka bán,
hamáyáni sawabá ke tai Sharyatesh yalah dáttag.

⁵⁴ Tai hokm mani sawt butagant
har jágah ke nendók butagán.

⁵⁵ Oo Hodáwand! Shapán tai námá yáta kanán o

tai Sharyatay ráhá bán.

⁵⁶ Mani rág hamé butag,
tai rahbandáni randgiriá kanán.

⁵⁷ Taw manig ay, oo Hodáwand!

Man kawl kortag ke tai habaráni randgiriá kanán.

⁵⁸ Pa del o setk tai chehragay shóházá butagán,
mani sará hamá paymá mehrabán bay ke kawlet kortag.

⁵⁹ Man wati rág cháretagant o
nun dém pa tai parmánán átkagán.

⁶⁰ Tai hokmáni managá eshtápa kanán,
déra nakanán.

⁶¹ Harchont ke badkáráni sádán maná patátag,
bale tai Sharyatá nashamóshán.

⁶² Shapnémá páda káyán o tai shográ gerán
pa tai ádelén hokmán.

⁶³ Man hamá sajjahénáni sangat án ke tai tors áyáni delá ent,
hamá mardománi ke tai rahbandáni randgiriá kanant.

⁶⁴ Zemin cha tai mehrá porr ent, oo Hodáwand!
Wati hokmán maná sój day.

⁶⁵ Pa wati hezmatkárá mehrabán butagay,
hamá paymá ke taw kawl kortagat, oo Hodáwand!

⁶⁶ Maná zánt o sarpadi sój day
ke man tai hokmáni sará tawkala kanán.

⁶⁷ Bazzag bayagá pésar, cha rástén ráhá thagal warán atán,
bale nun tai habaray randgir án.

⁶⁸ Taw nék ay o nékia kanay,
wati hokmán maná sój day.

⁶⁹ Harchont ke gorunákén mardomán mani sará drógén bohtám jatag,
bale man pa del o setk tai rahbandán barjáha dárán.

⁷⁰ Esháni del seng o béehsás ant
bale man cha tai Sharyatá shádmán án.

⁷¹ Sharr but ke sakki o sóriáni tahá kaptán
ke tai hokmán dar bort bekanán.

⁷² Cha tai dapá dar átkagén Sharyat pa man
cha hazárán teláh o nograhá sharter ent.

⁷³ Maná tai dastán addh kort o shekl o dróshom dát,
maná agl o hósh beday ke tai hokmán sarpad bebán.

⁷⁴ Hodátors gón mani gendagá shádmán bátant,
ke man wati omét gón tai habará bastag.

⁷⁵ Oo Hodáwand! Mana zánán ke tai hokm pa adl ant o
taw cha wati wapádáriá maná mosibatáni tahá dawr dáttag.

⁷⁶ Tai mehr mani tasallá bát,
hamá paymá ke taw gón wati hezmatkárá kawl kortag.

⁷⁷ Tai rahmat maná sar bátant tán zendag bemánán,
ke tai Sharyat mani shádmáni ent.

⁷⁸ Gorunákén mardom sarjahl o pashal bátant ke watsará mani báposhtá drógesh bastag,

bale man tai rahbandáni sará pegra kanán.

⁷⁹ Harkas ke cha taw torsit dém pa man byáyát,
hamá mardom ke tai parmánán sarpada bant.

⁸⁰ Tai hokmáni bárawá mani del bémayár bát
tánke sharmendag mabán.

⁸¹ Mani arwáh pa hamá nejátá talwasit ke cha tai némagá ent,
man wati óst o omét gón tai habará bastag.

⁸² Mani chamm tai kawlay shóházá kór butagant,
gwashán: “Kadi maná tasallá dayay?”

⁸³ Chó mashkéá án ke duttáni tahá hoshk butag,
bale tai hokmon nashamoshtagant.

⁸⁴ Tán kadén tai hezmatkár wadárá bebit?

Kadi mani ázár dayókán sezá dayay?

⁸⁵ Gorunákén mardom pa man kalla kóchant,
tai Sharyatay helápá.

⁸⁶ Tai sajjahén parmán porehtebár ant,
maná komakk kan ke mardom maná mopt o náhakká ázára dayant.

⁸⁷ Maná cha zeminay sará gár o gomsár kanagi atant,
bale man tai rahband yalah nadátant.

⁸⁸ Wati mehray hesábá maná zendag bedár o
cha tai dapá dar átkagén hokmáni randgiriá kanán.

⁸⁹ Oo Hodáwand! Tai habar abadmán ent,
ásmáná mohr óshtátag.

⁹⁰ Tai wapádári nasláni nasl barjam ent,
taw zemin addh kort o é barjáha mánit.

⁹¹ Tai hokm tán róche maróchigá barjáh ant
chéá ke sajjahén chizz tai hezmatá kanant.

⁹² Agan tai Sharyat mani shádmáni mabutén,
man mosibatáni tahá gár o gomsár butagatán.

⁹³ Hechbar tai rahbandána nashamóshán,
ke taw cha hamesháni wasilahá maná zendag dáshtag.

⁹⁴ Maná berakkén ke taig án
tai rahbandáni shóházá butagán.

⁹⁵ Badkár mani tabáhiay wadárá ant,
bale man tai parmánáni némagá charán.

⁹⁶ Har kamálá haddé hast,
bale tai hokmán haddé nést.

⁹⁷ Tai Sharyat maná chón dóst ent,
sajjahén róchá hameshiay pegrá án.

⁹⁸ Tai hokm maná cha mani dozhmenán dánátera kanant,
ke modám gón man gón ant.

⁹⁹ Maná cha wati tálim dayókán géshter zánt hast
chéá ke tai parmánáni pegrá án.

¹⁰⁰ Cha kamáshán zántkárter butagán
ke tai rahbandáni randgiriá kanán.

¹⁰¹ Man wati pád cha har radén ráhá dur dáshtagant

ke tai habará dásht bekanán.

¹⁰² Cha tai hokmán wati démon natarréntag
ke taw wat maná tálím dátág.

¹⁰³ Tai habar chónén shirkenén támé kanant,
mani dapá cha bénagá shirkenter ant.

¹⁰⁴ Cha tai rahbandán maná zánt o sarpadia rasit,
paméshká maná cha har radén ráhá naprat ent.

¹⁰⁵ Tai habar pa mani pádán cherágé o
pa mani ráhá rozhné.

¹⁰⁶ Man sawgendé wártag o é sawgenday sará óshtátagán
ke tai ádelén hokmáni randgiriá kanán.

¹⁰⁷ Oo Hodáwand! Man sakk azáb saggetag,
anchosh ke kawlet kortag, maná zendag bedár.

¹⁰⁸ Oo Hodáwand! Man pa wáhagé tará satá kanán,
mani é korbánigá kabul kan o
maná wati hokmán sój day.

¹⁰⁹ Harchont ke modám markay panjagá án,
bale tai Sharyatá békayála nakanán.

¹¹⁰ Badkárán pa man dámé chér gétkag,
bale man cha tai rahbandán nathagaletagán.

¹¹¹ Tai parmán modám mani mirás ant,
mani delay shádmáni ant.

¹¹² Man wati del pa tai hokmáni mannagá tarréntag,
modám, tán godhsará.

¹¹³ Cha doruén mardomán naprata kanán o
tai Sharyatá dósta dárán.

¹¹⁴ Taw mani panáh o espar ay,
man wati óst o omét gón tai habará bastag.

¹¹⁵ Cha man dur bebét, oo badkárán,
ke man wati Hodáay hokmáni randgiriá bekanán.

¹¹⁶ Wati labzay hesábá maná mohkam bedár o man zendaga mánán,
mayl ke mani omét beproshit.

¹¹⁷ Maná mohr bedár ke berakkán,
modám tai hokmáni zegrá kanán.

¹¹⁸ Hamá mardomán yalahá kanay ke cha tai hokmáni ráhá dura bant,
ke áyáni prébkáriá ásaré nést.

¹¹⁹ Taw zeminay saray sajjahén radkár chó gand o gasarhá dawr dátagant,
paméshká maná tai parmán dósta bant.

¹²⁰ Mani jánay gósht cha tai torsá larzit o
maná cha tai rahbandána torsit.

¹²¹ Man adl o ensáp kortag,
maná setamgeráni dastá yalah makan.

¹²² Wati hezmatkáray salámati o washháliay zemánatá beday,
mayl ke gorunák mani sará zolm bekanant.

¹²³ Mani chamm pa hamá rakkénagá wadárig ant ke cha tai némagá ent,
tai ádelén kawlay purah bayagay entezárá án.

¹²⁴ Wati hezmatkárá wati mehray hesábá bechár o
wati hokmán maná sój day.

¹²⁵ Man tai hezmatkár án, maná sarpadi beday
ke tai parmánán bezánán.

¹²⁶ Oo Hodáwand! Wahd átkag ke taw káré bekanay,
chéá ke tai Sharyatá próshant.

¹²⁷ Maná tai hokm cha teláhá dóstter ant,
cha asligén teláhá géshter.

¹²⁸ Tai sajjahén rahbandáni rástiá mannán,
paméshká maná cha har radén ráhá naprat ent.

¹²⁹ Tai parmán bákamál ant,
paméshká áyána mannán.

¹³⁰ Tai habaray bayán kanag rozhna bakshit o
násarpadán sarpadia dant.

¹³¹ Man wati dapá pacha kanán,
tonníg án o pa tai hokmán zahirig.

¹³² Démá gón man tarrén o mani sará rahm kan,
anchosh ke taw modám gón wati námay dóst dárokána kanay.

¹³³ Wati habaray hesábá mani gámáni rahshón bay,
gonáhá mayl ke mani sará hákemi bekant.

¹³⁴ Maná cha ensánay zolmá bemók
ke tai rahbandáni randgiriá kort bekanán.

¹³⁵ Wati démá wati hezmatkár ray sará drapshén o
wati hokmán maná sój day.

¹³⁶ Cha mani chammán arsay kawra tachant
ke tai Sharyatay randgiri kanaga nabit.

¹³⁷ Oo Hodáwand! Taw ádel ay o
tai hokm barhakk ant.

¹³⁸ Á parmán ke taw dáttagant pa adl ant,
sarjamiá porehtebár.

¹³⁹ Mani gayratá maná jánsóch kortag
chéá ke mani dozhmenán tai habar shamoshtag.

¹⁴⁰ Tai habar pák o palgár ant o
tai hezmatkárá dóst ant.

¹⁴¹ Harchont ke man kamarzesh o hakiré án,
bale angat tai rahbandána nashamóshán.

¹⁴² Tai adl dáemi o
tai Sharyat rást ent.

¹⁴³ Sakki o sóri mani sará átkagant
bale tai hokm mani shádmáni ant.

¹⁴⁴ Tai parmán tán abad pa adl ant,
maná sarpadi beday ke zendag bemánán.

¹⁴⁵ Oo Hodáwand! Pa del o setk tawára kanán, passaw beday o
man tai hokmáni randgiriá kanán.

¹⁴⁶ Gón taw peryáta kanán: “Maná berakkén”
o man tai parmánána mannán.

¹⁴⁷ Cha bámgwáhá pésar páda káyán o peryáta kanán,
man wati óst o omét gón tai habará bastag.

¹⁴⁸ Mani chamm shapay sajjahén pásán pach ant
ke tai habaray sará pegr kort bekanán.

¹⁴⁹ Oo Hodáwand! Mani tawárá wati mehray hesábá gósh dár,
wati hokmáni hesábá maná zendag bedár.

¹⁵⁰ Hamá ke badkáriáni randgir ant, nazzikká rasetagant,
á cha tai Sharyatá dur ant.

¹⁵¹ Oo Hodáwand! Taw nazzikk ay o
tai sajjahén hokm rást ant.

¹⁵² Man sakk dér ent zántag,
taw wati parmán barjam dáshtagant ke abadi bebant.

¹⁵³ Mani sakki o sórián bechár o mani sará rahm kan
ke tai Sharyaton nashamoshtag.

¹⁵⁴ Mani hakkay démpániá bekan o mani posht bay,
wati kawlay hesábá maná zendag bedár.

¹⁵⁵ Rakkag cha badkárán dur ent
ke á tai hokmáni shóházá naant.

¹⁵⁶ Tai rahmat sakk báz ant, oo Hodáwand!
Wati Sharyatay hesábá maná zendag bedár.

¹⁵⁷ Mani ázár dayók o dozhmen báz ant,
bale man cha tai parmánán wati dém natarréntag.

¹⁵⁸ Béwapáyáni némagá charán o maná cha eshán naprata bit,
ke tai rahbandáni randgiriá nakanant.

¹⁵⁹ Bechár tai rahband maná chón dóst ant,
wati mehray hesábá maná zendag bedár, oo Hodáwand!

¹⁶⁰ Tai sajjahén habar rást ant o
tai sajjahén ádelén hokm abadmán.

¹⁶¹ Hákem maná mopt o náhakk ázára dayant,
bale mani del tai habaráni sará larzit.

¹⁶² Man tai habaray sará shádehia kanán
hamá mardomay paymá ke poletagén málé berasiti.

¹⁶³ Cha repk o prébá naprata kanán,
tai Sharyatá dósta dárán.

¹⁶⁴ Róché hapt bar tará názénán,
pa tai ádelén hokmán.

¹⁶⁵ Hamá ke tai Sharyatá dósta dárant, sakk émen ant o
áyán hecch chizz thagalénta nakant.

¹⁶⁶ Oo Hodáwand! Pa hamá nejátá wadárig án ke cha tai némagá ent o
tai hokmáni randgiriá kanán.

¹⁶⁷ Tai parmánáni randgiriá kanán
ke maná sakk dóst ant.

¹⁶⁸ Tai rahband o parmánána dárán
ke taw mani sajjahén ráhána zánay.

¹⁶⁹ Oo Hodáwand! Mani peryát tará sar bát,
wati labzay hesábá maná agl o hósh beday.

¹⁷⁰ Mani nálag tará sar bát,
wati kawlay hesábá maná berakkén.

¹⁷¹ Mani lonth tai satáyá sarréch bátant
ke taw maná wati hokmán sója dayay.

¹⁷² Mani dap tai habará benázénát,
ke tai sajjahén rahband pa adl ant.

¹⁷³ Tai dast pa mani komakk kanagá tayár bát
ke man tai rahband gechén kortagant.

¹⁷⁴ Oo Hodáwand! Pa hamá nejátá talwasagá án ke cha tai némagá ent o
tai Sharyat mani shádmáni ent.

¹⁷⁵ Maná zendag bedár ke tará benázénán o
tai hokm maná madat kanátant.

¹⁷⁶ Chó gárén paséá darpadar butagán.
Wati hezmatkárá shóház kan
ke man tai hokm nashamoshtagant.

Maná cha prébkárán berakkén

Dém pa Urshalimá borzád rawagay sawté.

120 Wati sakki o sóriáni wahdá man gón Hodáwandá peryát kort o áiá maná passaw dát.

² “Oo Hodáwand!

Maná cha dróbandén lonth o prébkárén dapán berakkén.”

³ Oo prébkárén dap!

Hodáwand tará ché bedant o
ched o gésh gón taw ché bekant?

⁴ Tará gón jangóláni tézén tir o
gón rókén eshkarán sezá dant.

⁵ Apsóz pa man ke Méshékay molká neshtagán,
ke man Kédaray gedánán jahmenend án.

⁶ Man gón choshén mardomán zend gwázenagá dam bortag ke
cha sohl o émeniá naprata kanant.

⁷ Sohl o émeni pasondén mardomé án
bale har wahdá ke habaré kanán, é jangá páda káyant.

Mani komakk kanók Hodáwand ent

Dém pa Urshalimá borzád rawagay sawté.

121 Chammán dém pa kóhá chesta kanán maná komakk cha kojá rasit?

² Maná komakk cha Hodáwandá rasit,
hamá ke ásmán o zemini addh kortagant.

³ Á naylit ke tai pád belakoshit,

á ke tai negahpániá kant wába nakapit.

⁴ Haw, á ke Esrailay negahpán ent
nawapsit o wába nakapit.

⁵ Hodáwand wat tai negahpán ent,
Hodáwand tai rástén némagá sáheg ent.

⁶ Róch, tará róchá ázára nadant o
na máh, shapá.

⁷ Hodáwand tará cha har badiá dura dárit,
tai zenday negahpán ent,

⁸ Hodáwand tai har rawag o áyagay negahpán ent
annun o tán abad.

Hodáwanday lógá berawén

Dém pa Urshalimá borzád rawagay sawté. Dáuday Zabur.

122 Áyán ke gwasht: “Hodáwanday lógá berawén”

man shádán bután.

² Chón wassh! May pád cha tai darwázagán potertag o óshtátagant,
oo Urshalim!

³ Urshalim anchosh bandag butag
ke shahr cha har némagá góñ wat chó tagerdéá gwaptop.

⁴ Hamódá ke kabilaha rawant, Hodáwanday kabilah
ke Hodáwanday námá benázénant
hamá ahd o karáray hesábá ke Esrálá dayag butag.

⁵ Ódá dádrasiay taht barjáh dárag butagant
Dáuday kahól o hándánay taht.

⁶ Pa Urshalimay émeniá dwá kanét,
harkas ke tará, ó Urshalim, dósta dárit, ásudag bát.

⁷ Tai shahray diwáláni tahá sohl o émeni bát o
tai kalátán ásudagi.

⁸ Wati brát o sangatáni háterá gwashán:
“Tará sohl o émeni sar bát.”

⁹ Wati Hodáwandén Hodáay lógay háterá
tai ábád bayagay lóthók án.

Chammán dém pa taw chesta kanán

dém pa Urshalimá borzád rawagay sawté.

123 Wati chammán dém pa taw chesta kanán, taw ke arshá, wati bádsháhi tahtay sará neshtagay.

² Anchó ke goláméay chamm wati wájahay dastá sakk ant o
móledéay chamm wati bánoká
may chamm Hodáwandén Hodáyá sakk ant
ke may sará rahm bekant.

³ May sará rahm kan, oo Hodáwand!

Rahm kan may sará,
ke má sakk báz béezzati saggetag,

⁴ Ásudagén mardománi rishkand o
porkebráni kalág
márá pa sarjamiá rasetag.

Hodáwanday nám may madat ent

Dém pa Urshalimá borzád rawagay sawté. Dáuday Zabur.

124 “Agan Hodáwand gón má gón mabutén,” Esráil begwashát:

² “Agan Hodáwand gón má gón mabutén
á wahdá ke mardomán may sará orosh o hamlah kort,

³ áyán márá zendagá ér bortagat
wahdé hezhmesh may sará chest at.

⁴ Á wahdá ápán márá ér bortagat,
hár o tuppáná márá mán roptagat,

⁵ mastén ápán
márá rópán kortagat.”

⁶ Hodáwandá satá bát
ke naeshti má esháni dantánáni shekár bebén.

⁷ May zendi anchó rakként ke
báli morgé cha shekáriay dámá,
dám dert o má rakketén.

⁸ Hodáwanday nám may madat ent,
ásmán o zeminay jórh kanókay nám.

Hodáwandá wati kawmay chapp o chágerd geptag

Dém pa Urshalimá borzád rawagay sawté.

125 Á ke Hodáwanday sará tawkala kanant Sahyunay kóhay paymá ant

ke sorénaga nabit o tán abad barjáh mánit.

² Anchosh ke kóhán, Urshalim chapp o chágerd kortag,
Hodáwandá wati kawmay chapp o chágerd geptag,
annun o tán abad.

³ Badkárén bádsháhéay asá pahrézkáráni mirásay sará hokmrána nabit

ke pahrézkár wati dastá pa badkári sell makanant.

⁴ Oo Hodáwand! Pa nékdelán néki kan
pa hamáyán ke delesh rást o tachk ant.

⁵ Bale hamá mardom ke chapp o chóthén ráhána rawant,
Hodáwand áyán gón badkárán yakjáha gallénit.
Esráil émen o salámat bát.

May washbahtiá padá byár

Dém pa Urshalimá borzád rawagay sawté.

126 Wahdé Hodáwandá Sahyunay washbahti

per tarrént o áwort
má purah wáb gendagá atén.

² May dap cha kandagá porr at,
zobán cha shádehiay sawtá.

Á wahdá kawmáni nyámá gwashag but:
“Hodáwandá pa eshán mazanén kár kortag.”

³ Haw, Hodáwandá pa má mazanén kár kort,
má gal atén.

⁴ Oo Hodáwand! May washbahtiá padá byár,
anchó ke kawr Négeway^a gyábáná ábádia kárit.

⁵ Hamá ke ars récháná kesht o keshára kanant,
pa shádehi kukkár kanáná ronant.

⁶ Hamá ke gréwáná dara kapit o tohmán pa keshagá bárt,
pa shádehi kukkár kanáná wátarra kant^b o
wati lóthokána^c kárit.

Agan Hodáwand lógá mabandit...

Dém pa Urshalimá borzád rawagay sawté. Solaymánay Zabur.

127 Agan Hodáwand lógá mabandit,

bánbandáni zahmat békár ent.
Agan Hodáwand, shahray negahpániá makant,
nehgahpánáni negahpáni békár ent.

² Tai, sohbá máhallah pád áyag o
shapá tán dérá ágah bayag békár ent.
Zahmata kasshay ke tará pa waragá nán berasit,
á ke Hodáyá dóst ant, agan wáb bebant ham
Hodá é chizzán áyáná dant.

^a 126:4 Negew, Esráilay jonubá gyábáné.

^b 126:6 Wátarr kanag, bezán per tarrag.

^c 126:6 Lóthok, bezán rotagén káhay bastag, changol, bandhal.

³ Chokk cha Hodáwanday némagá mirás ant o
padréch cha hamáiay némagá mozz.

⁴ Warnáiá áwortagén mardénchokk
anchosh ant ke jangóléay dastá tir.

⁵ Bahtáwar hamá mard ent ke tirdáni cha chokká porr ent.
Wahdé choshén mardomé shahray darwázagá gón dozmená dém pa déma bit
hechbar pashal o sharmendaga nabit.

Hodátorsiay bahtáwari

Dém pa Urshalimá borzád rawagay sawté.

128 Bahtáwar hamá ent ke Hodáwanday torsi delá ent o áiay parmánbardáriá gáma jant.

² Taw wati zahmatay bar o samará waray o
bahtáwar o washhála bay.

³ Tai jan tai lógay tahá
chó bar áwarén angurá bit,
tai chokk tai parzónagay chapp o chágérdá
chó zaytunay nahálá bant.

⁴ Haw, hamá mardom ke Hodáwanday tors áiay delá ent
hamé dhawlá bahtáwara bit.

⁵ Hodáwand cha Sahyuná tará barkat bedayát,
Urshalimay ábádiá begendátay,
wati zenday sajjahén róchán.

⁶ Wati chokkáni chokkán begendátay,
Esráil émen o salámat bát.

Maná ázáresh dátág

Dém pa Urshalimá borzád rawagay sawté.

129 “Áyán maná cha warnáiá sakk báz ázár dátág,” Esráil begwashát:

² “Maná cha warnáiá sakk báz ázáresh dátág
bale maná chérdastesh kort nakortag.

³ Nangár kanókán mani srén nangár kortag o
pal^a dráj kortagant.

⁴ Bale Hodáwand ádel ent,
badkáráni zamzili sestant o maná ázáti kort.”

⁵ Hamá ke cha Sahyuná naprata kanant,
sharmsár bát o poshtá bekenzántant.

⁶ Chó bánáni saray káhá bátant

^a 129:3 Pal, bezán nangáray pad, kalmér

ke cha rodagá pésar hoshka bit,
⁷ ke ronókay panjagay porré nabit,
chenókay bagalá porra nakant.
⁸ Rahgwazé ham pa áyán nékdwai makanát o magwashát:
“Hodáwand shomárá barkat bedayát,
má Hodáwanday námá shomárá barkata dayén.”

Hodáwanday wadará án

Dém pa Urshalimá borzád rawagay sawté.

130 Man cha johlánkián tará tawára kanán, oo Hodáwand!

Hodáwand! Mani tawará gósh dár,
mani peryát o zárián delgósh kanátay.

³ Oo Hodáwand! Agan taw gonáhán hesáb bekanay,
gorhá kay pashta kapit, oo Hodáwand?

⁴ Bale taw bakshendah ay
tánke tai tors may delá bebit.

⁵ Man pa Hodáwandá wadára kanán,
mani sajjahén del o jáñ wadára kant o
mani omét gón Hodáay habará ent.

⁶ Pa Hodáwandá wadára kanán
cha hamá negahpánán géshter ke sohbay wadará ant,
haw, cha hamá negahpánán géshter ke sohbay wadará ant.

⁷ Oo Esráil! Ométá pa Hodáwandá bedár,
ke mehr gón Hodáyá ent o
kámelén rakkénag hamáiay dastá ent.

⁸ Á wat Esráilá mókit
cha áyáni sajjahén gonáhán.

Nonnokéay paymá áram geptagán

Dém pa Urshalimá borzád rawagay sawté. Dáuday zabur.

131 Oo Hodáwand! Mani del gorunák naent o na ke mani chamm porkebr ant.

Gón mazanén kárán delgósha nabán o
na gón á kárán ke mani delá bákamál ant.

² Man watá chopp o áram kortag
cha shirá sestagén nonnokéay paymá
ke mátay kotthá ent.
Haw, mani arwáh cha shirá sestagén nonnokéay paymá áram geptag.

³ Oo Esráil! Ométá pa Hodáwandá bedár,
annun o tán abad.

Hodáwandá Sahyun gechén kortag

Dém pa Urshalimá borzád rawagay sawté.

132 Oo Hodáwand! Dáudá yát kan o áiay sakki o sórián.

²Gón Hodáwandá sawgendé wárti o
gón Ákubay zórmandén Hodáyá kawli kort o gwashti:
³⁻⁵“Tánke pa warí Hodáwand,
pa Ákubay zorákén Hodáyá lógé addh makanán,
wati jenday lógá narawán,
watá áram kanagá naylán,
chammán nazza nayárán,
mecháchán dhokkagá^a naylán.”

⁶Bechár, má Epráthay shahrá ahd o karáray pétiay zegr eshkot o
Jáháray sardhagará dar gétk.

⁷“Byáét áiay lógá rawén o
áiay pádáni padagay démá sojdaha kanén o gwashén:

⁸‘Hodáwand! Jáh jan o warí ásudagiay jághá byá
gón warí zóray ahd o karáray pétiá.

⁹Tai dini péshwáyán pahrézkáriay póshák gwará bát o
tai wapádárén hezmatkár shádehiay kukkár bekanátant.””

¹⁰Pa warí hezmatkár Dáudá bechár o
wati “rógen per moshtagéná”^b dawr maday.

¹¹Hodáwandá gón Dáudá sawgendé wárt,
kawlé korti o cha warí zobáná nabajjit, ke:
“Man cha tai óbádagán yakké
tai bádháhi tahtá nádénán.

¹²Agan tai chokk, mani ahd o karáray sará bóshtant o
mani hamá rahbandáni randgiriá bekanant ke manesh sója dayán,
gorhá tai óbádag, tai bádháhi tahtá nendant, tán abad.”

¹³Chéá ke Hodáwandá Sahyun dar chetag o
pa warí menendjáhá dósti butag, gwashtagi:

¹⁴“É mani áramjáh ent, tán abad.
Man hamedá warí bádháhi tahtá nendán
chéá ke dóstona bit.

¹⁵Man eshiá barkata dayán o ábáda kanán,
eshiy garibán lápséra kanán.

¹⁶Man eshiay dini péshwáyán rakkagay pósháká gwará dayán o
eshiy wapádárén mardom pa shádehi kukkára kanant.

¹⁷Man edá pa Dáudá kánthéc ródénán o
pa warí “rógen per moshtagéná” cherágé róka kanán.

^a 132:3-5 Dhokkag, bezán dhikk warag, hór bayag. ^b 132:10 Rógen per mosthag, bezán pa bádháhiá gechén kanag.

^c 17:132 Kánthay máná edá zórmandén mardomé, bezán bádháh.

¹⁸ Eshiy dozhmenán, sharmsáriay pósháká gwará dayán o
eshiy sar gón drapshókén tájéá borza bit.”

Tepáki wassh o delkassh ent

Dém pa Urshalimá borzad rawagay sawté. Dáuday Zabur.

133 Chón wassh o delkassh ent ke Hodáy mardom pa tepáki hór benendant.

² Purah gránbaháén thélé ke sará charp kortag o
risshán ér rechán ent,
Hárunay risshán o
jahlád tán kabáhay jigá.
³ Chó ke Hermónay^a nódán
ke Sahyunay kóháni sará shanzant.
Chéá ke ódá Hodáwandá wati barkatay parmán dátág,
zend, tán abad.

Hodáwandá benázénét

Dém pa Urshalimá borzad rawagay sawté.

134 Ji haw, Hodáwandá benázénét, oo Hodáwanday sajjahén hezmatkárán ke shapán Hodáwanday lógá áiay hezmatá kanagá ét!

² Dastán pákén jágahay némagá chest kanét o
Hodáwandá benázénét.

³ Hodáwand cha Sahyuná shomará barkat bedayát,
hamá ke zemin o ásmánay addh kanók ent.

Hodáwanday námá benázénét

135 Hodáwandá benázénét, Halléluyá. Hodáwanday námá benázénét,

oo Hodáwanday hezmatkárán, Hodáwandá benázénét,
² shomá sajjahén ke Hodáwanday lógá hezmata kanét,
may Hodáy lögay péshgáhá.

³ Hodáwandá benázénét chéá ke Hodáwand nék ent,
pa sawt áiay námá benázénét ke delkassh ent.

⁴ Chéá ke Hodáwandá Ákub pa wat gechén kortag,
Esráil, ke pa áiá ganjé bebit.

⁵ Mana zánán ke Hodáwand mazan ent,
ke may Hodáwand cha sajjahén hodáyán master ent.

^a 3:133 Hermón Esráilay shomálá kóhé.

⁶ Harché ke Hodáwand ásmánán o zeminá,
daryáyán o daryáyáni sajjahén johlánkián kanag belóthit, kant.

⁷ Cha zeminay goddhi hadd o simsarán jambarán chesta kant,
gerókán gón hawrán rawána dant o
cha warí ambárán gwátá dhanná kárit.

⁸ Hamáiá Mesray awali chokk jatant,
mardománi ham o dalwatáni ham.

⁹ Oo Mesr! Tai nyámá warí nesháni o mójezahi rawán dátant,
Perawn o áiay sajjahén hezmatkáráni helápá.

¹⁰ Bázén kawmé jati o
áyáni porwákén bádsháhi koshtant,

¹¹ Amuriáni bádsháh Sihón,
Báshánay bádsháh Óg o

Kanhánay sajjahén bádsháh o
¹² áyáni sardhagári mirásé kortant
mirasé pa warí mahluká, pa Esráilá.

¹³ Oo Hodáwand! Tai nám tán abada mánit o
taw nasláni nasl yát kanaga bay, oo Hodáwand!

¹⁴ Chéá ke Hodáwand warí mahlukay dadrasiá kant o
pa warí hezmatkárán rahma kant.

¹⁵ Kawmáni “hodá” teláh o nograh ant,
ensánay dastay jórh kortagén bot.

¹⁶ Dapesh per bale habar korta nakanant,
chammesh per bale dista nakanant,

¹⁷ góshesh per bale eshkota nakanant
o dapá sáhesh mán nést.

¹⁸ Harkas ke eshán jórha kant, hamesháni paymá bit o
harkas ke esháni sará tawkala kant ham anchosha bit.

¹⁹ Oo Esráilián! Hodáwandá benázénét.

Oo Hárúnay lóg! Hodáwandá benázénét.

²⁰ Oo Léwiay lóg! Hodáwandá benázénét.

Oo Hodátorsán! Hodáwandá benázénét.

²¹ Cha Sahyuná Hodáwandá benázénét,
hamá ke Urshalimá jahmenend ent.
Hodáwandá benázénét, Halléluyá.

Hodáwanday mehr abadmán ent

136 Hodáwanday shográ begerét ke á nék ent o mehri abadmán.

² Hodáyáni Hodáay shográ begerét
ke mehri abadmán ent.

³ Hodáwandáni Hodáwanday shográ begerét
ke mehri abadmán ent.

⁴ Hamá yakkénay shográ begerét ke mazanén mójezaha kant,
mehri abadmán ent.

⁵ Hamá ke cha wati dánáiá ásmáni addh kortagant,
mehri abadmán ent.

⁶ Hamá ke zemini ápáni sará chér gétkag,
mehri abadmán ent.

⁷ Hamá ke mazanén nuri addh kortagant,
mehri abadmán ent.

⁸ Róchi addh kort ke róchá hákemi bekant,
mehri abadmán ent.

⁹ Mág o estári sázetant ke shapá hákemi bekanant,
mehri abadmán ent.

¹⁰ Hamá ke Mesray awali chokki jatant,
mehri abadmán ent o

¹¹ Esráili cha áyáni nyámá dar kort,
mehri abadmán ent.

¹² Gón porzórén básk o shahártagén dasté,
mehri abadmán ent.

¹³ Hamá ke Sohrzeri do kapp kort,
mehri abadmán ent,

¹⁴ o Esráili cha eshiay tahá gwázént,
mehri abadmán ent,

¹⁵ bale Perawni gón lashkará Sohrzerá bokként,
mehri abadmán ent.

¹⁶ Hamá ke gyábáná wati mahluki rahshóni dát,
mehri abadmán ent.

¹⁷ Hamá ke mazanén bádsháhi jatant,
mehri abadmán ent.

¹⁸ Zóráwarén bádsháhi koshtant,
mehri abadmán ent.

¹⁹ Amuriáni bádsháh Sihóni jat,
mehri abadmán ent.

²⁰ Báshánay bádsháh Ógi kosht,
mehri abadmán ent.

²¹ Esháni zemini mirásé kortant,
mehri abadmán ent,

²² mirásé pa wati hezmatkárén Esráilá,
mehri abadmán ent.

²³ Hamá ke márá may kamsharapián yáti kort,
mehri abadmán ent.

²⁴ Márá cha dozhmenán ázáti kort,
mehri abadmán ent.

²⁵ Hamá ke sajjahén sahdárán róziga dant,
mehri abadmán ent.

²⁶ Borzén arshay Hodáay shográ begerét

ke mehri abadmán ent.

Hodáwanday sawtán chón jata kanén?

137 Bábelay kawráni kashá,

má nesht o grét,

wahdé má Sahyun yát kort.

² Má drachkáni sará

wati soráz o chang dratkant,

³ ke may bandig kanókán márá gwasht: “Sawt bejanét,”

ke may ázár dayókán cha má shádehiay sawt lóthet.

Gwashtesh: “Pa má cha Sahyunay sawtán yakké bejanét.”

⁴ Má ke darándhéh én,

Hodáwanday sawtán chón jata kanén?

⁵ Oo Urshalim! Agan man tará shamosht,

mani rástén dast wati honará beshamóshát.

⁶ Mani zobán nokká belecchát

agan tará yát makanán o

agan Urshalimá wati masterén shádehi sarpad mabán.

⁷ Oo Hodáwand! Yátá bedár

ke Urshalimay kapagay róchá Edumián ché kort.

“Próshéti” áyán gwasht,

“cha boná próshéti.”

⁸ Oo Bábelay jenekk!^a Taw zutt dém pa tabáhiá raway,

bahtáwar hamá ent ke tará sezá dant,

hamá chizzáni sezáyá ke taw góón má kortagant.

⁹ Bahtáwar hamá ent ke tai chokkána zurit o

taláráni sará jant.

Hodáwanday shográ gerén

Dáuday zabur.

138 Oo Hodáwand! Cha delay johlánkiá tai shográ gerán,

hodáyáni bárgáhá tará pa sawta názénán.

² Démm pa tai pákén parasteshgáhá kóndhána kapán o tai námá názénán
pa tai mehr o wapádáriá

ke taw wati nám o wati mohréen ahd o karár

cha sajjahén chizán géshter mazani bakshátag.

³ Har wahdá ke tará gwánkon jatag taw maná passaw dátág,

mani del mazan kortag o maná zór o wák bakshátag.

^a 137:8 Bábelay jenekk, bezán Bábelay nendók.

⁴ Hodáwand! Jahánay sajjahén bádsháh tai shográ begerátant,
hamá wahdá ke tai habará eshkonant.

⁵ Tai káráni satáyá sawt bejanátant,
ke Hodáwanday shán mazan ent.

⁶ Harchont ke Hodáwand mazanshán ent,
bale békebrán pa rahma chárit o
gorunákán cha durá pajjáha kárit.

⁷ Harchont ke sakki o sóriáni tahá gardán,
bale taw maná zendaga dáray.
Taw mani dozhmenáni hezhmay helápá wati dastá shaháray o
gón wati rástén dastá maná rakkénay.
⁸ Hodáwand maná rakkénit.
Hodáwand! Tai mehr abadmán ent,
wati dastáni kárán band makan.

Oo Hodáwand! Taw maná zánay

Pa sázger o washalhánáni sálárá. Dáuday Zabur.

139 Oo Hodáwand! Taw maná chakkásetag o zánay.
Taw zánay ke man kadi nendán o kadi páda káyán,
cha durá mani pegr o hayálána zánay.

³ Taw maná tarr o gard kanagá ham genday o
tachk bayag o áram kanagá ham,
mani har kárá zánay.

⁴ Habaré ke cha mani zobáná dara kayt,
taw cha pésará zánayi, oo Hodáwand!

⁵ Taw cha poshtá o démá maná chapp o chágerd kortag o
wati dast mani sará ér moshtag.

⁶ Choshén zánt pa man sakk báz ajab ent
cha mani sarpadiá békesás báláter.

⁷ Cha tai arwáhá démá tarrént o kojá shota kanán?
Cha tai bárgáhá tatk o kojá shota kanán?

⁸ Agan ásmánán berawán, taw hamódá ay o
agan mordagáni jaháná wati nepádá pach bekanán, taw hamódá ay.

⁹ Agan bámgwáháni báñzolán bál bekanán,
agan daryáay durterén kerréá benendán,

¹⁰ ódá ham tai dast mani rahshóniá kant o
tai rástén dast maná mohra dárit.

¹¹ Agan begwashán: “Béshakk tahári maná chéra dant o
rozhnái mani chapp o chágerdá shapé jórha bit,”

¹² tahári ham pa taw tahára nabít,
shap, chó róchá drapshit,
ke tahári ham pa taw chó rozhnáiá ent.

¹³ Béshakk mani del o darun taw addh kortag
taw maná mátay lápá gwaptag.

¹⁴ Tai shográ gerán ke man chó wassh o zébá jórh butagán,
tai kár hayrán kanók ant,
man eshiá sharra zánán.

¹⁵ Mani haddh cha taw chér naatant
wahdé chér o andémén jágahá addh bayagá atán,
wahdé zeminay johlánkián man gwapag o yakjáh kanag bayagá atán.

¹⁶ Tai chammán mani násarjamén ján dist,
mani zenday sajjahén róch tai ketábá nebeshtah kanag butant,
cha hamá wahdá pésar ke cha é róchán yakké ham nayátkagat.

¹⁷ Oo Hodá! Tai hayál pa man chón bébahá ant,
eshán hesáb nést.

¹⁸ Agan hesáb kanagesh belóthán,
cha rékáni dánagán géshter ant.
Wahdé ágaha bán,
angat góon taw án.

¹⁹ Taw badkár bekoshténant, oo Hodá!
Cha man dur bét, oo hónwárán!

²⁰ É pa badén maksadé tai námá gerant,
tai helápá kopra kanant.

²¹ Oo Hodáwand! Man cha áyán sakk békázán ke cha taw naprata kanant o
cha áyán watá dura dárán ke tai helápá jáha janant.

²² Ji haw! Man góon áyán sakk naprata kanán,
á mani dozhmen jórh butagant.

²³ Oo Hodá! Maná bechakkás o mani delá bezán,
maná bechakkás o mani paréshánián delgósh kan.

²⁴ Agan cha mani káréá delranj ay maná péshi dár o
karnigén ráhá^a maná rahshón bay.

Maná cha badkárán berakkén

Pa sázger o washalhánáni sálárá. Dáuday Zabur.

140 Hodáwand! Maná cha badkárán pahréz o
cha hezhmnákán berakkén,

² cha hamáyán ke wati delá badén pandala sázant o
har róch jangé páda kanant.

³ Wati zobáná chó márá téza kanant o
garrmáray zahresh lontháni chérá ent. Ósht...

⁴ Hodáwand! Maná cha badkáráni dastá dur bedár o
cha hezhmnákán berakkén

^a 139:24 Karnigén ráh, bezán hamá ráh ke Hodáyá che karnán o pésar gisshéntag.

ke pa mani pádán dám sázagá ant.

⁵ Gorunákán pa man dám chér gétkag,
dámi chammag.

Mani ráhá talkesh chér kortag. Ósht...

⁶ Gón Hodáwandá gwashán: “Taw mani Hodá ay.”

Mani peryát o záriá gósh dár, oo Hodáwand!

⁷ Oo Hodáwand, mani mohkamén Hodáwand o rakkénók!

Jangay róchá taw mani saray negahpáni kort.

⁸ Hodáwand! Badkáráni armánán purah makan,

wahdé orosha kanant

áyáni pandalán sóbén bayagá mayl. Ósht...

⁹ Áyán ke maná angerr kortag,
áyáni lontháni badi, áyáni jenday sará bekápát.

¹⁰ Rókén eshkaresh sará berechát,

ásá dawr dayag bátant o

pujgelén kaddhán boddhántant o

hechbar dar átk makanátant.

¹¹ Pléndh may sardhagará ábád mabátant,

hezhmnákáni sará baláhé kapát.

¹² Mana zánán ke Hodáwand pa bazzagán dadrasí o
pa hájatmandán adl o ensápa kant.

¹³ Pahrézkár zalur tai námay shográ gerant o
nékdel tai bárgáhá jahmenenda bant.

Mani delá mayl ke dém pa badkáriá berawt

Dáuday Zabur

141 Oo Hodáwand! Tará tawára kanán, zutt pa man byá. Wahdé tará tawára kanán, mani tawárá gósh dár.

² Mani dwá tai bárgáhá chó sóchokiá kabul bát o
mani chest butagén dast, bégáhay korbánigay paymá.

³ Hodáwand! Pa mani dapá negahpáné bedár o
mani lontháni darwázagay dapá páspáni bekan.

⁴ Mani delá mayl ke dém pa badkáriá berawt o
man badkáráni hamráhiá sellén kárán gón bebán,
maná áyáni washtámén chizzáni waragá mayl.

⁵ Bell maná pahrézkáré shahmát bejant, é rahmé,
bell maná hakkal bedant, é pa mani sará rógené,
man cha eshiá enkára nakanán,
angat mani dwá, badkáráni káráni helápá bit.

⁶ Esháni hákem, cha talárán jahlád dawr dayaga bant,
gorhá zánant ke mani habar sharr o rást ant.

⁷ Gwashant: “Anchosh ke yakké zeminá nangára kant o derrit, may haddh, mordagáni jahánay dapá sheng o sháng butagant.”

⁸ Bale mani chamm tará sakk ant, Hodáwand, oo Hodáwand!
Tai mayára bán,
maná markay dastá maday.

⁹ Maná cha hamá dámá berakkén ke badkárán chér gétkag,
cha áyáni talká.

¹⁰ Badkár wat, wati dámán kapátant o
man pa salámati begwazátán.

Maná cha kaydá dar kan

Dáuday shayri gwashtánk, hamá wahdá ke gárav tahá at. Dwáé.

142 Hodáay bárgáhá zár o peryáta kanán o cha Hodáwandá rahma lóthán.

² Wati gelagán hamáiay bárgáhá kanán o
wati sakki o sórián hamáiá gwashán.

³ Arwáh ke mani bátená béwára bit,
taw ay ke mani ráhay rahshón ay.
Hamá ráhá ke mana rawán
pa man dámé chéresh gétkag.

⁴ Mani rástén némagá bechár,
kass nést ke mani hayálá bebit.
Maná panáh nést o
kass mani zenday pegrá naent.

⁵ Oo Hodáwand! Tai bárgáhá peryáta kanán o gwashán:
“taw mani panáhjáh ay o
zendagénáni zeminá mani bahr.”

⁶ Mani peryátá gósh dár
ke man mazanén sakki o sórián kaptagán.
Maná cha á mardomán berakkén ke mani randá kaptagant,
chéá ke cha man zórákter ant.

⁷ Maná cha kaydá dar kan
ke tai námá benázénán.
Gorhá pahrézkár mani chapp o chágerdá moccha bant
ke taw pa man nékia kanay.

Man pa taw tonnig án

Dáuday Zabur.

143 Oo Hodáwand! Mani dwáyá gósh dár mani peryát o záriá beshkon,

pa wati wapádári o adlaygi
maná passaw beday.

² Wati hezmatkárá mayárig makan
ke tai bárgáhá kass bémayár naent.

³ Dozhmen mani randá kaptag,
áiá maná zeminá dawr dátág,
maná taháriá jahmenendi kortag
kwahnén mordagáni paymá.

⁴ Arwáh mani daruná nezór ent o
delon mán bátená hayrán.

⁵ Kwahnén zamánagán yáta kanán
tai sajjahén káráni sará pegra kanán,
tai dastáni kortagén káráni hayálá kapán.

⁶ Wati dastán tai némagá shahárán,
man pa taw tonnig án,
chó hoshkén dhagáréá. Ósht...

⁷ Hodáwand! Maná zutt passaw day,
mani ruhá dam bortag,
wati démá cha man chér maday,
ke hamáyáni paymá bán ke kall o kabrá kapant.

⁸ Bámgwáhán tai mehray habará beshkonátán,
ke man tai sará tawkal kortag,
sój day ke kojám ráhá berawán,
ke man wati zend tai dastá dátág.

⁹ Oo Hodáwand! Maná cha dozhmenán berakkén,
man tai kerrá chéra bán.

¹⁰ Maná tálím beday ke tai razáay sará kár bekanán,
chéá ke taw mani Hodá ay,
tai nékén Ruh tachkén ráhá mani rahshón bát.

¹¹ Oo Hodáwand! Pa wati námaygi maná zendag bedár,
pa wati adlaygi, maná cha sakki o sórián dar kan.

¹² Wati mehray tahá mani dozhmenán tabáh kan,
mani badwáhán gár o bégwáh kan,
ke man tai hezmatkár án.

Hodá may sangar ent

Dáuday Zabur.

144 Hodáwandá satá bát, mani talárá,
ke mani dastán pa jangá dara kárit o
mani lankokán pa merhagá.

² Hamá mani mehr kanókén Hodá o kalát ent,

mani sangar ent o mani rakkénók,
mani espar, ke áiay mayára bán,
ke mani kawmá mani chérdasta kant.

³ Hodáwand! Ensán chié ke taw áiá mán byáray,
bani ádám chié ke taw áiay hayálá bedáray?

⁴ Ensánay zend chó damkasshéá ent o
róchi chó gwazókén sáhegéá.

⁵ Hodáwand! Ásmáná derr o jahlád byá,
kóhán dast jan ke cha eshán dutt dar byayt.

⁶ Wati gerókán sheng kan ke dozhmen sheng o sháng bebant,
wati tirán shán o sargardánesh kan.

⁷ Dastá cha borzád shahár,
maná ázát kan o berakkén

cha bázén ápán,
cha darámadáni dastán,

⁸ ke dapesh cha drógá porr ant o
rástén dastesh cha prébá.

⁹ Man pa taw nökén sawté janán, oo Hodá!
Dahtárén soróz o changay sará pa taw sáza janán,

¹⁰ pa hamáiá ke bádsháhán sóbéna kant o

wati hezmatkárén Dáudá rakkénit,
cha koshókén zahmá.

¹¹ Maná berakkén o cha darámadáni dastá ázát kan,
ke dapesh cha drógá porr ant o
rástén dastesh cha prébá.

¹² Gorhá may bachakk, warnáiá chó rostagén drachká bant o
may jenekk chó washtráshtagén menoká ke pa kalátán tráshag butagant.

¹³ May ambár, cha har paymén bar o samará porra bant o
may ramag hazáráni hesábá gésha bant,
dahán hazáráni hesábá, may dhagárán.

¹⁴ May áposén gók báz báz chokka kárant o
dozhmen may diwálán próshta nakanant,
kass bandiga nabit o
may bázárán nálag o peryáta namacchit.

¹⁵ Bahtáwar hamá mardom ant ke hamé dhawlá bant,
bahtáwar hamá ant ke Hodáwand áyáni Hodá ent.

Hodáwand mazan ent

Satá o saná. Dáuday Zabur.

145 Tai shán o shawkatá názénán, oo mani Hodá! Oo bádsháh!
Tai námá satá kanán, abad tán abad.

² Tará har rócha názénán o

tai námá satá kanán, abad tán abad.

³ Hodáwand mazan ent o satáay báz láhek,
kass áiay mazaniá kadd o kesás korta nakant.

⁴ Naslé pa domi naslá tai káráni satáyá kant o
tai mazanén káráni kessahána kárit.

⁵ Man tai mazanén shán o shawkatay sará pegra kanán,
tai bákamálén káráni sará.

⁶ Tai bákamálén káráni zóráwari hamok zobánay sará ent o
man tai mazanén káráni járá janán.

⁷ Tai mazanén sharriáni kessahána kárant o
tai adlay sawtá janant.

⁸ Hodáwand mehrabán o rahm kanók ent,
hezhm geragá déra kant o mehri báz ent.

⁹ Hodáwand gón sajjahénán nék ent o
wati sajjahén addh kortagénáni sará rahma kant.

¹⁰ Oo Hodáwand! Tai dastay hamok kár tai shográ gipt,
tai wapádár tará názénant.

¹¹ Tai bádsháhiay shán o shawkatay habará kanant o
tai zóráy mesálána dayant,

¹² tánke sajjahén baniádam tai zóráwarén kárán jár bejanant,
tai bádsháhiay shán o shawkatá.

¹³ Tai bádsháhi abadi bádsháhié o
tai hákemi nasláni nasl barjáha mánit.

¹⁴ Harkas ke kapit, Hodáwand áiá dárit o
harkas ke lagatmál ent, Hodáwand áiá chesta kant.

¹⁵ Sajjahénáni chamm pa taw sakk ant o
taw áyáni rózigá pa wahda bakshay.

¹⁶ Taw wati dastá pacha kanay o
har zendagénay wáhagán puraha kanay.

¹⁷ Hodáwand wati hamok ráhá ádel ent,
wati sajjahén kárán wapádár.

¹⁸ Harkas ke Hodáwandá tawára kant, Hodáwand áiay nazzikká ent,
harkas ke pa del o setk áiá tawára kant.

¹⁹ Harkasá ke Hodáay tors delá ent, Hodá áiay wáhagán puraha kant o
áiay peryátán gósha dárit o rakkéniti.

²⁰ Hodáwand wati sajjahén dóst dárokáni negahpán ent o
sajjahén badkárán tabáha kant.

²¹ Mani dap Hodáwandá názénit,
sajjahén sahdár áiay pákén námá satá bedayátant, abad tán abad.

Hodáwand bandigán ázáta kant

146 Hodáwandá benázénét, Halléluyá.

Oo mani arwáh! Hodáwandá benázén.

²Tán zendag án Hodáwandá satá kanán

tánke hastán wati Hodáyá názénán.

³Shahzádagáni sará tawkal makanét,
mardománi sará, ke rakkénta nakanant.

⁴Arwáhesh ke dara kayt, zeminá pera tarrant o
hamá róchá áyáni sajjahén shawr o hayál gár o zawála bant.

⁵Bahtáwar hamá ent Ákubay Hodá áiay komakk ent,
hamá ke ométi wati Hodáwandén Hodáy sará ent,

⁶hamáiay sará ke zemin o ásmánay jórh kanók ent o
daryá o har ché ke daryáyá hast,

hamáiay sará ke tán abad wapádár ent,

⁷zolm distagénáni dadrasiá kant o
shodigán waráka dant.

Hodáwand bandigán ázáta kant,

⁸Hodáwand kóráni chammán pacha kant,
Hodáwand hamáyán chesta kant ke lagatmál ant,

Hodáwand pahrézkárán dósta dárit,

⁹Hodáwand darámadáni negahpániá kant o
chóraw o janózámáni hayálá dárit,
bale badkáráni ráhá chapp o chótha kant.

¹⁰Hodáwand tán abad bádsháhia kant,

tai Hodá, oo Sahyun, naslání nasl.

Hodáwandá benázénét, Halléluyá.

Hodáwand proshtadelán dráha kant

147 Hodáwandá benázénét, Halléluyá,

may Hodáy názénag chón wassh ent o
áiay satá kanag delkassh.

²Hodáwand Urshalimá cha nóksará addha kant o

Esráilay darándhéhán yakjáha kant.

³Proshtadelán dráha kant o

thappánesha bandit.

⁴Estárán hesába kant o

har yakkéá pa nám tawára kant.

⁵May Hodáwand mazan ent, zóri békesás,

áiay zánt o zánagá kadd o kesás nést.

⁶Hodáwand békebrán komaka kant,

bale badkárán zeminá dawra dant.

⁷ Hodáwandá gón shogrgozári benázénét,
pa may Hodáyá soráz o chang bejanét.

⁸ Á, ásmáná gón jambara póshénit o
zeminá hawra bakshit o
kóháni sará sabzaga ródénit.

⁹ Á, haywánán waráka dant o
gwarágán ham, wahdé peryáta kanant.

¹⁰ Á, aspáni zórá gala nabit o
na ke jangóláni pádán.

¹¹ Hodáwand hamáyáni sará wassha bit ke cha áiá torsant o
sajjahén óst o ométesh gón áiay mehrá ent.

¹² Oo Urshalim! Hodáwandá satá kan,
Oo Sahyun! Hodáwandá benázén.

¹³ Hamá tai darwázagáni karhián mohra dárit o
tai diwáláni tahá, tai chokkán barkata dant.

¹⁴ Tai marz o simsarán émena kant o
tará cha gehterén gandomá sérlápa kant.

¹⁵ Wati hokmá zeminá ráha dant o
áiay habar téziá shenga bit.

¹⁶ Barpá chó pazhmá shenga kant o
nódá poray paymá shánka dant.

¹⁷ Tróngalá nánay hurdagáni paymá éra dant,
kay áiay barpén sártiay démá óshtáta kant?

¹⁸ Wati habará ráha dant o har chizz ápa bit,
wati gwátá déma dant o ápa rombant o tachant.

¹⁹ Wati habará pa Ákubá áshkára kant o
wati hokm o parmáná pa Esráilá.

²⁰ É kári pa dega hecch kawméá nakort o
é dega kawm áiay rahbandána nazánant.
Hodáwandá benázénét, Halléluyá.

Hodáwanday shán cha zemin o ásmáná borzter ent

148 Hodáwandá benázénét, Halléluyá.

Cha ásmánán Hodáwandá benázénét,
borzén jágahán áiá satá kanét.

² Oo áiay sajjahén préshtagán! Áiá satá kanét.
Oo áiay sajjahén ásmáni lashkarán! Áiá satá kanét.

³ Oo máh! Oo róch! Áiá satá kanét.
Oo sajjahén drapshnákén estárán! Áiá satá kanét.

⁴ Oo borzén arsh! Áiá satá kan.
Oo ásmánay sarboray ápán! Áiá satá kanét.

⁵ É sajjahén, Hodáwanday námá satá bekanátant,
chéá ke cha hamáiay hokmá jórh butagant.

⁶ Hamáiá é sajjahén, abad tán abad barjáh dáshtagant o anchén hokmé dáti ke hechbar dawr dayag o nákár kanaga nabit.

⁷ Hodáwandá cha zeminá satá kanét,
shomá oo sajjahén daryái sahdárán o zeray sajjahén johlánkián,

⁸ oo gerók o tróngal, barp o jambarán,
oo tupánén gwátán ke hamáiay hokmá barjáha dárét,
⁹ oo kóh o sajjahén jompán,
oo nibagi drachk o sajjahén gazzán,
¹⁰ oo rastar o sajjahén dalwatán,
oo kasánén jánwar o báli morgán,
¹¹ oo zeminay bádsháh o sajjahén kawmán,
oo zeminay shahzádag o sajjahén hákemán,
¹² oo warnáén mardén o janénán,
oo pirénán, gón chokkán yakjáh!

¹³ É sajjahén, Hodáwanday námá satá bekanátant,
chéá ke tahná hamáiay nám mazanshán ent,
hamáiay shán o shawkat cha zemin o ásmáná borzádter ent.

¹⁴ Áiá kánthé^a pa wati kawmá borz kortag,
áiay sajjahén wapádárén hezmatkáráni satá,
Esráilay satá, kawmé ke gón áiay delá nazzikk ent.
Hodáwandá benázénét, Halléluyá.

Pa Hodáwandá nótén sawté bejanét

149 Hodáwandá benázénét, Halléluyá.

Pa Hodáwandá nótén sawté bejanét o
áiá, áiay wapádáráni mocchiá benázénét.

² Esráil pa wati addh kanóká shádehi bekanát,
Sahyunay chokk pa wati bádsháhá gal bátant.

³ Gón nách áiay námá satá bedayát o
áiá gón zháng o chang benázénátant.

⁴ Chéá ke Hodáwand cha wati kawmá washnód ent,
á békebrán sóbmandiay tájá bakshit.

⁵ Áiay wapádár gón é pahrá shádehi bekanát o
wati gandaláni tahá shádehiay sawt bejanátant.

⁶ Hodáwanday satá o sanáesh dapá bát o
dodapén zahmesh dastá

⁷ ke cha ráján bér begerant o
kawmán sezá bedayant,

⁸ bádsháhánesh pa zamzil bebandant o
sardáránesh pa ásenén pádband,

⁹ tánke hamá dadrasiá barjáh bekanant ke esháni helápá nebeshtah kanag butag,
é, áiay sajjahén wapádáráni shán ent.
Hodáwandá benázénét, Halléluyá.

^a 14:148 Kánthay máná edá zór o kodrat ent.

Har sahdár Hodáwandá satá bekanát

150 Hodáwandá benázénét, Halléluyá.

Hodáyá áiay pákén arshá satá kanét,

áiay zór o wákay ásmánán.

² Pa áiay porwákén kárán áiá satá kanét,

pa áiay kámelén mazaniá áiá satá kanét.

³ Áiá gón sornáay tawará satá kanét,

gón soróz o changán satái kanét.

⁴ Áiá gón zháng o nách satá kanét,

gón simmi sázán o nalá satái kanét.

⁵ Áiá gón dhohlán satá kanét,

gón borztawárén dhohlán.

⁶ Har chizzá ke sáh mán, Hodáwandá satá bekanát.

Hodáwandá benázénét, Halléluyá.